

**NATIONAL ASSEMBLY OF  
SEYCHELLES**

*Wednesday 8<sup>th</sup> November  
2023*

*The Assembly met at 9am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonzour Manm Onorab. Bonzour nou zofisye Lasanble, nou piblik ki pe swiv nou an deor. Mersi pou zot partisipasyon e byenveni dan nou sesyon travay. Nou la byensir, pou repons lo ladres Bidze. E mon a demann madanm raporter pou apel Minis Finans pou zwenn nou silvouple.

Bonzour Minis Naadir Hassan. Minis pour Finans, Plan Nasyonal e Komers. E ou pe zwenn nou pou bann repons e deba lo *Appropriation Bill, 2024* pou *Second Reading*.

E nou pou komans avek ladres *Leader* Lopozisyon. Onorab Sebastien Pillay ou annan laparol.

**HON SEBASTIEN PILLAY**

Bonzour Mr Speaker e bonzour tou koleg Onorab isi

dan Lasanble. Mon swet en bonzour spesyal Minis ki avek nou pou swiv bann deba lo Bidze. E mon remarke nou annan de viziter dan Galeri ki mon osi swet zot bonzour e byenveni dan Lasanble Nasyonal.

Mr Speaker, avan mon komans mon diskour mon ti a kontan premyerman remersye tou zabitan La Digue ki ti resevwar nou pandan sa *weekend* e ki ti vin partisip dan sa gran manifestasyon, sa gran *rally*. Pli gran *rally* ki'n arive lo nou bann zil pandan sa *weekend* Mr Speaker!

***(APPLAUSE)***

**HON SEBASTIEN PILLAY**

Mon krwar ki bann zabitan lo zil in montre zot santiman e nou donn zot nou garanti ki koman en parti nou pou reste a kote zot e kontinyen delivre pou zot dan lentere nou pei.

Mr Speaker, ozordi bomaten mon koz lo lapar lamazorite Seselwa. Lamazorite Seselwa ki tre dezapwente. Dezapwente avek en Prezidan e son Gouvernman ki'n fer krwar avek zot ki li i zot pli bon dalon e i pou donn tou Seselwa en meyer lavi.

Dezapwente ki in fer Seselwa krwar ki sa sanzman ki i ti pe rode sete pou tou dimoun vin egal, elimin labi,

anmenn plis transparans e promot demokrasi. Me malerezman an 2023 i pa sa ki nou'n vwar. Seselwa in perdi konfyans. O kontrer Prezidan e bann sef dan Gouvernman in devlop en larogans pouvwar kot zot pa oule okenn kritik. Tou sa ki zot fer i byen. Menm bann ki asiz o bor li i kontinyelman konplent ki zot nepli kapab koze.

Promes sanzman, sakouy pye e met larzan dan pos Seselwa. I reste zis sa en promes. Pou tou bann ki ti alor pe esper larzan dan zot pos, Prezidan in kareman anvoy tou dimoun merd. I ti pou rod pli bon *middlemen* pou fer desann pri lavi, in gannyen pli bon *middlemen* selman zot in met larzan dan pos son bann dalon. Dan plas fer desann pri lavi sa bann *middlemen* in fer *STC* fer gro profi lo ledò malere e benefis in al dan pos dalon Prezidan li menm. Se sa ki apel sanzman.

Nou ti ganny dir pou annan diversifikasyon ekonomik. Lavanniy, kannel e nouvo *SIB* ti pou promot loportinite biznes pou Seselwa. Tousala in vin bann *failure*, bann promes ki pa'n abouti dan naryen. Par kont i annan keksoz ki pe marse, sa ki ti mal dan lepase i *ok* pou fer ozordi.

Nou pe viv dan en Sesel kot si par lepase ti en

problenm ler bann Prezidan ti *travel* ozordi sa in vin en norm e in vin en pastan nasyonal pou Prezidan. 31 *travel* dan 31 mwan.

Ozordi *SNP/LDS* napa problenm avek larzan Arab, lontan nou ti ganny dir Gouvernman pe vann nou avek Arab. Ozordi *SNP/LDS* nepli annan problenm dan fer dalon ganny kontra atraver *State House*. Lontan nou ti ganny dir ki nepotizm pe ronz sa Gouvernman.

Nou pran legzanp bann drayver *taxi* ki bokou zot in plizyer lannen ede pou senm propagann pou sa parti ki o pouvwar, en bon pe zot in ganny kit ater. Byento zot pou vwar konpannyen *taxi* konmanse dan sa pei. Se sa konsekans vot pou en Gouvernman liberal. Se sa konsekans sanzman.

Loportinite biznes, later e *loan* in vin fasil pou bann ki annan kontak. Bokou zot ki *owner operator* zot prop pti biznes pe rankontre plis difikilte pou zot agrandi akòz anba en Gouvernman liberal se gro biznes ki konte. Pli pir ankor Gouvernman i de zour o lannmen deside antre an konpetisyon avek sekter prive zis pou donn zot bann dalon kontra.

En Gouvernman *US* an 2025 pou ranvers sa bann tandans. *US* i en parti

progresis. Nou krwar dan egalite loportinite. Me par kont Prezidan Ramkalawan li menm in dir nou ki pa nou tou ki egal dan nou pei. E ki apard lezot keksoz, li son saler i devret vin R230 mil.

Bann Minis i devret ganny par lao R100 mil. Zot a osi ganny gratwite lafen lannen san ki zot, zot a fer en *appraisal*. Par kont trezyenm mwan saler travayer i devret baze lo en *appraisal*.

Seselwa, mon dir zot la. Ler pou donn ou, ou pti larzan sa Gouvernman i rod tou leskiz. Ler pou pran tou sa ki pou li, napa problem. Sa kekyon lekel ki *appraise* gratwite lafen lannen Prezidan, sa nou pa kapab demande.

Ozordi resours leta i ganny servi dan lafason ki Prezidan e lezot politisyen i oule. Gaspiyaz e lekstravagans in vin en norm. Prezidan ki pou dir si ou devret ganny arete, li ki pou dir si ou devret ganny deporte. Akoz la i pa oule laverite sorti Ankour.

Li ki pou anvoy 50 gard ek solda arme avek AK47 pou vin aret en dirizan *United Seychelles* kot *Maison du Peuple*! Trenn sa boug Ankour zis pou anbaras li. Tousala nou konnen se li Prezidan ki pe donn lord.

### **MR SPEAKER**

Onorab. Onorab mon pa dakor, mon pa dakor. I pa ti mon lentansyon aret ou dan okenn fason. Dan okenn fason. Me ou pe fer en bann alegasyon lo zofisye Gouvernman, lo Prezidan ki mon pa vwar ki i zistifye.

*Sorry*, mon pa kapab, nou pa kapab vwar ki Lasanble i kapab tenir bann alegasyon ki pa zistifye. Silvouple, silvouple annou ganny sa deba avek en serten lord. Adres Bidze e evit bann alegasyon. Eskiz mwan pou deranz ou. Sertennman, eskiz mwan pou deranz ou. Me selman silvouple gard lord Lasanble. *Please*.

Onorab, *please* kontinyen.

### **HON SEBASTIEN PILLAY**

Mon kapab kontinyen?

### **MR SPEAKER**

Wi, me selman evit bann alegasyon ki pa dan lord Lasanble. Si ou annan en ka kont kondwit Prezidan oubyen zofisye, ou kapab anmenn en Mosyon lo sa size parey *Standing Order* i dir. Mersi.

### **HON SEBASTIEN PILLAY**

Mersi Mr Speaker.

Realite Mr Speaker dan nou pei. Mon koz koumsa, se akoz tou desizyon se Prezidan

li menm ki a la baz ki ganny pran.

Par egzanp, annou admet. Ler mon anvoy en Minis isi pou reponn en *PNQ*. Lekel ki donn lord e apre *konplent* poudir mon negativ. Lekel ki dir sa Minis pa reponn oubyen ale. E apre dir mwan mon negativ. I pa mwan ki'n al dan *rally* politik Praslin. Ki'n apel mon lekor Onorab *PNQ*. Se Prezidan Larepiblik li menm. Se Prezidan Larepiblik li menm ki mank respe pou son bann oponan politik.

Si li i pa kapab donn respe son bann oponan, akfer ki nou, nou pou donn li respe.

**(APPLAUSE)**

### **HON SEBASTIEN PILLAY**

Si li i pa kapab fer sa ki i devret fer. Akfer ki nou, nou pou fer parey li.

Mon mesaz pou Prezidan, Mr Speaker e mon ti konnen ozordi sa pou arive kot mon pou ganny arete. Mon pa pou al dan labou parey ou, mon ti kapab apel ou Prezidan Kanmaron me mon pa pou fer li.

Mr Speaker, ki nou konnen osi ki dan nouvel lo *SBC* fodre pas tou kwen program lo tro Gouvernman an premye. Prezidan parey mon'n dir, li i annan dwa maltret tou son kanmarad.

Servi tou kalite non e bann lenstans Konstitisyonnèl e legal, enkli ou menm Mr Speaker, ou pa fer naryen. Ou debout a kote li dan *rally* ler i pe maltret mwan. Ou vwar sa i *ok*. Eski sa i konportman ki nou espekte ek bann *leaders*.

Mr Speaker, ler pou atak *US* zot to zot pare, me ler pou get zot Gouvernman zot al lo *mute*. Par egzanp, nou'n ekrir Komisyon Eleksyon lo size ki *LDS* in kas en Lalwa. En nespes kouk kasyet i ganny zwe avek kan komisyon li menm in resevwar sa let ki nou'n anvoy kot li. E la mon oule enform Komisyon Eleksyon ki mon pe osi ekrir Komisyoner Lapolis e mon pe osi ekrir prokirer zeneral pou konmans en lanket dan sa zafer.

Tousala i ava montre enn fwa si sa komisyon i endepandan parey zot dir, oubyen i pe travay dan lentere la demokrasi, oubyen sa komisyon i anba kontrol Prezidan Larepiblik.

Mr Speaker, rezon mon'n komans mon diskour koumsa se aköz ou le kontrol laliberte lekspresyon dan sa pei ozordi.

Dan lepase sa Prezidan ti dir sa ki i anvi, kan i anvi e ki mannyer i anvi. Ki mannyer ozordi alors ki nou, nou pa kapab koze ler in ariv ler pou nou koze. Nou bezwen respe li, nou bezwen regard Mr

Prezidan. Be li i pa respe personn li. Serten aktivis LDS i menm annan plis pouvwar ki travayer servis piblik.

En DA i kapab ganny transfer, ganny met deor si zot konplent. Nou'n vwar let pe sirkile lo bann rezo sosyal.

Mr Speaker, tro bokou *public servant* pe ganny akize par lenkonpetans bann Minis. Tro souvan lenkonpetans sa bann Minis pe ganny plase lo sa bann travayer e *delivery* pe ganny afekte akòz se bann Minis zot menm ki pa pe kapab travay a la oter legzisans fonksyon ki zot in gannnen. Se sa problem ki nou annan ozordi. E se sa dezapwentman.

Sa lenkonpetans i fer ki Gouvènmman i kontinyelman sanz son bann desizyon, i anmenn bokou lensertitid. Lanvironnman biznes i favoriz bann gro lenvestiser e sirtou bann ki etranze e zot, zot pas atraver *State House*. Apre tou ler ou vwar nimero 1 e nimero 2.

La mon pa pe fer alegasyon. Ler ou vwar nimero 1 e nimero 2 pe eksplik en proze prive lo televizyon nasyonal ou kapab konpran ki pe pase. E la ziska ozordi, Minister Finans pa kapab donn nou okenn dokiman kler lo ki mannyer bann peyman pou sa proze semen *west coast* pe ganny fer.

Mr Speaker, mon pe eksprim lakoler ki lamazorite Seselwa i annan. Nou pe viv dan en Sesel kot Gouvènmman pe sey manipul larealite. En zour nou ganny dir lekonomi pe fer sitan byen me en lot zour Gouvènmman i ale i pran en *Treasury Bond* lavalè R75 milyon.

Larzan ki ti dan fon COVID in ganny depanse, me selman nou pa vwar bann dokiman kler ki montre latransparans dan lafason ki sa bann larzan in ganny depanse. La nou oule dir klerman ki sa R101 milyon ki sipoze pou sa larzan semen *west coast* i annan loder koripsyon ladan. Zis parey pou *Travizory*. Tou sa ki sa Minister i touse i annan loder koripsyon.

Sa Gouvènmman in vin egzakteman sa ki i ti kritike dan lepase. En Gouvènmman koronpi. E la mon bann frer ek ser rapel byen ler US ti vot kont sanzman dan Lalwa deklar *assets* pou bann politisyen li LDS i ti sipòte. Zot in fer li posib pou kasyet zot byen lo zot fanm e zot piti. Me par kont ou ki pe rod *welfare* zot kapab fouy dan tou sa ki ou annan avan ou ganny menm en pti mwènza. Se sa realite sanzman.

Seselwa alor Mr Speaker, i annan tou rezon dezapwente avek sa Bidze ki Minis Hassan

in prezante avek nou. Minis Hassan pa'n a la oter sa lekspektasyon ki sa pep ti annan dan sa prezantasyon Bidze. I pa'n a la oter legzizans ki sa Lasanble i demande anver lenformasyon ki i devret pe donn nou an sa ki konsern prezantasyon sa Bidze.

Sa ki nou'n tande se vreman en Gouvernman dezespere, en Gouvernman fatigue.

**(APPLAUSE)**

**HON SEBASTIEN PILLAY**

Mr Speaker, mon salye bann vre ero sa pei. Se sa. Se mon bann frer e ser Seselwa ki pe travay dir pou kontribye pou fer avanse nou pei. E mon ti ava swete ki Minis ti'n ava fer parey dan plas vin felisit son lekorek son Gouvernman.

Larealite Mr Speaker, se ki nou en pep ki fantastik e nou viv dan en pei ki beni. Me malerezman nou annan en move Gouvernman.

**(APPLAUSE)**

**HON SEBASTIEN PILLAY**

Dan plas ankouraz sa pep e enspir zot, Minis Finans i vin tap lanmen lo lestoman e koz lo sa ki son Gouvernman in fer. Wi sa bann teknisyen i travay e toultan nou konnen zot in travay. Me zot sa bann nouvo sef, zot osi zot devret

travay. Zot osi zot devret aret donn lord. E zot osi zot devret aret taye ler in ariv ler pou reponn kestyon dan Lasanble Nasyonal.

**(APPLAUSE)**

**HON SEBASTIEN PILLAY**

Mr Speaker, dapre Minis, zot in evit en katastrof. Fotespere la ou pa pran lakoler avek mwan ler mon dir ki Seselwa dan son gran mazorite pe dir ki le sel katastrof se sa Prezidan ki ozordi i *State House*. Minis, ki mannyer ou kapab koz lo zot Gouvernman?

**MR SPEAKER**

Onorab, mon'n deza donn ou en *warning*. Mon pe dir ou, ou bezwen annan en pe respe. E respe i enkli pou sa Minis ki la. Silvouple annan en pe kourtwazi. Mon pa krwar. Mon pa krwar i byen pou ou fer bann alegasyon kont Minis oubyen kont Prezidan. Se sa ki mon'n dir. Mersi.

**HON SEBASTIEN PILLAY**

Eski Prezidan, ti pe donn respe Onorab Loze ler i ti apel li Onorab Kakayonyont lo *stage*?

**MR SPEAKER**

En lot keksoz mon a dir ou, mon pa enterese avek bann keksoz ki'n pase an deor sa Lasanble. Mersi.

**HON SEBASTIEN PILLAY**

I byen, i byen. Nou kontan tande.

Mr Speaker, nou demande ki mannyer Minis i kapab koz lo leve debrouye kan Gouvernman in sistematikman detri leve debrouye dan sa pei. Kekfwa Minis pe konfiz leve debrouye avek gro biznes.

Annou al la deor e demann bann pti biznesmenn ki ti reelman pe fer leve debrouye ki zot panse lo sa Gouvernman e mon asi ou Mr Speaker, larepons ki nou pou gannyen pa pou en bon larepons ki ou Gouvernman pou kontan.

Mr Speaker, nou lendistri touris i dan mal. Lakantite *cancellation* ki bann lotel pe gannyen i kontinyelman ogmante. Lendistri lapas i ankor kot i ete. Alors oli sa lekonomi ki Minis pe dir nou swadizan pe fer sitan byen.

Si mezir lefikasite sa Gouvernman i sa bidze ki sa Minis pou finans in prezant devan nou Lasanble, pep Seselwa nou dan en gran problem. Ou ganny en Minis ki pa ankor ni menm delivre lo son bann promes 2023, i retournen 2024 re promet ankor menm zafer e azout ankor lo la. Bidze 2023 ti sipoze en bidze ki'n byen

bennyen, byen pize. Ti sipoze pli bon Bidze.

Kestyon, aköz sa pli bon bidze pa'n fouti akonplir preski tou keksoz ki i ti met ladan.

Mr Speaker, *United Seychelles* ti vremen dezapwente avek sa kalite move planifikasyon e nou tre konsernen ki sa Gouvernman *LDS* si i kontinyen lo sa traze ki in pran pou fer domaz ireparab dan nou pei.

Gouvernman Mr Speaker. Gouvernman ti'n devret sezi loportinite ki sa enn Bidze in reprezante pou adres bann inegalite e defayans ki nou pei e nou pep pe fas avek. Plito, ki nou'n vwar, se en lot Bidze ranpli ek en bann gro sif ki nou pa krwar parey lannen pase dan en fason reel pou adres problem ki nou pep pe fer fas avek.

Mr Speaker, tro bokou larzan dan konstri isi, konstri laba kan lamazorite sa ki nou ti pou konstri lannen pase nou pa ankor kapab fer.

**(APPLAUSE)**

**HON SEBASTIEN PILLAY**

Proze 2023 en bann aprezan ki pe al lo *tender*. En bann i ankor lo *tender*. Larzan pe ganny mete dan *suspense account*. Mr Speaker, sa i inakseptab.

Nou'n ganny en diskour bidze ki pa'n fer okenn lanaliz lo sa bann promes ki Minis ti fer. O kontrer nou'n ganny en bidze 2024 baze lo mansonz. Par egzanp, konbyen lakaz Gouvernman *LDS* in reelman fer si nou pa kont bann proze 24/24 ki ti komanse par Gouvernman *US*? I paret tou sa bann proze i lo zis *computer* Minis Ramgasamy.

Problenm avek sa Gouvernman se ki zot pa respe sa Lasanble e zot pa respe pep Seselwa. E *as long* ki i pa respe pep Seselwa, mon -pou - *remind*- li - dan -sa Lasanble.

**(APPLAUSE)**

**HON SEBASTIEN PILLAY**

An 2023 Gouvernman ti demann Lasanble pou aprouv en bidze pres R10.5 bilyon. Bidze i ganny finanse par reveni ki nou anmase. Sa letan nou ti sipoze anmas 10.6 bilyon, ladan 9.2 bilyon dan taks. Se sa larzan ki Gouvernman i bezwen servi pou finans Bidze.

Ki nou'n vwar? Bidze, Minis pa pe dir nou. Eski in fini an defisit? Nou pa'n anmase 10.6 bilyon e Minis pa'n dir nou, lo sa 9.2 bilyon nou'n kapab anmas zis R8.4 bilyon. Savedir i pres R800 milyon lannen pase nou pa'n anmase. Alors, ki mannier

alors ki Bidze 2023 i vin en sikse.

An plis ki sa nou'n vwar atraver bidze siplemanter plizyer donasyon pa ti materyalize. Klinik Anse Royale, Klinik Baie Lazar pa ti ganny fer. Proze Manmelles pa ti pe ganny fer. E tou le lannen nou fer bann *book entry*, nou met dan bidze.

Kestyon Mr Speaker. Kestyon fondamantal se konbyen larzan ki'n reelman ganny depanse dan ledikasyon, dan lasante, dan *welfare*, dan sa bann proze. Tousala zanmen nou pou konnen. Pour le senp rezon ki Gouvernman *LDS* pa pou zanmen dir nou laverite.

Aprezan Mr Speaker, an 2024 Gouvernman i vin rod 10.64 bilyon, sa fwa si i dir nou i pou anmas 9.1 bilyon dan taks. *Ok*, i byen. Selman i dir nou sityasyon dan lemonn pa tro, tro bon. Lager dan mwayen oriyan pou afekte tourizm, Israel e Lerop osi nou marse prensipal pou ganny afekte.

Be ki mannier ou kapab anmas tou sa reveni, si ou pe prozekte en ralanti dan lekonomi. An 2023 ti napa lager, ou pa'n kapab anmas 9.2 bilyon, me an 2024 avek lager, avek lensertitid, avek problenm e lekonomi lemonn ki pe ralanti ou pou al anmas 9.1 bilyon?



Mr Speaker, kestyon se kote ou pou pe al tir sa bann larzan ki ou pe dir nou? Tro bokou keksoz pa pe aziste. Alors ler Minis i dir nou ki se Gouvernman LDS ki'n tir nou dan katastrof, pep Seselwa mon dakor avek zot. Sel katastrof se sa ki nou annan *State House*. Mersi.

Kestyon ankore pou Gouvernman, se ki mannyer ou pou anmas plis taks ler ou ankouraz bann zwe dalon e donn kontra sa ki ou byen avek? Dan plas kree plis biznes ou pe donn serten dimoun tou loportinite pou benefisye, pey mwens taks larestan ou takse zot san pitye. I malere mon bann frer ek ser dan sekter prive, me sa Gouvernman napa en sou plan pou met divan anba zot lezel.

Nou dan en sityasyon tre enkyetan, person pa kapab dir nou vreman ki mannyer lekonmi pe performen. Si nou napa problem akoz nou bezwen al rod prete R75 milyon *treasury bond*? Selman nou'n sipoze fer en sirplis. *United Seychelles* pa kapab aksepte sa bann baz polisi ki Gouvernman pe prezant bidze lo la. I annan lenformasyon ki Gouvernman pa oule donn nou. I annan keksoz ki pe ganny kasyet. Sa kalite lapros i tre iresponsab e US i kondann sa kalite zwe sal pou

kasyet lenformasyon lo nou lekonmi.

Ozordi LDS in finalman admet ki nou annan en kriz sosyal. Nou vwar sa alor in anmenn en logmantasyon dan bidze e benefis e *welfare*. Me ki LDS ti dir nou an 2020?

An 2021, an 2022, an 2023? Pa zot ti dir nou ki US ti ogmant bidze *welfare* sak fwa eleksyon e fer pei faid. Be nou annan eleksyon 2025, zot LDS la, zot pa pe ogmant *welfare* pou fer pei pa faid, zot pa pe ogmant *welfare* pou met dan eleksyon?

Mr Speaker ou vwar? Ou vwar mon bann frer ek ser. Sa Gouvernman i zis rabase. Apre ki in denigre ou ki ti vin rod en lasistans lannen pase e dekrir ou konman en parazit ozordi i vire e dir nou annan en kriz nasyonal.

Ler mon ekout Minis koz lo sa ki pli vilnerab e bezwen led, mon bezwen riye Mr Speaker. Eski ou konnen ki en dimoun ki pe rod led i pas ladan si i pa al vwar politisyen? Lekel ki pe servi *welfare* pou kontrol dimoun ozordi? Sa Gouvernman LDS li menm. En Gouvernman intellectually *spent*! En Gouvernman fatigue. E tou sa ki zot ti akiz zot kanmarad pou fer ozordi, se zot ki pe fer.

E sa i soulev en lot kontradiksyon Mr Speaker.

Zot Minis Lanplwa ki nou'n donn li R90 milyon lannen prosenn, dapre li lakantite dimoun ki pa dan lanplwa Sesel in desann. *Unemployment has gone down* Minis ti dir nou. Me si *unemployment has gone down* akfer nou bezwen plis *welfare*?

Mon ti ava ekspekte ki avek R90 milyon nou ti ava kapab ganny en pli bon lanaliz. Ki nou ti a kapab konpran. Me tousala se bann bat latet e Seselwa la deor i fristre avek en Gouvernman ki pa konnen kote i pe ale.

Mon osi swete pou sa Minis Lanplwa, ki avek sa bidze ki nou pe donn li i a fer plis zefor pou get dan *welfare* travayer e aret les li ganny kontrole par lezot departman.

Mon fer en pledwari ki sa logmantasyon ki zot dir zot pou donner, sa i al pou sa bann ki vilnerab. Fer sir ki sa *semi-orphan* i gannyen.

Sa madanm Digwa, mon pou koz lo la en pti moman, ki pou vin ganny baba Mahe. *Foster care*, fer sir ki sa bann dimoun i ganny sa larzan. Pa al met en bann birokrasi ki fer sa bann dimoun fristre ler zot vin rod lasistans.

Me selman Mr Speaker, la mon vwar en keksoz drol konsernan sa zafer bann madanm Digwa. Mon annan la en *press release*, *State*

*House* ki pe felisit en madanm Digwa ki'n ganny son baba dan lopital *St Mary's La Digue*.

Me i enteresan Mr Speaker. Minis i vin met R5000 dan Bidze pou bann manman Digwa ki pou vin ganny baba La Digue. Prezidan i dir bann manman Digwa i kapab ganny baba La Digue, i felisit zot.

Konmsi mon ti a kontan ganny en konpran Mr Speaker. Mon ti a kontan ganny en konpran egzakteman ki plan Gouvernman an relasyon avek sa bann larzan ki zot pe met dan Bidze.

Mr Speaker, Prezidan ti fek dir nou ki nou annan en *state of the art maternity* La Digue. Annefe nou annan *press release* kot i pe felisit sa manman. Me si ou ti krwar nou annan en *state of the art facility*, pour ki rezon ki ou pe met bann larzan dan Bidze. Si non, pou pa fer bann *book entry*. Si non pa pou zis *inflate* Bidze ou si non pou bann lezot *purpose* ki zis ou ki konnen.

Me mwan mon vwar sa ki pli trakasan Minis pa'n mansyonn ditou en kous dimoun ki tre enportan e tre vilnerab ozordi. E sa se bann dimoun aze. Mon ti ava ekspekte ki zot ti ava'n propoz en logmantasyon dan Sekirite

Sosyal prenan kont ki Gouvernman in donn sa logmantasyon 10 pousan. Pourtan an 2020, e la mon konnen zot pou fer problem ek mwan ankor. Ler Prezidan Ramkalawan ti pe rod vot avek nou bann vyeyar i ti promet zot en logmantasyon ziska R10 mil.

Ozordi LDS pa oule nou koz lo la. Avek sa pti Sekirite Sosyal ki nou bann vyeyar nepli kapab viv an dinyite, eski nou pa krwar in ler pou donn zot en logmantasyon. Si reelman Gouvernman ti'n ekout dimoun dan bann distrik parey Minis in dir, i ti ava realize ki plizyer dimoun aze i depans plis ki 2000 lo transport ek latizann tou le mwan.

An 2025 en Gouvernman US pou ogmante sa Sekirite Sosyal e nou pou permet bann dimoun aze viv an dinyite.

Mr Speaker, ler ou tande ki STC in fer gro profi e ler Seselwa pe plenmy pri lavi Prezidan ek son bann dalon kot STC pe selebre profi. Mr Speaker, ou annan en problem. Wi i annan nouvo *middlemen*. Me eski sa *middlemen* pa ti sipoze ede fer desann pri kot STC.

E kestyon ki Seselwa i devret pe demande, se eski sa ki zot in vwar. Tousala i demontre dekoneksyon ki sa

Gouvernman i annan avek sa ki pe pase.

Ler nou eksplor lezot eleman sa bidze nou vwar kot Gouvernman pa pe ekout Seselwa oubyen dir nou laverite. Dapre Minis, sekter lasante, sekter ledikasyon i sa de pli gro sonm dan bidze. En total SR1.41 bilyon pou lasante e SR1.40 bilyon pou ledikasyon. I byen. Sa i reprezant 13.3 pousan e 13.1 pousan respektivman bidze. Sa osi i byen.

Me pran par egzantp Minister Lasante, *Public Health Authority, Health Care Agency* ki pe ganny en bidze ansanm an konbinezon apepre i R1.3 bilyon. Mon ti ava swete ki sa i ede adres *scheme of service* bann sanniter, travayer laboratwar, *dental assistant, health care assistant* e lezot.

Me kontrerman avek sa ki Minis Lasante in dir dan Lasanble, Minis pour Finans pa'n anons okenn sanzman pou bann *schemes of service* dan Minister Lasante. Ki novo planifikasyon Gouvernman i annan, mon pa ganny en konpran.

Eski Minis Lasante in ankor enn fwa *mislead* Lasanble? Minis ti dir nou ki an 2024 zot pou adres bann defayans dan sa bann *scheme*. Minis nou pou *hold* ou *accountable* pou sa *statement*

ki ou ti fer. Antretan bann dokter ki ti sipoze ganny zot let pou zot logmantasyon pa ankòr ganny zot let e zot ankòr pe espere.

Nou swete ki ler nou kestyonn Minis pour Lasante, Mr Speaker pa ava rod fason pou anpes nou fer nou travay. Nou pou osi esper sa nouvo *MRI* ki sipoze ganny met an plas, e nou swete vwar rekritman bann spesyalis. Tro bokou dimoun pe esper apwentman pou tro bokou letan.

Partou kot ou gete, sa bidze ou vwar linefikasite. En lafatig sa Gouvernman. Ledikasyon in ganny en bidze 1.4 bilyon. En ta larzan dan lenfrastriktir, me oli larzan dan son resours imen. Konbyen larzan pe ganny mete pou en nouvo *scheme of service* pou bann *teachers*?

Sa ki nou'n tande i reprezant en dezapwentman. Minister Ledikasyon i fer fas avek tro bokou lenterferans politik konstaman. Minis ti promet pou donn Lasanble lenformasyon lo sant vokasyonnel Perseverance, Mr Speaker, oli lenformasyon. Ziska ozordi nou pa konnen ki pe pase.

Minis pour Ledikasyon ti fer en *commitment* ek sa Lasanble, ki rezilta pou bezwen amelyore. Nou konman Lasanble Nasyonal

nou bezwen *hold* li *accountable*. Rezilta i la baz pou evalye performans sa Minister vizavi Bidze ki nou pe donn li.

Par kont en lo Minister ki li i pa mars lo rezilta se Minister Sport.

Aprè fyasko larzan meday e larzan *childminding* Minis Sport in vin ek son nouvo plan. I pe al aranz tou lenfrastriktir pou *CJSOI*. Mon ti krwar in fini aranze, akòz sak fwa i vin Lasanble i dir nou i pe travay. I pe aranz sa bann lenfrastriktir, oubyen i ti ankòr pe fer plan.

Ou ti annan rezon dir ki nou per. Wi, nou per ki ou pe sistematikman detri *sports* dan nou pei. Dan plas met plis lenvestisman dan ou dimoun, ou met plis lenvestisman dan lenfrastriktir avek bi ki ou pou fer pli byen. Mon swete ki sa plis ki R48 milyon i anmenn meyer rezilta ki sa ki nou'n vwar dan Zwe de Zil.

Me problemm Mr Speaker, se ki *management* sa Minister pa alaoter. Sa portfolio antye pa pe marse.

Nou ti vwar Minis zistifye bann lannen pase. Pran R1000 lo larzan bann dimoun ki dan *home* pou fer reparasyon lo bann *home*. Ozordi Minis pou Finans i konfirmen ki i pe donn larzan pou fer reparasyon lo bann *home*. Ki pou arive ek larzan

Si *LDS* atraver son bann aksyon pa ti sistematikman demantibil tou *le* zefor par Gouvènmman *US* pou fer sant reabilitasyon, ozordi Mr Speaker, nou- pa - ti- pou- dan-sa-probleman-ki-nou-ladan-ozordi.

**(APPLAUSE)**

**HON SEBASTIEN PILLAY**

Sa Bidze i annan en pe de tou Mr Speaker. I menm annan sa ki nou apel bann mister. Akoz par egzanp i annan en departman ki li son bidze ou pa vreman konnen konbyen i annan ki pe ganny depanse anba la.

Lazans lenfrastruktir ti sipoze ganny R151 milyon. Me selman i le tanter tou lezot bidze ki'n ganny trouve dan bann *suspense accounts*. Personn pa odit sa bann *suspense account* apard ki Minis Finans.

Personn pa konnen ki pase dan sa bann *suspense accounts* apard ki Minis Finans avek bann *threshold* pou *procurement* ki'n sanze. Mon pa konnen si faver pe ganny fer oubyen faver pe ganny donner pou dalon ganny plizyer poz.

En lot kestyon ki sa i souleve se ki sa gran lanfaz ki pe ganny mete lo bann proze kapital i riske anmenn logmantasyon dan pri pou materyo konstriksyon. Plis demann pou fer monte pri materyo konstriksyon, son rezilta kou konstriksyon pou osi monte.

Pou ou sa Seselwa ki pe ekoute ozordi bomaten, regard

byen lekel bann konpannye ki pou pli benefisye.

2025 Mr Speaker, en Gouvernman US pou fer sir ki nou regard e ladan e nou *investigate* tou sa bann keksoz.

**(APPLAUSE)**

**HON SEBASTIEN PILLAY**

Mr Speaker, *LDS* i oule depans plis ki R1.4 bilyon anba bidze kapital an 2024. Selman an 2023 i pa'n kapab fini depans sa plis 1.2 bilyon nou ti donn li. Lefe ki nou pe angaz nou pou al depans sa kantite larzan i montre ou ki degre dezespere sa Gouvernman in vini pou prouv ek pep Seselwa in akonpli serten keksoz.

Sa depans dan bidze kapital ti pou kapab ganny pli byen redistribye. Par egzanp si nou redwir sa bann gran depans e nou koup lekstravagans nou pou ganny ase larzan pou revwar laz Sekirite Sosyal.

I annan serten size ki nou pa'n tann koz lo la ditou sa lannen. Nou pa'n tann naryen lo koripsyon e sa bann etranze ki nou pe lwe bann gro, gro lakaz pou zot *Eden Island*?

La Gouvernman pe propoz en bidze R75 milyon pou Komisyon Anti Koripsyon. Annefe diskour Minis pa mansyonn en fwa sa mo

koripsyon. Sa ki nou konnen ozordi, koripsyon pe ronz nou Gouvernman.

Pandan sa dernyen detrwa lannen nou'n donn bokou larzan sa komisyon. Lekel ki nou pe lwe sa bann lakaz avek? Konbyen larzan nou pe donn sa bann etranze e ki rezilta ki nou pe gannnen.

Eski nou pe vote ki sa ta milyon i al dan pos serten endividi. Nou i a kontan konnen.

Mr Speaker, si nou pou kestyon R2000 *part rental*, nou devret osi kapab kestyon R50mil ki nou pe peye pou lwe lakaz pou en etranze sorti deor.

**(APPLAUSE)**

### **HON SEBASTIEN PILLAY**

Pa bliye ki sa i lo rikord Lasanble. LDS ti demann *Air Seychelles* pou aret lwe lakaz *Eden Island*. Me ozordi parey labitid, sa in vin ok. Tou sa ki pa ti bon dan lepase in bon pou zot ozordi. Enkrwayab !

Mr Speaker, mon pa krwar ki sa ki Minis Hassan i serye ler i koz poursantaz bidze ki pe al ver saler pou bann travayer Gouvernman. Rezon pou sa se aköz i annan en dekoneksyon ant sa ki Minis pe dir e larealite. Lannen pase Gouvernman pa ti'n fini fer *recruitment* e ti fer *saving* dan trezyenm mwan.

Sa i reprezant en kontradiksyon avek sa ki Minis pe dir nou. Parmi bann Minister ki ti *fail* pou *recruit*. Ekout byen Mr Speaker. parmi bann Minister ki ti *fail* pou *recruit*, ti enkli Minister Ledikasyon. Ki vire e dir nou i annan en mankman *teachers*. Eski sa i apel lefikasite? Pou mwan sa pa fer sans. Nou mank *teachers* me selman nou *fail* pou *recruit*.

Aksyon Gouvernman pa demontre sa lenportans ki Minis Hassan i oule mete oubyen i le fer nou krwar Gouvernman pe mete lo saler e kondisyon travay pou bann travayer dan servis piblik.

Mr Speaker, pli boner mon ti dir ki Gouvernman ti'n merit sezi loportinite pou servi sa Bidze pou adres serten defayans. Mon ti'n ava ekspekte ki Minis ti ava servi sa lespas fiskal dan plas al angaz li dan en bidze kapital sitan anbisye. I ti ava adres *long service allowance* bann dimoun ki ti pou *due* sa lannen. Me parey labitid sa Gouvernman i annan en diferan priyorite.

En lot keksoz ki pa'n priyorite pou Minis, se ki pou arive avek bann travayer parastatal lo sa size 10 poursan logmantasyon. Eski tou dimoun pou gannnen oubyen pa pou gannnen. Gouvernman i paret pa

enterese avek sor sa group travayer. *Shame*, Mr Speaker.

*Me US* li i pou debout akote nou bann frer ek ser dan *PUC*, dan *Air Seychelles* e lezot parastatal. Nou pou asire ki zot osi zot benefisye avek sa ki Gouvernman pe propoze.

**(APPLAUSE)**

### **HON SEBASTIEN PILLAY**

E la, mon osi swete ki an sa ki konsern *IOT*, enn fwa pour tou nou adres sa size trezyenm mwan bann travayer Seselwa ki travay laba. Lefe ki ankor enn fwa Minis Hassan pa'n koz lo la se aköz sa pa vreman en priyorite son Gouvernman. E sak fwa sa size i monte, la ki nou taye pou nou al adres li.

Mr Speaker, mon napa dout ki i annan bann dalon e zanmi bann dalon ki pe benefisye avek lafason ki Gouvernman pe depans larzan ozordi.

Lamazorite Seselwa in realize ki sel opsyon pou Sesel se en Gouvernman *United Seychelles* ki ava reprezant vre laspirasyon pou nou pep la deor.

**(APPLAUSE)**

### **HON SEBASTIEN PILLAY**

En Gouvernman ki ava konekte ek son pep. Me malerezman sa Gouvernman *LDS* ki la o pouvwar in bliye ki

savedir konekte ek son pep. Nou ankor pe ganny bann bidze baze lo bann baz ekonomik ki pa fonde, avek lekspektasyon ki nou pa pou kapab zwenn. Sa pou anmenn soufrans pou bann ki pli bezwen led ozordi. Sa lefikasite dan servis piblik ki Minis in koz lo la pa pou zanmen arive *as long* ki menm Prezidan i *micro manage* tou keksoz.

Li menm in admet i al kot *MLUH* e donn lord lo ki desizyon pou pran lo *file* dimoun. Li menm ki fer desizyon pou met dimoun deor. I pa akseptab Mr Speaker, pou Prezidan *threaten* travayer servis piblik dan son *rally* politik. E la mon dir i pa akseptab.

**(APPLAUSE)**

### **HON SEBASTIEN PILLAY**

Menm si ou'n dir nou ki sa ki pas an deor se nou Lasanble ki bezwen *hold* li *accountable* pou sa ki i dir. E mwan mon pa per e mon pou fer li. Annefe Prezidan in vin Sef Egzekitiv e in melanz politik partou dan son travay e i inakseptab koman sef servis piblik.

Gouvernman *LDS* i bezwen pran responsabilite pou son aksyon. Son aksyon lepase ki'n anmenn sa move fonksyonman dan Gouvernman. Se li ki'n



ankouraz travayer pou pa efikas. Se li ki'n ankouraz travayer pou kasyet *file*, pou fer fristre dimoun. Ozordi aköz i blanmen ler zot fer egzakteman sa ki in montre zot fer.

Mon oule note Mr Speaker, ki ler Minis i vin felisit *IECD*, i byen. E nou, nou kontan *US*, aköz nou'n toultan krwar dan *IECD*.

Me sa ki i devret realize se ki si pa ti nou, son Prezidan an 2018 e 2019 ti *threaten* pou pa vote lo en bidze *IECD*.

**(APPLAUSE)**

### **HON SEBASTIEN PILLAY**

Menm zafer pou Departman Lekonomi Ble. Ozordi Minis Ferrari i vwar litilite sa departman, me an 2018 ti pe demande akfer annan en departman lekonomi ble. Larealite mon bann frer ek ser, tou bann aksyon a sa Prezidan ek son parti sete pou fer malis oubyen detri bann endividi ki zot pa kontan.

Mon bann frer ek ser Seselwa, *LDS* napa en plan pou Sesel e i napa en plan pou ou. Sa parti i konsider son lekor par lao tou dimoun, serten group dan nou sosyete. Larogans pouvwar dan tou son splander. *Carers*, *cleaners* i ganny maltrete ziska par Prezidan resaman.

Dan plas remersye sa group dimoun ki malgre zot sironstans zot in travay tre dir pou amelyor kondisyon lavi zot fanmir. Ler ou, ou ti pe *burn the midnight oil*, ti annan en dimoun ki ti pe netwaye pou fer sir sa biro kot ou pe al travay i prop aswar. I vre sa ki sanson i dir, dibyen in mor e in antere.

Sa bidze ki Minis in prezante i enn ki pou diviz nou pep plis ankor lo en baz sosyal. Dan plas sey *bridge the gap*, Gouvernman pou fer sa *gap* elarzi plis ankor. E ler son bann prozeksyon reveni pou tonm dan delo i pou rod en lot leskiz pou blanm tou dimoun apard ki son lekor pou son linefikasite.

Mr Speaker, sa letan kot zis zot ti balans nenport kwa avek Seselwa e ekspekte ki Seselwa i in fini. Dimoun i vwar byen kler. Mon oule anvoy en mesaz pou Gouvernman e Prezidan larepublik. Sesel pe bite moralman e sa an gran parti i aköz ou Gouvernman i inefikas.

Kriminalite e labi sibstans in debord *border* e dan plas vin dir ek nou ou annan lalis bann droger, aret koze e al adres sa bann problem.

Ou koz tro b kou Mr Prezidan. Tou sa ki *US* ti predir pou arive in arive, me

lefe ki ou ek ou Gouvernman pa'n oule ekoute, ou'n met sa pei en kantite retar.

*United Seychelles* pou reste *fearless in dignity* akote pep Seselwa.

**(APPLAUSE)**

**HON SEBASTIEN PILLAY**

Nou pou kontinyen lite ki sak Seselwa pe enport ou laz, ou sityasyon ekonomik, ou lapartenans politik ou kapab viv dan dinyite.

A sa pwen Mr Speaker, nou demande e nou egzize ki dan sa Lasanble Nasyonal nou ganny sans zwe nou rol konman manm sa lenstitisyon e *keep this Government accountable*.

Nou devret kapab fer sa bann Minis dan Gouvernman *accountable* pou zot bann desizyon e fer zot et alaoter sa konfyans ki pep Seselwa in met dan zot san ki nou bezwen proteste, san ki nou bezwen fer *walk out*.

Pou zot mon bann frer ek ser, dan lavi personn pa pou desid ou desten apard ou prop lekor. Mazinen ki tou eleksyon i annan son konsekans. Mon konvenki ki 2025 zot pou fer en meyer swa e sa se pou tir sa Gouvernman *LDS* o pouvwar.

**(APPLAUSE)**

**HON SEBASTIEN PILLAY**

Mr Speaker, mon pa konnen si mon kler vwayan ler mon ti pe ekrir sa ki mon pe ekrir. Me mon'n dir li dan sa fason. Mon tann serten zot pe riye dan sa Lasanble, i byen alor. Si zot anvi en eleksyon, aköz zot pa sey nou en kou ? E si zot krwar nou sitan fay. Si zot krwar nou sitan fay, *call* en eleksyon lannen prosen nou a konn nou grander nou tou.

**(APPLAUSE)**

**HON SEBASTIEN PILLAY**

Mersi Mr Speaker.

**(APPLAUSE)**

*Standing Ovation*

**MR SPEAKER**

Bon, mon aprezan donn laparol Leader Biznes Gouvernman dan Lasanble, Onorab Bernard Georges. Laparol.

**HON BERNARD GEORGES**

Mersi Mr Speaker. Bonzour Mr Speaker. Bonzour Minis, bonzour tou bann koleg Onorab dan Lasanble, tou dimoun ki pe swiv nou dan lakour e nou bann viziter dan Galeri.

Mr Speaker, mon *full* dakor avek dernyen parol Onorab *Leader* Lopoizisyon bomaten. An 2025 nou pou fer

en meyer swa, wi. Safwasi nou pou pran tou le 26 distrik.

**(APPLAUSE)**

**HON BERNARD GEORGES**

Akoz si sa se en repons Bidze ki nou fek tande bomaten, i kler ki zot, zot pa pou vwar *State House* ankor zanmen dan zot lavi.

**(APPLAUSE)**

**HON BERNARD GEORGES**

Mr Speaker, anmezir ki mon ti pe ekri repons diskour Minis Finans lo Bidze 2024 Vandredi pase, mon ti mazin en zistwar ki mon'n deza dir dan sa Lasanble. Kot mon ti vwar dan en dokimanter lo Prezidan Obama. Son bann *speech-writer* ti pe koz antre zot.

Zot ti pe diskrit en *speech* ki zot ti pe ekrir pou Prezidan Obama e apre en serten letan, enn zot in lev e avek en serten fristrasyon in demann son bann kole. 'Ki mannyer ou kapab ekrir en *speech* pou en zonn ki ekri pli bon *speech* ki sa enn ki ou pe sey ekrir pou li ?'

Dan sa repons mon'n annan menm santiman. Mon'n deza dekrir Minis Hassan konman en *blessing* ki Sesel in gannnen. En dimoun ki politikman i sorti *from nowhere* pou pran sarz lekonmi nou pei dan sa ki li

menm li in dekrir dan son diskour koman moman pli difisil ki Sesel in zanmen fer fas avek.

**(APPLAUSE)**

**HON BERNARD GEORGES**

I pa pou fer okenn sans bomaten pou mwan zis repet sa ki Minis in deza dir nou, aköz mon pa pou kapab fer sa pli byen ki li in fer. Mon pou plito konsantre lo met sa Bidze dan konteks lakonplisman ladministrasyon Ramkalawan, pandan sa 3 dernyen lannen e regarde kote sa ki nou'n akonpli pou amenn nou dan sa peryod ki reste avan prosen eleksyon.

Se sa lanaliz mon krwar ki pou met kler devan Seselwa aköz ki nou tou nou'n fer en bon desizyon le 24 Oktob 2020, e aköz sa pou ganny repete an 2025 ankor.

E ozordi mon anvi konmans lo en not pozitiv. Mon anvi konmans kot Minis in terminen Vandredi. E sa se par remersye Minis ek son tim zenn profesyonnel dan Minister Finans, pou zot travay ek zot devouman.

Pou zot langazman avek priyorite pei e *agenda* sa ladministrasyon;

Pou zot lesey pou satisfere tou kous nou popilasyon, pou zot rezilyans dan bann moman difisil ;

Pou zot kapasite pou fer de bout zwenn, pou zot determinasyon pou mannevre dan en sityasyon difisil zeopolitikman ;

Pou zot lapresyasyon ki en Bidze se pa en legzersis teorik, me enn kot sak desizyon ki zot pran i pou afekte en dimoun;

Pou zot kapasite pou kit tou sa boul dan lezer alafwa ;

Pou bann long zour e kourt lannwit kot zot in travay lo sa Bidze, pou zot travay pou fer antre tou pti sou dan kof Gouvernman e fer sir ki sak sou i ganny depanse kot i fodre;

Pou zot kapasite pou fer tousala san regard zot politik, ouswa zot prop benefis, me pou rod byennet Seselwa an premye.

Pou tousala, mon oule konmans mon repons bomaten avek trwa pti mo Mr Speaker. Mersi, mersi, mersi.

**(APPLAUSE)**

**HON BERNARD GEORGES**

Sesel fek fet 3an ki ladministrasyon LDS in pran sarz nou zoli pei. Nou parti LDS in selebre sa lokazyon dan lape e respe. 2 Dimans pase lo laplenn Politeknik Anse Royale e sanmdi pase Baie Ste Anne Praslin. San okenn lensidan, san okenn kalonmni, san okenn bato ki ti bezwen

dekoste ek lasose pou evit en lensidan arive.

Nou'n selebre an konesans ki konman en Gouvernman nou la pou asire ki Sesel i pou tou son zanfane ki tou zanfane Sesel i bezwen annan en par dan sa pei.

Sa Bidze i permet nou regard an aryer pou vwar sa ki'n ganny akonpli dan sa 3an. Pou *take stock* lo kote nou ete e pou fer en analiz sa ki'n ganny fer e sa ki reste pou fer dan sa prosen 2an.

Minis in tras sa semen e in met devan nou sa lenformasyon pour ki nou kapab, konman bann reprezantan lepep dan nou distrik respektif e konman reprezantan tou Seselwa isi dan Lasanble, pran en langazman pou rekonnet lakonplisman ladministrasyon LDS ziska prezan.

E siport li dan sa ki reste pou fer afen ki ler 2025 i arive, sa 35,000 Seselwa ki'n amenn LDS o pouvwar a kapab dir ki zot in byen vote e ki zot pou vot ankor, an pli gran nonm pou retourn LDS o pouvwar.

Mr Speaker, selon mon lanaliz, diskour Minis in striktire lo 3 gran tenm.

Premye, kree plis larises dan en fason ki nou pou annan plis larzan pou administre pei e partaz avek popilasyon.

Dezyenm, rekonnet nou vilnerabilite e *build up* rezilyans a sok entern e ekstern.

Trwazyenm, amelyor lenfrastriktir nou pei e siport rezim sosyal nou popilasyon pou ki personn pa ganny kit deryer. Sa 3 tenm se en *map*, en plan, en *blueprint* pou en Sesel modern kot tou dimoun i dan lanplwa, kot personn pa ganny kit deryer, kot nou lenfrastriktir i o pli o nivo posib, e *kot service delivery* i alaoter. Ki swa pou en pasyan lopital, en zelev lekol, en antreprenner oubyen en dimoun ki pe ganny sekirite.

Dan sa Bidze nou vwar ki tou kous nou popilasyon i ganny abzorbe e ki Bidze i annan en keksoz pou sak dimoun. Se sa realizasyon ki permet mwan felisit sa tim Minister Finans ki'n prepar sa Bidze.

E ki pou permet mwan dan larestan mon letan la bomaten pou kapab dir avek lafyerte, ki anba direksyon Prezidan Ramkalawan, Minis Hassan ek lezot Minis, Sesel i dan bon lanmen. E ki Seselwa i annan rezon fyer nou Gouvernman e nou lakonplisman dan sa dernyen 3an anba zot direksyon.

Pa tou keksoz dan Bidze Mr Speaker, ki pou fer tou dimoun kontan. Serten Minister ek lazans pou vwar ki

zot pa'n ganny ase pou fer tou sa ki zot bezwen akonplir lo zot program. Menm zafer pou distrik.

Sa i normal, e i toultan le ka. Me dan lansanm, se en Bidze ki delivre pou tou dimoun.

Avek ou permisyon Mr Speaker, mon propoz pou pas lo sa 3 tenm dan sa Bidze dan en bi demontre ki mannyer sa se en Bidze ki'n ganny formile pou kree en lekonomi pli solid e dirab a lonterm.

An menm tan ki i pe donn lasistans dan bann sekter kle e dan sak kous nou popilasyon a kour-term. Setadir, pou sa lannen ki pe vini.

Premye tenm, kree plis larises. Sa tenm i regroup plizyer konponan. Minis in dir nou ki son parkour a lonterm se pou amelyor sityasyon ekonomik e sosyal Sesel e Seselwa, an dot mo pou kree plis larises.

Enn bann tenm dan sa Bidze se osi en polisi sa ladministrasyon. Sa se pa depanse avan ki ou'n kree larises. E ler ou'n kree larises, partaz sa avek popilasyon. Sa polisi i enn ki non selman senp me i enn ki fer sans. E sa Polisi i pa enn ki devret ganny swiv zis par Gouvernman dan son Bidze, me osi enn ki tou dimoun i devret servi dan zot Bidze personnel. I telman senp

ki ou ti a krwar ki i ti pou ganny aksepte par tou dirizan en pei.

Me non, Mr Speaker, parti *SPPF/US* pa krwar ladan. Parey nou'n vwar dan sanmenm sa Lasanble, semen apre semenn, parti *US* i krwar dan depanse menm si ou pa ankor fer larzan.

*Borrow*, pran e depanse, apre nou a vwar ki mannyer nou pou rann. Pran larzan avek bann pei etranze epi pa repeye, se sa polisi parti *US*. Pran later e fer lakaz, apre pa peye. Annou pa bliye ki se sa enn bann rezon ki ti anmenn zot fer koudeta.

Zot pa ti dakor ki Gouvernman Mancham ti pou amenn lenvestisman avan lans bann program sosyal.

Non, Msye Rene ti anvi lans program sosyal menm avan ki pei ti'n anmas larises. E se sa ki *SPPF* ti fer pandan tou zot lavi. Pran later, pa peye. Konstri lakaz epi donn en *discount* 40 poursan en semenn avan eleksyon lo *loan*.

Kree fon Sekirite Sosyal e donn milyonner menm sekirite ki sa ki pli pov dan lasosyete. Pran larzan avek bann labank aletranze epi pa peye. Pran later Gouvernman e pas avek zot menm. Pran pli zoli bout later anvil e olye fer en biro pou Minister, fer batiman L'espace pou *JJ Spirit* epi vann pou milyon. Pran, pran, pran

epi donner, donner, e donn plis ankor zis pou reste o pouvwar. Epi ler zafer i sal bezwen kriy *IMF* e anvoy Mr Ahmed Afif al negosye avek *Paris Club*. Me pa zis sa, Mr Speaker.

Dan sa Lasanble, nou tann menm fenomenn sak semenn. Ogmant lapey, pey trezyenm mwan tou dimoun pe enport si zot travay. Pa fer monte laz sekirite, pa fer monte laz pansyon, pa fer monte kontribisyon *Pension Fund*. Non.

O kontrè, donner, donner e donn plis ankor. Fer trezyenm mwan vin en drwa, redwir laz pansyon. Si *le pot* i kase, nou a aste lalkol apre.

Si ozordi Mr Speaker, parti *US* i vwar li dan lopozisyon se senpleman aköz zot napa kapasite sanze.

**(APPLAUSE)**

### **HON BERNARD GEORGES**

Zot napa kapasite evolue. Zot in pri dan en *mindset* donner san regard kree larises avan donner. Epi, zot in pri dan en *mindset* dirizan.

Dan nou Lasanble nou vwar tou le semenn ki mannyer 3 parmi zot i koz pou tou lezot. Konmsi se zis sa trwa ki enportan. Ekout byen parol Onorab Pillay Dimans, La Digue. Pou li se Pillay, Loze e Cosgrow ki ganny mansyonn

an premye. Onorab Cosgrow li, da sa menm fonksyon se Cosgrow, Pillay e Loze avan sa 7 lezot.

**(APPLAUSE)**

**HON BERNARD GEORGES**

Son parol Mr Speaker, pa pou mwan. 3 zonm ki pa'n zanmen oze debout dan en eleksyon.

**(APPLAUSE)**

**HON BERNARD GEORGES**

Ki zot pa'n zanmen aparet lo en papye vote ki pe *rule* parti US dan Lasanble. Sa 6 lezot ki'n debout e ki'n ganny elekte par zabitan zot distrik, zot *sorry* zot pas apre. Se Onorab Pillay ki pile an premye, se Onorab Loze ki koze an premye e Onorab Cosgrow li. *Well*, Onorab Cosgrow i ankor pe *grow*, Mr Speaker.

**(APPLAUSE)**

**HON BERNARD GEORGES**

Se zot 3 ki pe *rule* border lopozisyon. E sa 3 zonm i ankor pe viv dan sa *mindset* donnen, donnen e donnen. Se sa *mindset* ki'n amenn Sesel la kot parti LDS in trouv li le 25 Oktob 2020 bomaten. En kales ki'n kase avek en kof ki vid. Permet mwan retourn lo sa size trezyenm mwan e laz pansyon, Mr Speaker.

Mon tann zot dirizan dir ki zot plan se fer trezyenm mwan vin en drwa. Mon pa konnen kan zot krwar ki zot pou fer sa. Me si tou dimoun pou ganny en trezyenm mwan aköz esper Desanm? Senp. Pey zot en porsyon sa trezyenm mwan sak lafen dimwan par ogmant zot saler. So, zot pa'n konpran ki trezyenm mwan i en *reward* pou travay ki sa anploye i fer.

Se sa rezon ki i apel en trezyenm mwan e i ganny peye an Desanm, apre douzyenm mwan. Pou *reward* travay pandan en lannen.

Lo size laz pansyon e fer monte Sekirite Sosyal, nou osi vwar sa mank responsabilite dan parti US. Zot konnen ki Fon Pansyon pa soutenab. Zot prop Prezidan ti dir sa e i ti pe prepare pou fer monte laz pansyon. Me non, la ki i annan pli gran eksper ki pou en vot La Digue, i pare zet fon pansyon an antye anba bis e fer ki zenerasyon fitir pa pou ganny pansyon.

Sa se en legzanp Mr Speaker, sa mantalite donnen, donnen, donnen, menm si ou pa kapab *afford*, ki'n amenn Sesel rod IMF an 2008 e met zot dan Lopozisyon. Me les mwan demann parti US en kestyon. Oli zot kalkilasyon ki zot in koz lo la.

Zot Bidze alternatif oli? Kote zot pou ganny sa larzan?

Ki par dan Bidze ki zot pou koup pou zot fer akonplir tou sa bann promes ki zot in fer. Donn nou detay silvouple. Donn nou detay dan sa Lasanble, dan sa 3 zour ki pe vini.

Lo nou kote latab, nou anvi Mr Speaker, ki tou travayer i ganny en trezyenm mwan lapey. Annefe, sa i dan Bidze pou tou travayer servis piblik. Sel diferans ant nou ek zot se ki nou, nou met responsabilite pou ganny sa trezyenm mwan lo sa travayer e non pa lo leta ouswa lo anplwayer. E la nou vwar diferans ant filozofi politik nou 2 parti.

Lo sa kote, nou ankouraz travayer prodwi pou gannyen, lo zot kote zot donnen menm si napa prodiksyon. Lo nou kote, nou met responsabilite lo sa endividi. Lo zot kote, se Leta ki pran tou responsabilite pou sak endividi. Diferans i kler pou vwar. Ler zot o pouvwar tou lenfrastriktir i degrengole, dimoun i vin depandan lo Gouvernman, kof i vid.

Ler nou, nou *rule border*, sitwayen i desann pou travay, zot rod lanplwa, zot kontribye pou zot pansyon demen, lenfrastriktir i amelyore e personn pa ganny kit deryer.

Mr Speaker, mon'n bezwen regard en pe an aryer pou eksplik sa polisi fiskal. Sa diferans Polisi fiskal, eskiz

mwan. Ant zot ek nou ant zot ek nou. Akoz se sa, a la baz menm sa Bidze ki devan nou e diferans ant nou fason fer ek zot fason fer.

Nou bezwen konman en pei, premyerman anmas otan larzan taks ki posib e fer ki tou dimoun ki devret pey taks i fer li, akoz se larzan taks ki fer bis *SPTC* roule. Ki fer nou annan lasante ek ledikasyon gratwi. Ki fer lakaz, ki fer sant sportif, ki fer por lapes. Me an menm tan, rezim taks i bezwen *incentivise* dimoun pou pey taks e non pa fer li tro o ki dimoun pou rod en fason pou pa peye.

Andotmo, en rezim taks i bezwen parey zistwar *Goldilocks*, ni tro so, ni tro fre, ni tro o, ni tro ba.

Sa Gouvernman in fer li tre byen, parey nou fek vwar lo rediksyon *excise* lo veikil elektrik ek *hybrid*. E rezilta se ki nou annan en rezim taks ki premyerman les lespas pou biznes grandi e fer plis profi e dezyenmman takse dan en fason zis e ekitab. Kot sa ki kapab e devret peye i bezwen fer li e sa ki mwen kapab pa bezwen peye.

Taks i pli o lo bann keksoz ki *luxury* ouswa ki pa bon pou nou lasante parey lalkol e prodwi taba. E VAT, V.A.T i asire ki tou dimoun i pey menm kantite lo prodwi ki tou dimoun i konsonmen.



An menm tan, napa taks lo bann prodwi ki dimoun i pli bezwen.

Dezyenmman, nou bezwen kontinyen diversifye nou lekonomi pour ki i annan plis lespas pou dimoun fer biznes e kree larises. An kontras avek bann ladministrasyon oparavan, sa Gouvernman i reste konman fasiliter bizness prive.

Apard 1 ou 2 sekter kle e pou bann rezon spesifik e pou en letan minimonm, Gouvernman pa fer biznes. I pa son rol, e i pa kapab fer li pli byen ki sekter prive *in any event*.

Atraver bann Lalwa ek lareg kler, en sistenm taks ekitab e provizyon later e fon labank devlopman, lespas i ganny lese pou sekter prive antre e kree larises.

Sa ladministrasyon in demonte sa plizyer fwa par promouvwar nouvo biznes, parey *aquaculture, intensive farming, intensive agriculture*.

Kree plis later pou lendistri e re partaz sa ki la pou asire ki bann ki'n pran en *lease* apre vann pou milyon pa ariv ankor.

La ozordi apre apenn 3an, nou vwar rezilta pe arive. Lo sa 2 *industrial estate* Providence e Zil Eve, nou war nouvo biznes pe devlope; *fruit juice* lokal, transformasyon prodwi fri lanmer e lezot ankor. En seri

biznes ki kree lanplwa e ki amenn plis larzan dan lekonomi.

Lo zil Desroches e Coetivy, *IDC* pe finalman kapab transform parol an aksyon e pe konmans prodwi kanmaron ek legim pou redwir lenportasyon.

Trwazyenmman, nou bezwen trouv en pli bon fason pou fer biznes e vin pli performan, pli konpetitiv dan sa ki nou fer. Sa i enn bann plan fondamantal polisi *LDS*. La kot bann ladministrasyon presedan ti kontan anmas zis kantite taks ki pei ti bezwen, epi *relax*.

Kot zot ti plito adopte en latitud lese ale e konsantre lo donn sekirite e alawenns menm si napa prodiksyon. Kot tro bokou lazans Gouvernman pa ti delivre a la oter, e kot ti pe perdi larzan.

Mon bezwen selman mansyonn Zarden Botanik, L'Union Estate ek *Industrial Estates Authority*. Li ladministrasyon *LDS* i vey tou pti sou.

Lese ale Mr Speaker, nou'n les ale. Lese ale i asiz lo kote drwat Lasanble, kote gos pou ou Mr Speaker. *LDS* nou, nou krwar dan performans e konpetisyon.

**(APPLAUSE)**

**HON BERNARD GEORGES**

Nou pa krwar ki donnen avan kree, dan partaz gato avan ganny kwi.

Rapidman, bokou Seselwa in adopte sa transformasyon e vwar ki en biznes i bezwen mars lo son maksimonm pour ki propriyeter sa biznes, son anploye e pei an antye i benefisye. Dan Bidze Minis in souliny sa plizyer fwa.

Katriyenmman, biznes i bezwen vin pli fasil. Nou bezwen kontinyelman *improve the ease of doing business*. La mon bezwen dir i annan lespas pou ankor amelyore. Par egzanp, akse avek kredi labank pou investir dan lagrandisman en biznes, pou fer en pti biznes vin en gro biznes i ankor tro difisil. I ankor tro tarde pou en etranze ki oule aste later pou ganny sanksyon Gouvernman. I tro tarde pour ki en dokiman i ganny anrezistre kot biro lanrezistremman.

GOP dan bokou ka i tro tarde. En dimoun ki fer laplikasyon pou ganny lasistans sosyal i bezwen sa lasistans menm zour ki i fer son laplikasyon aköz son problem i grav. I pa bezwen sa lasistans 3 semenn pli tar. I pa devret pran plis ki 3 zour pou *process* en demann e peye.

Dan mon prop distrik enn mon zabitan in bezwen

esper 2 semenn pou li ganny dir wi, e ankor en semenn pou larzan ariv lo son kont. Nepli annan plas pou en tel sistenm dan Sesel ozordi, Mr Speaker. La, mon bezwen dir ki en distenksyon i bezwen ganny fer ant Gouvernman ek son Polisi ek travayer Gouvernman. Wi, *the buck stops* avek Gouvernman, me i ankor annan tro dimoun ki pa pe perform a la oter, ki pa ankor konpran polisi Gouvernman, ki ankor pe viv dan lepase e fer keksoz parey avan.

*Business as usual* in fini, Mr Speaker. Sa Gouvernman ki pe *rule border* i enn ki krwar dan trouv solisyon e liber dimoun pou fer grandi larises nou pei.

Avek sa bann nouvo fason fer, plis larises pe ganny kree e plis larzan ava ganny libere pou Gouvernman partaz avek lepep dan bann prosen Bidze ki pou vini.

Dezyenm tenm sa Bidze se rekonnet nou vilnerabilite e kree plis rezilyans.

Konman en pei, Sesel i annan bokou latraksyon me i annan osi bokou defi. Nou en zoli pei e sa i permet nou annan en lendistri touris performan ki premye pilye nou lekonomi.

Sa i byen e nou vwar ki mannyer lendistri touris in amenn bokou benefis pou

bokou nou sitwayen. Sirtou lo sa de zil, Praslin e La Digue.

Sanmdi pase mon ti Marie-Jeanne Estate, Baie Ste Anne. I gou pou vwar bann zoli pti *guest house* e letablisman *self-catering* ki'n ganny kree par Seselwa pe fer byen. Pou vwar zenn pe debrouye avek zot prop biznes *charter*, pou vwar bann *skipper* e *boat boy* isi *Eden* pe travay ek lakanpanny *boat charter*.

Pou vwar nou bann zenn al Lakademi Tourizm pou aprann en metye dan sa lendistri.

Nou osi annan, Mr Speaker en gran teritwar lanmer avek bann pli gro stok ton dan lemonn. Sa i permet en lendistri lapas devlope lo 3 nivo. Artizanal, semi-endistriyel e lapas ton lo en baz endistriyel.

Ankor enn fwa nou pei i ganny bokou benefis atraver sa lendistri, ki swa bann peser artizanal. E pou zot napa Gouvernman ki'n fer plis pou amelyor zot lavi, avek bann zoli por lapas dan tou kwen nou zil, avek bann fasilite sipor pou zot lendistri. Bann ki dan biznes lapas semi endistriyel i osi pe debrouye e la sa Gouvernman in met lenfrastruktir an plas pou zot. Nou vwar biznes Seselwa ki pe fer *fish processing* pe grandi. Enn i menm pe *advertise* lo

televizyon tou le swar pou dimoun vin servi son fasilite.

E annou pa bliye ki sekter lapas endistriyel in amenn larises dan nou pei dan plizyer fason. *Licence fee* ki bann bato ton i peye pou lapas dan nou lanmer, lizin *IOT* kot Gouvernman i annan en par 40% lo profi sa lakonpannyen. Lanplwa pou maren peser ek *stevedore*. Bokou zot ki sorti dan mon distrik e dan lezot distrik anvil. Sekter sipor *Land Marine*, *Hunt Deltel* e lezot ankor. *Port dues* ki sa bann bato i peye. Bato kargo ki vin pran *container* pwason e ki donn nou pei plis akse avek *cargo* enternasyonal ki bezwen antre Sesel.

Epi, nou annan sekter finansyel. Sa ki nou apel sekter *offshore*. Kantmenm sa sekter i amenn serten problem e fer ki nou pei i ganny met lo lalis nwanr e lalis gri ban pei Eropeen tanzantan.

Set en sekter enportan dan kreasyon larises nou pei. *FSA* i fer larzan ler lakonpannyen i ganny anrezistre, lanplwa pou bokou zenn Seselwa in ganny kree avek bann lapey byen o e annou pa bliye ki pandan *COVID*, ler touris pa ti kapab vini e bato ton pa ti lapas, sete sa lendistri ki ti kontinyen amenn larzan dan nou pei.

Me, avek tou sa bann bon keksoz, Minis in rapel nou ki nou pa kapab pran keksoz tro fasil. Tou le 3 pilye nou lekonomi i frazil, Mr Speaker. Sesel konman en destinasyon touris i annan bokou konpetiter atraver nou rezyon e atraver lemond. Nou vilnerab akòz si avyon i aret deservi Sesel, touris pou aret vini. Se pou sa rezon ki sa Gouvènmàn ti tap tou pou sov Air Seychelles. Ki nou lasirans kont en tel posibilite.

Si nou pa zer nou lendistri lapès byen, ton ek lezot lespes pou fini. Nou'n deza konmans vwar moratwar lo lakantite ton ki kapab ganny lapès ek lo grander bourzwa ek zob ki kapab ganny pran.

Si ton i aret ganny met dan bwat isi, bato *cargo* ki vin pran *container* pou redwi ouswa arete. Pri *cargo* pou monte e nou pou soufer en logmantasyon pri marsandiz. Doker pou perdi lanplwa. Gouvènmàn pou aret ganny *dividend* avek *IOT*. Bokou fanmir pou soufer. E, si nou sektè finansyel i redwir, bokou zenn pou perdi lanplwa e reveni sa sektè osi pou redwir.

Alor Mr Speaker, nou pa ganny drwa krwar ki botan pou toultan botan. Nou bezwen toultan lo ki viv pou asire ki nou protez nou 3

sektè lekonomi e nou diversifye ankor atraver sa bann sektè e an deor zot, par trouv meyer fason fer dan sa ki egziste, e nouvo louvertir ki nou pa pe eksplwate ankor. Sa Bidze i *focus* nou lo sa dan en fason direk.

Nou bezwen regard nou vilnerabilite an fas, Mr Speaker. Pou ki nou ava kapab konpran defi ki devan Minis, devan Gouvènmàn, devan nou konman en pep.

Nou en pti pei, napa ase later pou lagrikiltir, pou lozman, pou lendistri. Nou lwen avek larestan lemond, alor tou sa ki nou bezwen i koute pou amenn isi. Sak sok ekstern, ki swa *COVID*, oubleyèn lager Ukraine, oubleyèn Izrael, i enpakte nou direkteman. *COVID*, nou konn son rezilta.

La lager ant Izrael ek Hamas in fer ki marse touris Izrael ki *Air Seychelles* ti'n devlope e ki ti pe byen fer in disparet en sel kou.

Nou teritwar maren i gran e nou napa ase resours pou asire ki nou kapab anpes lapès, parmi lezot enkirsyon ilegal dan nou lanmer. Ater, nou annan en fleo drog ek lalkol ki pe ravaz tro nou zenn e gard bokou fanmir an aryer.

Sanzman klima i en menas kontinyel e nou depans bokou pou protez nou lakot. Tousala, Mr Speaker se bann

defi ki nou pei i fer fas avek akòz nou pozisyon e akòz nou fason viv.

Apard sa, nou annan bann defi ki sa ladministrasyon in erite avek sa sistenm ki ti la oparavan. Sa bann defi i osi grav ki sa bann ki monn fek mansyonnen. Sa se bann problemn sosyal, parey drog ek lalkol, wi. Me se osi en lenfrastriktir nasyonan dan move leta, difikilte pou biznes annan akse avek kredi pou devlope.

E parey mon'n dir en *service delivery* lo tou nivo ki ankor pa ase performan e ki annan tro birokrasi. Tousala i retard devlopman en nasyon. E tousala, ladministrasyon LDS in vin zwenn anzandre dan nou pei.

Nou napa drwa Mr Speaker, krwar ki tou i byen. Sa se fason fer ki sa bann ki'n vin avan nou ti fer. Depanse, diverti kontan, pa met larzan dekote pou letan dir. Nou'n aprann sa lesan, Seselwa in manz sa margo anmer. Kot ti napa deviz dan labank e kot nou ti bezwen al demann pardon avek bann ki nou ti dwa.

Zanmen ankor nou pa devret permet nou retourn dan sa letan. Nou konn nou vilnerabilite. Nou bezwen *build up* nou rezilyans. E sa Mr Speaker, nou bezwen fer li nou menm. E sel fason fer sa, se

fason LDS. Enkilke en gou travay dan nou dimoun, enkilke en sans responsabilite dan nou dimoun, kree kondisyon pou biznes konmanse e grandi.

Anmas plis taks avek bann ki fer profi, koup depans kot nou kapab. Prodwi plis lokalman, diversifye lekonomi pou ankouraz nouvo sekter biznes vin isi e fer nouvo biznes lokal dan bann sekter ki egziste parey *fish processing* e biznes tourizm ki sipòrt lotel e *guest house*.

Redwir problemn sosyal, amelyor lenfrastriktir. Sipòrt sa ki vilnerab. Sa se sa bann boul ki travayer Minister Finans i bezwen kit dan lezer an menm tan. Sa se lavenir Sesel anba Gouvernman LDS. trwazyenm tenm Bidze Minis Finans se amelyor lenfrastriktir nou pei e sipòrt rezim sosyal nou popilasyon.

Annou regard lenfrastriktir nou pei an 2020. 2 ou 3 legzanp i sifizan pou fer mon pwen. Trafik ki ti sorti dan sid ti kay lo pon Rochon. In rezourd. *Roundabout* Plaisance in ganny konstri e pon Rochon lo *highway* in ganny en nouvo lane. Zil Eve, Praslin ti en mess.

La en lord in ganny mete dan alokasyon later, servis in ganny met an plas e en zoli terminal pou *ferry* in ganny konstri.

Menm zafer pou La Digue. Minis in fer nou rapel ki move kondisyon nou bann lenfrastriktir sportif partou dan nou pei ti en sentonm defayans ki parti *US* ti'n kite ler zot in ganny zot let demisyon le 24 Oktob 2020. Pou rekonnet laverite dan sa parol, nou bezwen zis regard kondisyon Stad Linite, Palais des Sports, basen naze, *tennis court* Roche Caiman.

Regard batiman *Independence House* kot slab in kase, bout peron in kase. Regard *complex* sportif dan bann distrik ki ti anpyang.

*Providence Industrial Estate* li i ti en *mess* parey Zil Eve. Larzan lokasyon pa ti pe ganny anmase. Sa ki ti annan ti annan plizyer morso later, sa ki ti napa pa ti pou gannyen.

Regard nou semen ki Minis Derjacques in bezwen vin aranze e *resurface* dan sa 3an. Lalis Mr Speaker, i tro long. Tousala, se ladministrasyon *LDS* ki'n bezwen vin aranze. E tousala i pran larzan ki nou ti pou kapab servi pou konstri lozman e met plis dan pos Seselwa.

**(APPLAUSE)**

### **HON BERNARD GEORGES**

*LDS* in erit 2 gran defi ler nou'n ganny elekte. Sa, parey

mon'n dir, lenfrastriktir nasyonal ki ti swa dan en move leta, swa i ti ankor lo plan. Enn bann defayans bann ladministrasyon *SPPF/US* sete konstri batiman epi pa fer *maintenance* lo zot.

Enn par enn bann lenfrastriktir, ki swa semen, batiman, pon eksetera, ti pe kase. Sa semenn ti grannrout Au Cap e semen Anse Boudin, detrwa mwan pase sete Anse Kerlan. Batiman ti zis ganny abandonnen, ou ti a krwar nou ti en pei milyonner. 3 vilaz *NYS* zis ti ferm laport e les dimoun ek lanatir vandaliz zot.

Praslin, batiman *YRTC*, abandonnen. Pointe La Rue, lizin lasos tomat, abandonnen. Hermitage, *Nurses Home*, abandonnen. Epi, bann ki pa ti abandonnen, *maintenance* zero.

Zis regard *National Library, Oceangate House*. Fer letour apye zot ava konpran sa ki mon pe dir. *Independence House* mon fek koz lo la. Nou bann fasilite sportif. Tousala Mr Speaker, ti dan en leta enpitwayab. Se sa Gouvernman *LDS* ki'n bezwen vin met lord.

**(APPLAUSE)**

### **HON BERNARD GEORGES**

Ki'n bezwen vin met zot an eta.

Me pa zis sa, Mr Speaker. Gaspiyaz lo lenfrastriktir. Later ki'n ganny lease ouswa ki'n vann avek dimuon pou fer lakaz dan *land bank* kot lakaz pa ankor eklo.

Menm zafer Providence *Industrial Estate*. Marie Jeanne Estate, Baie Ste Anne i preski annan plis kare later ki'n ganny alawenns kot napa okenn konstriksyon ki bann ki annan lakaz lo la. Tousala i met pei an retar e i fer ki sa ki anvi devlope pa ganny later aköz sa ki'n konn zwe son kannot in gannyen, epi pe asiz lo la avan i re vann li pou milyon.

Pou mwan, Mr Speaker ki en *MNA* en distrik kot napa ditou later pou konstri, sa i fer mwan araze ler mon vwar dan ki leta zansla in kit pei avek nou.

Erezman, Mr Speaker ki nou annan en Gouvernman ki pa les tonbe e ki'n pran sa defi e pe rod aranz nou lenfrastriktir pou byennet nou popilasyon. Dan sa dernyen 3an en kantite in ganny fer. Semen, trotwar, por lapas, stasyon tenny dife Anse Royale. Terminal Baie Ste Anne, por La Digue, National Library, lalis i tro long Mr Speaker.

Pa fini la. Dan Bidze 2024 i annan lespas pou en kantite lenfrastriktir. Ki swa bann pti proze dan distrik. E

wi Les Mamelles, nou *daycare* pe vini, mersi Minis.

**(APPLAUSE)**

**HON BERNARD GEORGES**

Ki swa sa bann pti proze ouswa bann gran proze parey en nouvo lopital Sesel.

Konman mon mansyonn lopital, Mr Speaker, mon annan en kestyon pou ou. Eski mon byen tande ki en dokter, en dokter ki sonny dimoun e ki pe aspire pou vin Prezidan Sesel in dir ki son larm i koule ler i vwar Lopital *St Mary's La Digue* napa pasyan ladan?

Dir mwan Mr Speaker, mon'n mal tande silvouple. Aköz, si i vre, zanmen dan mon lavi mon'n deza tann en komanter pli bet sorti dan labous en dimoun ki'n deza asiz la kot mon asize, pou diriz zafer Gouvernman dan sa Lasanble, ouswa ki'n asiz dan ou Sez, Mr Speaker pou diriz Lasanble.

Be msye, si lopital i vid aköz napa pasyan. Selebre, aköz sa i montre ki napa dimoun ki malad.

**(APPLAUSE)**

**HON BERNARD GEORGES**

E si napa dimoun ki malad, pa se aköz sa Gouvernman ki pe *rule border* pe fer en travay remarkab?

**(APPLAUSE)**

**HON BERNARD GEORGES**

Mon mazine se akòz sa ki son larm i koule, Mr Speaker.

Me mwan mon annan en kestyon pou sa msye. Be si ti napa lopital *St Mary* e si lopital ti ankor Lopital Logan, be pa li osi i ti pou vid e i pa ti pou annan passan ladan?

Akòz, si napa pasyan pou en lopital kote ou pou vwar pasyan pou met dan en lot lopital. Alor, dan sa ka ki ou ti pou fer? Ou pou anvoy en *JCB* La Digue, kraz lopital Logan akòz napa pasyan?

La Mr Speaker, malgre tousala mon annan en bon nouvel pou sa msye, i kapab swiy son larm. Premye pti baba in ne Lopital *St Mary's*.

**(APPLAUSE)**

**HON BERNARD GEORGES**

E lo lapar nou *caucus* dan Lasanble, permet mwan pou prezant nou felisitasyon avek paran sa zanfàn.

E lo sa size La Digue, en lot manm. Safwasi en *teacher*, an plis, an plis mon krwar en *teacher* Matematik. In non selman koz manti e dir ki se Gouvernman ki pou peye pou eradikasyon lera Aldabra, ler i konn tre byen ki sa larzan pa pe sorti kot *taxpayer*, me pe

sorti kot *SIF* - en *NGO* ki pou rod finansman pou sa proze.

Me son lalang  
 ♪♪ *Pinocchio*, *Pinocchio* ♪♪.  
 Son lalang in may li zanbek e fer li kalkil €25 milyon pou ariv R300 mil.

*(laughter)*

**HON BERNARD GEORGES**

La Mr Speaker, mon'n amenn en pti *calculator* pou Onorab. Dezormen, i a kapab fer son kalkil lo la.

**(APPLAUSE)**

**HON BERNARD GEORGES**

Se sa.

*(Interruption)*

**MR SPEAKER**

Onorab Pillay, ou'n koze, personn pa'n enteronp ou. Silvouple, silvouple gard lord.

*(Interruption)*

**MR SPEAKER**

Onorab Loze, mon pa aksepte sa kalite konportman. Si ou fer li ankor mon pou demann ou sorti dan lasal. Mersi. Onorab Georges, silvouple terminen. I reste ou apepre 4 minit.

**HON BERNARD GEORGES**

Wi, Mr Speaker mon annan zis 2 paz ki reste.



Kestyon Mr Speaker, se sa bann dirizan ki anvi pran sarz nou pei? Ou plere ler lopital i plen e lotel i vid. Ler lopital i vid e lotel i plen, sa en lakoz pou selebre Mr Speaker. E la an Desanm a lokazyon 40enm laniverser *Vallée de Mai* koman en sit UNESCO, mwan mon pe rod en plas pou reste Praslin, lotel i plen. Annou selebre Mr Speaker.

**(APPLAUSE)**

**HON BERNARD GEORGES**

Mwan mon krwar slogan sa parti i apropiye. Vre parti US i sel opsyon pou Sesel retourn an aryer! Mersi.

**(APPLAUSE)**

**HON BERNARD GEORGES**

Sa i amenn mwan lo dezyenm vole sa tenm. Siport rezim sosyal nou popilasyon. Pa vo lapenn ki en Gouvernman i fer tou sa ki mon'n koz lo la depi ki mon'n konmans mon repons, Mr Speaker, si larises pa ganny deplwaye pou byennet nou popilasyon.

En pei pa egziste pou annan zoli lenfrastruktir, pou touris vin vizite, pou Eropeen manz ton dan bwat, e pou milyonner etranze anrezistre lakonpannyen Sesel pou fer biznes e kree plis larises an deor Sesel. Non, se pa sa rezon

ki en Gouvernman i pran ladministrasyon en pei.

Se pa pou sa ki LDS in lager pandan 30an pou atenn pouvwar. Bi prensipal Gouvernman LDS se fer tou sa ki mon'n koz lo la pou en sel rezon. Pou amelyor nivo lavi tou Seselwa, sirtou bann ki pli feb e ki bezwen sipor Gouvernman. Minis in fer sa kler dan son diskour Bidze.

Lezot lo nou kote latab ki pou pran laparol apre mwan pou repet sa, me les mwan dir li avan. Sak Bidze ki Minis Hassan in prezante in en Bidze ki reponn a en legzizans a sa moman.

Swa pou sirmont COVID, swa pou remet lekonomi lo en baz stab, swa pou konmans rekonstriksyon. Sa enn i ariv a en moman rar dan listwar en pei. Reveni in grandi, depans in koupe, Bidze in balanse.

Alor, in ler pou servi sa *saving* pou amelyor lavi Seselwa. Nou vwar sa dan tou laspe sa Bidze. I annan en keksoz pou tou dimoun dan sa Bidze, depi zanfanki'n ne, parey sa enn ki'n fek ne lopital *St. Mary's* ziska dimoun ki pe viv zot retret.

Sa Gouvernman pe anmas detrwa lepokase avek ladministrasyon avan. Konpansasyon dimoun La Misère ek Baie Ste Anne, par egzanp. Serten in byen gannyen. La Digue in ganny

por, lopital, pe al ganny lekòl. Anse Royale pe benefisye dan preske tou sekter semen, konpleks sportif, lakaz, *you name it*.

Me *still*, tou kous sosyete pa'n ganny eparnyen e sakenn i kapab retrouv li dan sa Bidze. E se sa ki'n amenn mwan konmans mon lentervansyon par en mo felisitasyon pou Minis ek son lekip.

Lozman pe al ganny konstri en pe partou e wi, Les Mamelles osi pou ladan, veye. Later *land bank* pe al ganny *allocate* dan plizyer distrik, menm sa ki'n pri dan labi sibstans pe al ganny pa enn, me 2 sant reabilitasyon. Sak distrik pou benefisye par en sonm R1 milyon pou pti proze an 2024.

Sa pou permet distrik Les Mamelles akonpli plizyer pti proze. Nou *playground*, par egzanp. *Bus shelter* Le Rocher ek La Louise, en pe *parking* kot in neser pou en popilasyon ki bezwen protez zot transpor.

Zot pou konplent, zot in fini konmanse. Parey en vye granmofonn zot pou retourn lo trezyenn mwan, lo ogmant pansyon vyeyar, lo pri lavi, lo saler bann dirizan, lo *childminding*, lo lalis nwanr, parey zot dirizan dan Lasanble i fer tou le semenn. Sa nou konnen, me konplent pa pou sanz larealite e larealite se ki nou pei i dan pli bon landrwa

ozordi ki in zanmen ete, e sa se gras a ladministrasyon *LDS*!

**(APPLAUSE)**

### **HON BERNARD GEORGES**

Lefe i reste Mr Speaker, ki tou dimoun pou benefisye anba sa Bidze. Parey zot in vwar, mon pa'n al dan detay. Sa ki pou koz apre mwan i a fer sa.

Me, konman *MNA* en distrik ki annan bokou defi sosyal, mon pa kapab mank sa sans pou felisit e remersye Minis pou logmantasyon dan plizyer program sosyal. Bann ki pli vilnerab, se zot ki ganny plis dan sa Bidze e sa set en lakoz pou selebre.

Larzan konze maternite pe ogmante par 3 fwa. *Foster child* parey. *Semi orphan* plis ki 2 fwa. *Survivor benefit* parey. Me sa ki mon pli kontan se sa *one-off* R25,000 pou bann *foster parent*.

E la mon oule felisit tou sa bann ki donn zot letan pou pran zanfann lezot e fer zot grandi dan en fanmir stab e ed zot epanouir. Mon pa kapab les sa moman pase san mansyonn Madanm Violette Esparon dan mon distrik ki, malgre ki i annan son prop zanfann e ki i travay sekirite, in toultan trouv leker e letan pou pran zanfann pou *foster* zot. Felisitasyon, Violette. Ou en legzanp pou lezot.

**(APPLAUSE)**

**HON BERNARD GEORGES**

La, en Gouvernman rekonesan in get dan ou *welfare*. Nou sorti lwen, Mr Speaker. An konklizyon;

Avek en lekonomi anpyang an 2020, 3an pli tar nou dan en pozisyon kot larises i kapab ganny partaze. Dan ki pei ankor ki sa in arive? Get otour lemonn, kriz partou. Sesel, Minis Finans in tras en semen kot i pe rekonnet nou vilnerabilite, diversifye lekonomi pou ogmant larises. Amelyor lenfrastruktir pour ki i kapab partaz benefis avek tou nou popilasyon.

Mon kestyon, *what is there not to like in this budget?* Nou annan nou en Gouvernman ki *focused*, ki pa'n les okenn sok ekstern detourn li. Ki'n delivre pou Seselwa lannen apre lannen. La nou pei in ganny en Bidze pli inovatif ki zanmen.

Sesel, Mr Speaker, anba direksyon LDS i dan en bon landrwa. E i pa'n fini. Bann prosen Bidze pou konstri lo sa 4 ki sa Gouvernman in prezante e firamezir ki larises i grandi gras a polisi sa Gouvernman, ankor plis larises ava ganny distribye avek nou popilasyon.

Lasemenn Kreol fek fini Mr Speaker.

**MR SPEAKER**

Terminen Onorab silvouple.

**HON BERNARD GEORGES**

Permet mwan servi parol sa sanson ki'n ganny premye pri dan konpetisyon sanson Kreol pou termin mon larepons bomaten.

Sanson Mr Roland Madeleine, Dife Kreol i dir. Ler dife Kreol in alimen, ou pa pou kapab vin tennyen. Menm keksoz i aplik pou nou pei, Mr Speaker. La ki dife LDS in alimen lo sa later Sesel, avek bennzin ki sa Bidze 2024 in azoute avek li, personn, personn, e personn pa pou kapab vin tennyen. Mersi Mr Speaker.

**(APPLAUSE)**

**MR SPEAKER**

Bon, nou a pran poz la e nou a retourn travay 11er 05. Mersi.

***BREAK***

**MR SPEAKER**

Pour rebran deba mon a donn laparol Onorab Clifford Andre.

**HON CLIFFORD ANDRE**

Mersi Mr Speaker. Bonzour Mr Speaker, bonzour Minis. Bonzour tou bann Manm Onorab e bonzour sa ki dan Galeri, nou envite dan Galeri e

bonzour zabitan Anse Aux Pins e tou dimoun ki a lekout.

Mr Speaker, nou'n tann *Leader* Lopozisyon dan son repons dir avek nou Gouvernman *call* en eleksyon, nou ava vwar ki arive. Mon oule dir li ki dapre Lalwa Eleksyon pour ganny fer an 2025, e se *LDS* ki pour repran labar e direksyon sa pei.

**(APPLAUSE)**

**HON CLIFFORD ANDRE**

Mr Speaker sa Bidze parey Minis in dir i fer 4enm Bidze ki ganny prezante par Minis anba ladministrasyon *LDS*.

Ler ou analize ou vwar progre e mon oule dir vre progre. Mon dir progre baze lo levidans. En Bidze ki'n ogmante par lpoursan lo sa Bidze 2023 i demontre ki ler sitasyon i permet, *LDS* pou fer sir ki i remet zefor e sakrifis nou pep dan zot lanmen.

Parey in ganny dir dan lepase nou koman *LDS* nou krwar ki i nesaser pou fer transformasyon ekonomik avek bi pou anmenn soulazman pou tou Seselwa, kot sa sakrifis, kot sa ki fer biznes e sa ki travay dan servis piblik, zot osi zot ava benefisye.

En lekonomi transformativ i enn ki kontinyel e lonterm, depandan lo kwa ki bezwen ganny

transformen. Dan ka Sesel nou vwar ki nou annan bokou pour amelyore e transformen, alors i pou pran bokou letan pour nou fer sa ki fodre fer. Alors nou pou demann dimoun e pep Seselwa an zeneral, i pran sa pasyans ki pou permet nou ariv kot nou anvi arive.

Nou bezwen apresye ki Prezidan avek bann manm *Cabinet*, enkli bann *MNA* dan tou le 26 distrik, ti fer sir ki zot al kot bann zabitan pou vwar en pe bann defi ki zot pe fer fas avek. Mon pou bezwen a sa staz prezant mon leskiz avek zabitan Anse Aux Pins pour mon labsans, ler Prezidan ti vin vizit zot e sa sete pou rezon medikal kot in an deor mon kontrol.

Me la mon'n retournen, menm si mon pa ankor an *full* form, me mon pe retourn kot zot pour kontinyen kot mon'n kite. Ansanm nou pou sirmont bann defi. Mon limero i reste touzour parey, si zot pa ganny mwan ler ou *call*, anvoy mwan en mesaz, mon pou pran kontak ek ou pou rezourd ou konsern.

Pa ezite pas kot mon biro kot sant sosyal, mon *clerk* ava asiste ou, kot ou bezwen. Sesel i reste pour tou son zanan, menm dan bann letan difisil.

Bidze 2024 pe met bokou lanfaz dan lenvestisman dan nou pei e dan nou pep. Nou pe

envestir dan la kominote pou fasilite lavi nou pep. Nou pe investire dan lenfrastriktir sirtou sportif avek bi motiv nou pep, pou angaz zot dan bann aktivite sportif pou gard zot an bonn sante.

Nou pe investire dan bann lenfrastriktir ki pou tro bokou lannen in ganny neglize. Nou pe investire dan bann diferan benefis sosyal pou donn sipor nou pep ki bezwen sa lasistans adisyonnèl. Nou pe investire pou fasilite lanvironnman biznes pou ed sektè prive pou agrandi nou lekonomi.

San en sektè prive ki pe fli, nou lekonomi pa pou devlope e Gouvènman pa pou kolekte reveni pou founi servis son pep. Nou pe investire dan nou lazèns par met a zot dispozisyon plizyèr program, servis e lopòrtinite pou zot epanouir. Minis ti dir nou sa Vandredi.

Dan sa Bidze, i annan benefis pou tou dimoun - eskiz mwan. I kler ki apre ki bokou in ganny fer, Gouvènman LDS pe reisir distribye larises ki nou pei e nou pep in zenere gras a en sistèm fiskal e monneter byen responsab.

I osi kler ki sa Gouvènman LDS i enn ki pe travay tre dir, pou amelyor sityasyon son sitwayen par kree lopòrtinite pou zot leve e debourye. Ankor enn fwa sa i

bann parol ki Minis ti dir Vandredi.

US Mr Speaker, i dir nou ki zot pou fer plizyèr rediksyon ou plizyèr amelyorasyon dan lafason ki keksoz i ganny fer. Me ki zot pa dir nou Mr Speaker, zot pa donn nou en propozisyon lo ki fason zot pour fer sa arive. Zot pa dir nou ki mannyer zot pou ganny larzan pour fer monte bann keksoz ki zot dir zot pour fer monte. Alors mon dir avek pep Seselwa, pa le US anbet zot! US i lepase alors annou *focus* lo LDS pour nou lavenir.

Ler nou'n fer byen, nou *give back*, me nou pou toultan reste responsab e pridan dan nou depans, akòz Sesel i vreman vilnerab avek bann sok eksteryer. Se la kot nou vwar ki Bidze a en to R10 bilyon 640 milyon 628 mil 966 in ganny prezante devan nou Lasanble.

Sa Bidze Mr Speaker, i enn ki asire ki tou dimoun i ganny touse. Depi en zanfàn ki pe zwir benefis sosyal, ziska enn ki pe lekòl sorti Praslin. I tous sa bazardye dan bazar, ziska sa fermye ki prodwi. I tous sa biznesmenn ki pe fer biznes ziska sa travayer ki pe travay avek sa biznes.

I tous sa dimoun ki pe fer *savings* avek bi zwir en bon retret. I tous sa zenn *sportsmen* ki pe rod fasilite pou devlope. Lalis i long Mr

Speaker. Les mwan pas en pe lo detruwa bann eleman sa Bidze. Mon pa pou kapab pas lo tou, me serten. Mon bann lezot koleg mon sir pou osi pas lo bann ki mon pa'n tous lo la.

Bazar anvil in osi form par sa Bidze, sa i montre nou ki kondisyon nou bann frer ek ser i reste en eleman enportan pou sa ladministrasyon. Sa aköz nou krwar vreman ki nou sitwayen i bezwen kontinyelman amelyor nou fason fer e osi benefisye lo teknolozi dan sa domenn.

Mon konnen –nou pou tann bokou kritik, me i enportan note ki pou napa rezilta ki kapab ariv dan sa pti git letan, me nou kapab montre zot ki nou fer progre e nou pou kontinyen menm si zot maltret nou, menm si zot sey fer sabotaz dan serten servis piblik.

Mon dir sa Mr Speaker, aköz dimoun i kontinyelman reste fristre, ler zot ganny kontinyelman anvoy isi laba san vwar en solisyon pou problem ki zot anmenn devan.

Minis in dir ki lenvestisman pe kontinyelman ganny fer avek bi amelyor servis piblik. Mon oule demann Minis pour nou osi revwar sa bann dimoun ki pe met nou Gouvernman retar e fer piblik fristre. In plis ki ler pou nou dir avek zot, servis i

pou piblik, me non pa pou en parti politik. Ou'n ganny anploye pou travay, alors travay pou ou saler.

An dizan sa, mon oule fer resorti ki i annan bokou dimoun dan servis piblik ki pe fer en bon travay, kot zot deservi piblik, pe enport ou lopinyon politik. Sa Bidze pe ankor enn fwa fer provizyon pou rod bann fason pou *train* dimoun dan servis piblik, avek bi ki nou ava ganny en pli bon *service delivery* ki pou akseptab pou mazorite dimoun, aköz ou pa pou kapab satisfè tou dimoun.

Ankor enn fwa, mon pou demann bann ki pe met retar dan nou larout, pou dres zot bor e fer sa zefor pou Sesel, aköz Sesel i pou tou son zanfàn e avek *LDS* nou pou reste pozitiv pou en Sesel pozitiv.

Sa Bidze Mr Speaker pe met lanfaz lo en transformasyon ekonomik, donn sipor bann ki bezwen e kontinyen investir dan lenfrastruktir pei ki pou siport lagrandisman nou lekonomi. I kler ki ler in – ler i annan – ler in annan en ralantisman lekonomi mondyal, Sesel in plito ogmant son Bidze par lpoursan. Sa se aköz nou'n fer ase byen pandan sa letan e parey in ganny dir, ler nou fer byen nou pou pas sa avek nou pep.

Mr Speaker, lasante. Minister Lasante in ganny en alokasyon R1.41bilyon, ki reprezant 13.3poursan Bidze total. Sa i montre nou ki sa Gouvernman i angaze pou amelyor bann servis medikal ki nou ofer nou pep.

Se en Gouvernman responsab ki fer sa e met son dimoun o sant. Akoz si nou pep pa an bonn sante fizikman e mantalman, nou pei pa pou bouz devan e kontinyen fer bann benefis pou nou donn bann lezot servis tel ki lakaz, ledikasyon parmi bokou servis ki en Gouvernman responsab i bezwen donner.

Mr Speaker, Minis in dir nou ki apard bann sif ki in donner e ki spesifik pou serten *heads* dan Minister Lasante, i annan en R10milyon ki'n ganny *allocate*, avek bi fer renovasyon lo lezot fasilite medikal.

A sa staz mon oule demann Minis Lasante pou konsider renovasyon nou Klinik Anse Aux Pins aköz i avarye e bann lekipman ladan i demann amelyore.

Nou'n vizit dan lepase e nou ti a kontan vwar konfor bann *staff*, enkli bann pasyan i amelyore. Antretan ki nou esper en desizyon lo si nou pou ganny sa sant rezyonal lo Ile Soleil.

Ledikasyon Mr Speaker in ganny en porsyon

R1.40bilyon, swa 13.1poursan Bidze total in ganny *allocate* avek li.

Ankor enn fwa sa i demontre komitman Gouvernman *LDS* anba en direksyon responsab ki nou konsernen e anvi vwar zanfan epanouir pour ki zot fitir i ava enn ki briyan e ki nou pei ava kontinyen anba bann dirizan – a kontinyen annan bann dirizan responsab dan lefitir.

Mon pou demann tou zanfan pou *make the most out of what you have*, pran zot letid serye - pran zot letid o serye. Met zot ledikasyon avan. Lanmizman i annan son letan, fini aprann avan, apre tou pou tonm an plas.

Se dan sa konteks Mr Speaker ki mon pou ranforsi sa ki Minis in dir lo devlopman bann valer moral e spirityel ki bann zanfan i bezwen devlope, aköz se sa ki pou fer zot grandi avek bann bon valer e responsabilite.

Zot bezwen mazine ki se zot ki fitir Sesel, alors si zot pa grandi avek sa bann valer, nou pou dan gran problem pli tar. Alors mon pou demande ki lekol i ranforsi sa bann valer e enkilke dan nou zanfan bann bonn savwar viv.

Bann paran annou pran en pe plis regar lo ki nou zanfan pe fer lekol avek bi pou ed lekol delivre pli byen

laprantisaz avek nou bann zanfan.

Dan Staz Komite Mr Speaker, mon pou demann Minis Ledikasyon pou eklersi mwan, enkli ki bann ansenyan Anse Aux Pins lo kan e si pou annan renovasyon lo lekòl Anse Aux Pins. Sa fasilite i demann en renovasyon, enkli ki serten bann fasilite kot sa lekòl. I demann met lo en lot standar, ki ankor enn fwa laprantisaz par bann zanfan e osi bann *teachers* ki pe donn sa bann leson, zot a vwar zot dan en konfor akseptab.

Proze *land bank*:

Mr Speaker, i kler ki Gouvernman LDS, pe rod tout fason pou soulaz rev nou pep. Sa se pou zot ganny zot prop lakaz. Nou vwar sa ler nou get sa bann proze *land bank* ki Minis in anonse dan Bidze ki'n ganny met dekote, pou fer an 2024.

Minis, Mr Speaker in osi donn nou en pe detay lo osi bann proze lozman ki Gouvernman i annan lentansyon fer, ki pou fer sir ki dimoun ki lontan pe espere ava ganny zot prop lozman.

Ler nou gete, nou kapab konstate ki dan sa 3an ki LDS in o pouvwar, bokou dimoun in arive ganny zot prop lakaz ki zot ti pe espere pou plizyer lannen. I kler ki avek LDS zot fitir i garanti. I kler ki sa Gouvernman pe fer sir ki tou

kous nou sosyete i ganny pran an konsiderasyon.

Menm bann *mid-range condo* i dan Bidze pou lannen prosenn. Alors ou sa zenn profesyonnel ki anvi ganny ou lakour e komans ou fanmir, ou rev pou ganny akonplir. Alors mon ti a kontan demann ou pou asire ki ou fer ou demars boner, ki byento ou osi ou ava en *homeowner*.

Mon swe se ki sa lannen, mon pou demann sa Minister pou depans Bidze ki'n ganny *allocate* avel li. Sa i a fer ki tou sa bann proze ava materyalize e nou pou vwar en Sesel pli souriyan e plis dimoun ava kontan ler zot pe zwir lafors zot travay, lafors zot travay dir ki zot lakaz.

Mon vreman kontan ki Anse Aux Pins, Cayole pou benefisye anba sa *loan* \$15 milyon avek Fon Saoudyen pou devlopman. Sa i ava fer ki nou lalis *housing* ava redwir, avek bi ki tou dimoun ki lo sa lalis ava kapab finalman dir ki zot annan zot prop lakaz.

Mon pou fer li mon devwar Mr Speaker pou swiv sa proze tre pros. Sa premye *draft* ki ti ganny sirkile, bezwen ganny revwar avek bi ki nou met mazorite fasilite ki en *housing estate* i bezwen konmela.

Mon sir ki bann ki pou benefisye, pou vreman kontan zot nouvo lanvironnman e zot



pou fer li en landrwa kot zot pou viv koman frer ek ser dan lape ek larmoni. Mon pou dir zot kontinyen kont lo *LDS* e zot lavi pou enn ki pou ere.

Mr Speaker, i kler ki pou annan bokou dimoun ki pe dir ou pou dir ki bokou plis ti merit ganny fer, me parey Minis in dir nou en Gouvernman responsab ki pou fer sa ki fodre avek bokou prekosyon. Prenan kont ki nou vilnerab e depan bokou lo sa ki arive an deor nou pei.

Alors mon dir ek sa bann dimoun, zwen nou dan sa batay aköz se ansanm ki nou pou reisir, Sesel i pour tou son zanfän e fodre ki nou reste pozitiv pou nou vreman vwar sa bann benefis.

Reparasyon lakaz bann endividi ki pli dan bezwen e pa kapab rod finansman pou fer sa bann reparasyon. Sa i a en to R10 milyon. A sa staz mon konn en de dimoun dan mon distrik ki kapab benefisye avek sa lasistans. Mon pou pas kot zot pou vwar dan ki fason zot kapab rod sa lasistans.

Mr Speaker, R10 milyon in ganny met de kote pou bann lakaz anba proze scheme spesyal. Mon pou demande ki sa *scheme* i ganny byen gete pou ki i ava soulaz bokou bann dimoun ki vreman bezwen sa lasistans.

R18 milyon Mr Speaker in ganny met dekote pour

asiste bann dimoun ki ganny en saler pli ba ki R30 mil. Sa i an partenarya avek labank. Sa i kontinyelman demontre komitman Gouvernman *LDS* pou asire ki tou dimoun i benefisye pe enport ou saler le mwan. Kote ou pou vwar sa ankor.

Sa kalite lapros i pou fer sir ki nou zabitan pa reste *homeless* ou vin *homeless*. Selman en Gouvernman responsab parey *LDS* ki pour fer sa e nou pou kontinyen avek sa lapros. Nou promes sete pou get dan zot *welfare* e nou pe fer egzakteman sanmenm. *LDS* pou touzour pozitiv e pou toultan met Lepep Seselwa avan tou.

Mon oule felisit Gouvernman pou met dekote R5 milyon avek bi pou ed bann pansyoner dan renovasyon lakaz. Sa i pe ganny fer koman en *loan*. Mon oule demann Minis pou konsidere ki sa *scheme* i vin enn ki ganny donnen koman en *grant* aköz i pou bann pansyoner.

Mon sizere ki Gouvernman i fer sir ki sa bann travay pe al ganny fer pou benefis sa pansyoner. Ladministrasyon sa donn bezwen reste avek *HFC* aköz se li ki annan bann ekspertiz pou evalye e fer *assessment*.

*Part rental* i ankor sa fason ki Gouvernman i ede avek asiste bann ki dan

bezwen e pe peye tou le mwan pour zot ganny zot lakaz. Me antretan zot bezwen lwe en lakaz pou zot ek zot fanmir.

Mr Speaker sport. Lasante i rezilta sport. Alors i enportan ki nou annan bann fasilite kot nou zenes enkli lezot dimoun i kapab pratik serten spor e osi bann ki pa pratik sport, i kapab servi pou kit zot an bonn sante.

Gouvernman LDS pe investir dan sa bann lenfrastruktir ki'n ganny neglize dan lepase. Dan sa konteks Gouvernman pe fer sir ki sa bann fasilite i osi atiran pou asire ki nou mentenir en o standar.

Mon kontan letan mon tann Minis dir ki i annan dan Bidze R48.3 milyon ki'n ganny met dekote pou bann diferan lenfrastruktir sportif. Sa i enkli renovasyon lo Stad Linite, kot bokou dimoun i kontan al get foutbol. Sa i lavalier R5.5 milyon.

Kontinyasyon renovasyon *Palais des Sports* a en valer R7 milyon, in ganny donnen dan Bidze 2024.

Renovasyon *swimming pool*, kot bokou nou bann nazer ki'n fer nou fyer i bezwen *train* e kot mon sir bann zenn ki pou anmenn nou meday lor Zwe de Zil. e posiblerman meday Olenpik i normalman antrennen. Sa i a en kou R1.5 milyon. Sa Mr Speaker i en de

parmi sa kantite ki Minis in anonse dan son diskour Vandredi.

Mon pa pou fer zistis zabitan Anse Aux Pins si mon pa pas en pe lo sa ki nou annan dan sa Bidze, osi ki nou ti a swete vwar pou amelyor en pe plis lavi nou zabitan.

Semen Uranie Mr Speaker. Mr Speaker, Mr Speaker sa i en defi ki mon'n anmenn dan sa Lasanble depi ki mon pe reprezant LDS pour Anse Aux Pins. Mon ti fer sa ansanm avek menm sityasyon kot bann Monthy/Pillay. Mon kontan ki kot Monthy/Pillay in rezourd. Mon pe demande.

(laughter)

### **HON CLIFFORD ANDRE**

Mr Speaker sa se pa bann Manm Onorab ki dan Lasanble menm sinyatir Uranie, Monthy e Pillay. Mon kontan ki kot Monthy/Pillay in rezourd Mr Speaker. Mon pe demande ki en travay parey i ganny fer kot bann Uranie akot tro bokou letan in pase e sa bann dimoun i dan menm kondisyon.

Ler lapli i tonbe e bann ki napa transpor, zot soufer. Sa i en sityasyon ki mwan avek ansyen DA, nou'n get ladan e mon pe demande ki en solisyon i ganny vwar avek bi met bann dimoun ki reste dan sa semen Uranie dan menm

kondisyon ki bann ki dan semen Monthy ek Pillay.

Mon pour demann zot sa bann zabitan kot semen Uranie pou pasyante. Rezilta sa sakrifis pou arive. Ankor en lot semen ki depi bokou letan mon pe demande se sa enn ki al kot bann Payet, Capucin anler dan Kreson.

Sa semen pou deservi zabitan Anse Aux Pins osi byen ki zabitan Au Cap. Mon oule demande ki konsiderasyon i ganny pran pou vwar bann posibilite pou amelyor transportasyon pou mon bann frer ek ser ki reste dan sa rezyon.

Mr Speaker, i vreman nesaser ki nou fer keksoz pou zot. Mon pou ankor en fwa lev sa size dan Staz Komite avek Minis Transpor ler i vin dan Lasanble pli tar.

Semen Anse Faure. I enportan ki nou fer sa semen Anse Faure en pe pli gran pour donn bataz pour bann dimoun ki reste dan sa rezyon. Kondisyon dan sa semen i deplorab Mr Speaker. Ankor enn fwa mon pou poz sa kestyon dan Staz Komite avek Minister responsab.

Sa i osi tonm dan kad *service delivery*. Zabitan in fer zot demann, promes i ganny fer ki visit pou ganny enfektye, me naryen pa'n ganny fer.

Alors silvouple annou met nou zefor ansanm, pou fer

sir ki nou zabitan i zwir lafors zot travay e ki zot transpor pa ava kase senpleman aköz nou pa anvi delivre. Sesel i reste pour tou son zanfan parey mon'n dir avan. Alors annou reste pozitiv pou en Sesel pozitiv. Mr Speaker.

### **MR SPEAKER**

30minit Onorab.

### **HON CLIFFORD ANDRE**

Mr Speaker, Lapolis. (Pres pour mwan fini, Mr Speaker dernyen paz)

Mr Speaker Lapolis, mon oule vreman felisit nou Lapolis pou sa bann travay ekselan ki zot pe fer. I remarkab ki ler en lensidan i arive, Lapolis pa pran bokou letan pou *solve* sa *issue* e aret sa ki fodre ganny arete.

Mon pou demann zot pou *keep up the good work*, menm si zot annan serten defi ki zot pe fer fas avek. Mon konnen ki zot annan bokou konsern e parey in ganny dir zanmen resours i ase pour delivre parey zot ti a anvi.

Mon ti a oule fer ki mon'n fer li mon devwar pou vizit kordgard Anse Aux Pins ki dan en kondisyon pa akseptab. Sa kordgard i montre nou ki dan lepase planifikasyon pa ti a la oter. Sa i en keksoz ki nou bezwen revwar avek bi, fer sir ki bann devlopman ki nou fer i ganny byen, i ganny byen

revwar a lafen ki nou bann travayer a santi zot *safe* e zot delivre alaoter.

Mon oule konklir par dir avek zabitan ki nou bazar byento pour terminen e louvertir pou ganny fer. In annan serten retar dan sa devlopman, alors annou pasyant ankore en pe letan akòz parey mon'n ganny dir i pou en bazar modern, ase gran ki nou tou nou pou kontan.

Bann dimoun ki pou servi sa fasilite pou bezwen okip li zot menm. Alors mon pou demann zot pou komans prepar zot. Sa i pou zot e i pou ganny mentenir par zot. Nou reste konvenki ki zot pou vwar en fason pli byen pou fer ki sa fasilite i a dir pou bokou letan.

Mr Speaker, *US* i reste en opsyon pour Sesel fel!

### **MR SPEAKER**

Konklir, konklir Onorab silvouple.

### **HON CLIFFORD ANDRE**

Mr Speaker avek sa detrwa mo e refleksyon, mon oule donn Minis mon lasirans ki mon pour vot pou sa Bidze, akòz mon vwar ladan e mon vwar mon distrik ladan, enkli ki Sesel an zeneral. Mersi Mr Speaker.

**(APPLAUSE)**

### **MR SPEAKER**

Mersi Onorab. Laparol i pour Onorab Georges Romain.

### **HON GEORGES ROMAIN**

Mersi Mr Speaker. Bonzour Mr Speaker. Bonzour Minis, bonzour tou koleg Onorab, bonzour tou dimoun a lekout e bonzour envite ki dan Galeri.

Mr Speaker, Vandredi le 3 Novanm, Minis Finans in vin ankore enn fwa devan nou Lasanble pou prezant nou avek en Bidze, en pti pe plis ki R10.6bilyon pou lannen 2024.

E parey Minis Finans in fer resorti, sa i katriyenm Bidze ki'n ganny prezante ek nou depi ki sa ladministrasyon *LDS* in vin o pouvwar, dan en peryod letan ki ti ranpli avek bokou defi ek difikilte.

Mr Speaker, alor ankore enn fwa mon ti a kontan remersye Gouvernman Sesel atraver son Minis Finans, ek son lekip pou kapab vin ek en Bidze devan nou pou lannen 2024.

Mon pou dakor antyerman avek Minis Finans, ler i dir ki Sesel ozordi i ganny vwar koman en sikse o nivo mondyal, par lafason ki in sirmont son bann defi ekonomik ki nou'n vwar pli pir dan nou listwar pandan sa dernyen 3an.

Mr Speaker, se bann defi ki pa'n afekte zis Sesel, me lemonn antye. Me sa ki fer nou ganny regarde koman en

sikse, sete lafason ki Sesel koman en pei in fer fas ek sa bann defi.

Nou'n sirmonte Mr Speaker! E sa i fer ki tou nou lakonplisman ki sa Gouvernman in reisi ozordi in vin pli remarkab parey Minis in dir, anvi sa difikilte ki nou'n pas ladan.

Mr Speaker, ozordi ler nou reflesir kot nou sorti pandan sa 3 dernyen lannen e kot nou'n arive, nou bezwen rekonnet ki sa Gouvernman LDS in travay dir pandan sa dernyen 3an. In en Gouvernman ki'n annan en direksyon pou son pep e in kontinyen travay pou delivre lo son manda e prezerv stabilite.

Mr Speaker, wi nou bezwen fyer ki pandan sa 3an, enn pti moman letan ki Gouvernman LDS in o pouvwar in annan sa kantite lakonplisman pou nou pei. Nou bann travayer sekter piblik in kapab rezouir en logmantasyon saler boner sa lannen.

E menm depi lannen pase Gouvernman in fer provizyon pou zot reganny zot trezyenm mwan saler, menm si nou konnen ki Lopozisyon ti'n senm bokou propagann lo la.

Mr Speaker, nou'n vwar osi ki omwen 250 lakonpannyen dan sekter prive, ti'n osi onor sa trezyenm

mwan saler pou zot bann travayer e pou sa nou remersye zot pou lankourazman ki zot donn zot bann travayer.

Mr Speaker nou fyer pou nou vwar sa kantite lenfrastriktir ki Gouvernman LDS in kapab met debout ozordi. Ozordi bann Digwa i annan zot en zoli lopital modern, en promes ki ti zis en promes anba Gouvernman US me ki'n vin en realite avek Gouvernman LDS.

Menm parey nou lekol lasante ki Gouvernman US ti'n kit sa batiman pou abandonnen, me ki LDS in kapab ozordi remet sa fasilite debout e donn bann etidyan ki anvi fer en karyer dan *nursing* ou lezot profesyon lasante en lekol pou zot.

Annou pa bliy osi nou Libreri Nasyonal ki sa lannen Gouvernman LDS in kapab reouver son laport, apre en renovasyon mazer pou donn nou bann zanfann en landrwa kot zot a kapab servi pou siport zot laprantisaz.

Mr Speaker, ler nou get nou bann fasilite sportif bokou ti pe mal ganny zere anba Gouvernman US. I annan ki ti'n anvair, e ti'n ariv lo en nivo deplorab. Kot menm nou tim foutbol Sesel pa ti kapab zwe lo son prop laplenn e ti bezwen al zwe son *match home*, Moris oubyen Sid Afrik.

E sa Mr Speaker ti pe kout Sesel plis ki R600 mil sak fwa zot ti fer sa depar. E ozordi *US* in menm ganny lodas pou blanm sa Gouvernman pou en move performans dan *Zwe des Ile*. Kan saler zot ki koupab pou mal mentenir nou bann lenfrastriktir sportif, dekouraz nou bann atlet e fer nivo sport tonbe.

Fer lapenn Mr Speaker pou vwar sa degenn ki *US* ti'n kit ek nou, e la ozordi zot a vin dir enn nou Minis *resign*. Se zot ki'n fel nou bann atlet ! Mr Speaker, la mon le profite pou felisit tou nou bann atlet ek zot lantrener ki ti partisip dan *Zwe des Ile*.

E ozordi, ler nou reflesir lo progre ki Gouvernman *LDS* pe fer lo bann lenfrastriktir sportif, nou vwar *Palais des Sports* in benefisye ek reparasyon twatir e Stad Linite in fini deza ganny en nouvo laplenn e pe ganny en nouvo *track*, ki pou benefisye bann ki fer atletik.

E la dan Bidze, provizyon i annan pou kontinyasyon travay renovasyon pou Stad Linite e ankor pou *Palais des Sports*. E nou vwar osi en nouvo konstriksyon *indoor sport complex* dan Anse Royale ki pe al kout R15.6 milyon e an plis en lot R4.5 milyon pou renovasyon fasilite *sports complex* dan sa menm distrik.

Mr Speaker, sa pour ede pou desantraliz sport dan nou pei e i montre klerman devouman ki sa Gouvernman i annan anver bann zenn, e lenportans ki zot mete dan devlopman sport. La mon espere ki nou a kapab vwar osi en tel fasilite dan nor Mahe dan le fitir, ki nou zenn i a kapab benefisye.

Nou osi vwar ki Gouvernman in met de kote en sonm R10milyon pour mentenir fasilite sportif dan pei an zeneral. La ankor i montre ki nou Gouvernman *LDS* i anvi mentenir bann fasilite sportif ki'n kout bokou larzan lo en o standar. Ki nou bann zenn a kontinyen benefisye e sa i a ede pou ankouraz nou bann atlet pou fer pli byen dan zot bann konpetisyon sportif.

Devlopman ki Gouvernman in anmennen lo Praslin ek La Digue i vreman remarkab, Mr Speaker. Lo La Digue nou'n vwar travay ki pe kontinyen fer pou amelyor sistenm *sewage*, nou'n vwar lansman zot nouvo *jetty* milye sa lannen. En renovasyon lo zot kordgard, en nouvo lopital modern e la dan Bidze nou vwar ki La Digue pe al ganny en nouvo lekòl pou ranplas sa enn vye ki zot annan, avek enn pli modern e i kapab pli byen deservi nou bann zanfan.

Mr Speaker, Bidze in osi fer provizyon R8.7milyon pour zot nouvo lopital ganny en *stand by generator* ki a ede an ka i annan en koupir kouran lo sa zil.

Ler nou regard tou sa devlopman ki'n arive e ki pe kontinyen arive lo La Digue, eski sa parti ki apel *US* in demann zot lekor, ki vreman zot in fer pou La Digue pou sa 43 an ki zot in lo pouvwar? Larepons.

**(APPLAUSE)**

**HON GEORGES ROMAIN**

Larepons se ki zot in fel bann Digwa e negliz sa zil konpletman Mr Speaker.

Ler nou regard Praslin Mr Speaker, ankor nou fyer pou sa kantite devlopman ki'n ganny fer dan sa 3 dernyen lannen lo sa zil.

Ler mon'n vizit Praslin sa *weekend*, mon'n enpresyonnen ek zot nouvo *jetty* ek zot terminal ki apel Ero, ki'n kout R16 milyon. Sa fasilite i menm pli zoli e pli modern ki sa enn ki nou annan Mahe, ki amenn plis konfor pou bann pasaze. E sa i vreman met Praslin annord Mr Speaker. Felisitasyon pou sa tim par deryer sa travay!

E la dan sa Bidze nou'n aprann ki La Digue osi pou al ganny en nouvo terminal an 2024. I annan en proze – i

annan proze kato nwanr ki pou anmenn bokou loportinite pou Pralinwaz. E la zot pe al ganny en nouvo stasyon ki teste veikil ki a kapab ede pou amelyor standar transport lo sa zil.

Nou osi vwar zefor ki Gouvernman in fer pour fasilite letid pou bann etidyan Praslin ek La Digue ki pe al fer zot *A Levels* an 2024. Gouvernman in fer provizyon ki sa bann etidyan pa bezwen desann Mahe e kit zot fanmir deryer. Akoz aprezan i pou annan loportinite pou zot fer zot fer zot letid kot lekol *Vijay International School*.

Sa i montre nou ki Gouvernman *LDS* i pe kontinyen ekout konsern nou bann zenn e pe rod solisyon pou bann defi ki zot pe fer fas avek Mr Speaker. Tou sa devlopman, i montre travay remarkab lo sa 2 zil dan lespas zis 3an.

Mr Speaker, sa ladministrasyon in osi anmenn bokou zefor pou devlop nou bann semen dan sa pti lespas letan. Nou'n vwar en sonm R72.5 milyon ki'n ganny provizyonnen pou re sirfas bann semen lo Mahe, Praslin ek La Digue.

In annan lagrandisman semen ki'n konekte ek Victoria, par egzanp Mont Fleuri, lo *highway* e semen ki pe al ver Perseverance. Dan

Anse Etoile menm, bokou nou bann semen segonder in deza ganny en nouvo resirfas.

Dan Bidze 2024, nou vwar semen ki pe elarzi dan nor St Louis pou Beau Vallon e osi elarzisman semen dan sid was Mahe ki pou en zistans 17.2 kilomet, sorti dan krwaze Montagne Posée, Anse Boileau pou al Anse Royale. Tousala Mr Speaker, se bann proze ki pou fasilite mouvman, siport devlopman, amelyor sirkilasyon trafik e ogmant mezir sekirite lo nou bann semen.

Ankor dan sa Bidze 2024, nou'n vwar ki Gouvernman in fer provizyon R7 milyon pou azout en trwazyenm *lane* Pointe Larue e sa i a ede pour deblok bann konzesyon ki nou vwar tou le bomaten avek trafik ki sorti dan sid Mahe.

R6milyon in osi ganny met akote an 2024 pou kontinyen devlopman lo semen La Rivière Anglaise ki vin lo Ile Du Port e lagrandisman sa semen ki konekte Ile Du Port ek *IOT*. Tousala Mr Speaker, i bann zefor ki pou benefisye devlopman ek tou motoris ki servi sa bann semen.

Mr Speaker, ler mon'n ekout *meeting* piblik ki'n fer sa lannen, problem lakaz ek later in enn bann defi ki'n monte

preski toultan koman problem ki pe afekte Seselwa.

E ozordi nou vwar ki pli gro sonm dan proze lenfrastruktir pe ganny Bidzete pou sekter lakaz, pou en sonm R335 milyon. An tou, i annan 270 *unit* lozman ki pe al ganny konstrir dan bann diferan distrik.

E la mon kontan pou vwar ki Anse Etoile spesifikman dan La Gogue, nou pe al ganny nou 24-*unit* lakaz. Sa proze pou osi enkli fasilite *parking*, e enn pti fasilite zwe pou nou bann zanfan. Nou'n osi vwar dan sa Bidze en sonm R9.7milyon pou devlopman proze *land bank* dan La Retraite.

La mon kapab dir Mr Speaker, ki dan sa landrwa i annan 15 bout later ki ti'n fini ganny arpante e serten zabitan in deza fini fer laplikasyon e ankor pe espere. E la Mr Speaker, mon ti a fer en demann ek Minis pour Later, pou fasilite prosedir pour pli vit posib pou sa bann zabitan ki pe espere pou zot ganny zot kare later.

Mr Speaker, nou'n osi vwar sa *Scheme Part Rental* ki ti pe asiste dimoun ki pe esper en lakaz avek Gouvernman in ganny revwar pou kapab asiste plis dimoun ki bezwen en tel fasilite. Oparavan bann dimoun ki ti ganny lasistans,



ti kalifye si zot saler ti par anba R15mil par mwan.

Mr Speaker, apre nouvo revizyon Gouvènmman pe aprezan donn lasistans bann dimoun ki saler pa pli o ki R19 mil dan en fason kot plis dimoun ki merite a kapab ganny sa lasistans. Mon pe fer en lapel avek bann ki lo lalis pou ganny lakaz, pour fer sir ki zot azour avek zot peyman pou fasilite sa prosedir.

Mr Speaker, fleo sosyal koze par drog ek lalkol i ankor kontinyen menas nou popilasyon, espesyalman nou bann zenn. Nou kontan pou vwar alor ki Bidze 2024 pe fer provizyon pou en nouvo sant reabilitasyon La Rivière Anglaise e osi pe fer renovasyon lo sant Anse Boudin Praslin.

Tou lede pou deservi bann pasyan adiksyon. Sa i ava ede pour asiste bann dimoun ki'n ganny afekte avek sa fleo pou fer zot re entegre dan lasosyete.

Mon krwar sa i vremen enportan Mr Speaker, prenan kont lanpler ki sa bann fleo pe afekte nou popilasyon, e pli enportan son lenpak lo nou lafors travayer dan nou pei.

Mr Speaker, mon pou touzour donn mon sipor pou sa lager ki ladministrasyon LDS in deklare kont drog. Mon felisit tou bann manm lafors ki pe fer sa travay lo diferan nivo

e mon demann zot pou kontinyen dan menm laliny pou protez nou popilasyon.

Mr Speaker, i annan serten etranze ki'n esey antre dan nou pei avek drog dan zot lekor e sa i alarman. E alor i toultan enportan pou nou kontinyen rod nouvo fason pou detekte bann metod ki ganny servi pou anmenn drog dan nou pei.

Mon krwar Mr Speaker in plis ki ler ki Sesel i anvoy en mesaz kler avek lemonn, ki nou pei i serye dan sa lager kont drog e pour bann ki pe esey *bypass* nou sistenm, zot pou ganny *deal* avek seryezman.

Mr Speaker, mon pou bouz lo sektè lagrikiltir. Anse Etoile i en distrik avek bokou fermye e mon kontan pou vwar direksyon ki sa Gouvènmman pe ale vizavi *high tech farming* e lasistans ki pe ganny ofer pou bann fermye ki anvi investir dan sa bann metod pli efikas.

Gouvènmman in negosye avek DBS, a en total R63 milyon ki pou kapab ganny distribye atraver bann *loan* pou bann fermye. To lentere pou bann *loan* pli ba ki R3 milyon i pou 2.5 e par la R3 milyon i pou 5poursan, avek en repeyman lo en peryod 12an.

Mon ankouraz nou bann fermye pou konsider investir

dan sa bann proze ki pou definitivman anmenn plis rannman pou zot.

Mon'n note ki i annan en alokasyon R3.5 milyon pou sistenm irigasyon pou bann ferme an zeneral e la mon espere ki nou a kapab enn fwa pour tou, rezourd problemm irigasyon pour nou bann ferme dan Anse Etoile, espesyalman pour bann ki dan La Gogue.

Mon osi espere ki proze bazar legim dan La Retraite i ava demare tre byento, anvi ki larzan ti'n fini ganny Bidzete pou sa lannen. E la mon osi espere ki sa 2 proze semen ki ti'n ganny demarke pou fer dan La Gogue pou asiste ferme a osi ganny materyalize an 2024.

Mr Speaker, nou'n osi ganny enn de konplent dan Anse Etoile avek bann ferme ki pe ganny afekte avek bann dimoun ki vin vol zot bann prodwi e sa i dekurazan. Akoz ferme i travay dir pou zot rekolt e nou merit rod fason pou ogmant sekirite pou nou kominote.

E la, mon relans lapel avek Lapolis pou zot vin pli vizilan, espesyalman pou ogmant zot vizibilite dan nou kominote Anse Etoile. Akoz mon pou repet ankor, ki nou distrik i enn parmi ki pli gran e ozordi nou napa en kordgard.

Nou konnen ki Lapolis Perseverans pe donn en koudmen Anse Etoile, me nou pe fer en lapel pou plis prezans Lapolis dan nou kominote.

Lo kote lapes Mr Speaker, nou'n vwar ki Anse Etoile in benefisye dan sa dernyen 3an. Nou'n ganny en nouvo bazar e fasilite *ice plant* ek *gear stores* pou nou bann peser La Retraite. Mr Speaker, nou konnen pou annan en redevlopman byento otour sa bazar pou anmenn lezot fasilite pou bann zabitan.

Nou kontan ki travay pou nouvo bazar Anse Etoile pe al demare tre byento e nou'n fek zwenn avek bann peser ansanm ek Lotorite Distrik ek zofisye SFA, pou eksplik striktir nouvo bazar e lafason ki travay pou ganny fer.

A sa pwen, mon anvi remersye SFA pou mobiliz resours pou ede avek sa proze. E la Mr Speaker, mon ti a kontan osi remersye senserman enn nou zabitan Anse Etoile ki en biznesmenn ki'n pare pou *sponsor* en bazar tanporer pou bann peser kapab servi ler nouvo bazar pou an konstriksyon.

E lo la par tou zabitan Anse Etoile, nou dir li mersi pou son zenerozite ek son sipor.

Mr Speaker, Gouvernman LDS in demontre son langazman pou ekout son

pep atraver tou sa bann *meeting* piblik ki'n ganny organize dan milye sa lannen.

Sa ti en lokazyon pou manm piblik kapab vin eksprim zot lekòr libreman san lafreder. En keksoz ki ou pa ti pou vwar dan le pase. Sa dan li menm se en gro lakonplisman dan la demokrasi en pep Mr Speaker.

Ti annan fristrasyon ki ti ganny met a latansyon Prezidan ek son bann Minis e kot nou'n vwar bann keksoz vreman senp ki ti pe koz sa bann fristrasyon e met retar pou sa dimoun ki ti pe esper en larepons, swa atraver en let, en *phone call* ou menm en vizit.

E la Mr Speaker, i enportan pou fer remarke ki la mazorite letan i pa ti bann keksoz konplike pou rezourd. I ti bann senp aksyon, tel ki fer swivi lo bann problem, reponn *email*, reponn telefonn, tenir promes ek sa kliyan. Se sa lafason ki nou merit travay. Akòz ler nou aktivman reponn lapel nou kliyan, nou pou kapab anmenn plis lefikasite dan servis piblik.

E la mon le profite pou felisit tou bann ki pe donn tou, e menm donn an plis pou asire ki zot reponn lapel e satisfè manm piblik. Me par kont Mr Speaker, nou konnen ki i annan ki ankòr pe kontinyen fer dimoun monte desann e

menm fer ekspres pou kontinyen senm fristrasyon dan nou pei.

E se sa kalite mantalite ek latitud ki merit ganny sanze dan nou pei o pli vit posib. Si non aksyon sever i merit ganny pran par lotorite avek sa bann ki kontinyelman met bar dan larou. Zot in ganny ase letan pou prouv zot lekòr. Annou pa bliye se kontribisyon tou dimoun ki pe travay ki konte pou fer en pei progrese.

Mr Speaker, si nou asize e fer en bon refleksyon lo travay ki Gouvènmàn LDS in fer pandan sa 3an, e si nou onnet e fran ek nou lekòr, nou bezwen dir, "Wi, Sesel in fer bokou progres anba sa ladministrasyon LDS". Pa bezwen ou en syantis oubyen doktè pou vwar sa Mr Speaker.

Menm avan eleksyon 2020 Mr Speaker, US ti fer sorti for ki si LDS i vin o pouvwar avyon pou aret anvole, pour aret vin Sesel, dimoun pou perdi zot lanplwa, biznes pou tonbe e pou napa devlopman dan nou pei. Me nou tou nou'n kapab vwar travay ki sa Gouvènmàn LDS in fer dan sa pti moman letan.

**(APPLAUSE)**

**HON GEORGES ROMAIN**

Sa i koz pou li menm Mr Speaker.

Mr Speaker, si nou ti anvi fer politik popilis par zis donn larzan parey Lopozisyon i anvi fer nou krwar, ozordi nou ti pou enn sa bann pei ki ti pou ankore pe pas dan bokou difikilte e nou ti pou napa sa bann devlopman semen, lenfrastruktir, lopital, lekòl ek lezot ankore.

Ozordi nou annan en lopozisyon ki'n deregle, ki napa en vizyon, ki pe zis senm propagann pou konfiz pep Seselwa e esey fer Seselwa krwar ki tou keksoz dan sa pei pa bon. Menm zot *leader* fek dir dan zot *rally* ki i sagren e son larm i koule ler i vwar Lopital La Digue i vid.

Be Mr Speaker, si bann Digwa pa malad, i vdir zot an bonn sante e zot pa pe mor lafen parey in fer resorti!

**(APPLAUSE)**

### **HON GEORGES ROMAIN**

Apre, eski lopital i en lotel, kot i merit plen?

Mr Speaker, eski sa menm kalite *leader* ki le vin Prezidan dan nou pei? I kler ki Seselwa i pli entelizan ki sa, pou anval sa bann kalite largiman, fer lapenn pou vwar.

Olye felisit sa devlopman ki en lakonplisman pou nou pei, in prefere kritike e vwar zis negativite. Mr Speaker,

parfwa zalouzi i kapab fer ou rabase.

Nou'n menm tann zot pe fer bann gran promes tel ki fer laz retret retourn 63 an, donn en trezyenm mwan saler ki garanti, savedir travay, pa travay, ou pou gannnen menm.

Ogmant saler de baz, entrodwir en *scheme welfare* zis pou La Digue, donn 75poursan konsesyon lo *fuel* pou La Digue e tir tou *port fees* La Digue.

Be Mr Speaker, mon pa tro konnen ki kalite kalkil ki zot in fer, oubyen ki mannyer zot in konte, me definitivman i annan en problem ek zot kalkil. Sanmenm ki ou apel politik popilis. Vre ler ou pe noye, ou pou sey tyonbo nenport kwa!

Nou lo sa kote latab nou anvi dir zot ki Gouvernman LDS i pa zis koze, me in prouve ki i kapab fer dan zis 3an dan son manda 5an ki in gannnen. E ki Sesel i lo bon semen e sa pa zis nou ki'n dir Mr Speaker, me bokou pei o *monde* ek bann lenstitisyon enternasyonal in rekonnet sa e nou fyer pou sa.

Mr Speaker, Sesel i en pei ki beni e ki lamazorite son popilasyon i annan en lafwa relizye, ki fer ki nou viv byen ansanm dan larmoni, menm nou bann diferans.

Me par kont Mr Speaker, resaman nou'n vwar etranze ki

pe antre dan nou pei e ki pe ede senm bann krwayans *voodoo* e sa i kapab ede pou kre enstabilite parmi nou pep.

Annou pran legzanp dan serten pei Lafrik e bann lezot leta zil dan *Caraïbe* kot sistenm *voodoo* in anzandre dan zot fason viv e ki ozordi i enteresan pou vwar, ki zot bann menm pei, ki napa stabilite. Eski sa ki nou anvi vwar dan nou pei Mr Speaker?

Kot en serten group dimoun pe promouvwar *voodoo* dan nou pei? Kot dimoun mor i ganny detere, Legliz i ganny kase e lafreyer pe ganny senmen dan nou pei?

Sa in sok bokou Seselwa e i definitivman i pa en keksoz ki Seselwa i krwar ladan e nou merit fer sir ki ban tel aksyon koumsa pa zanmen vin afekte nou trankilite ek stabilite nou pei e ki sa i pa devret annan en plas dan nou pei.

Mr Speaker, an konklizyon, mon ti a kontan remersi tou zabitan Anse Etoile pou sa sipor kontinyel ki zot pe donn mwan pou sa travay ki nou pe fer ansanm avek Lotorite Distrik.

La mon le reasir zot ki nou bann proze distrik pou kontinyen la ki nou'n ganny enn pti pe plis larzan pou devlopman bann pti proze pou nou distrik.

2024 nou pou vwar proze agrandisman semen dan La Retraite e dan La Gogue. Proze azout plis *crash barriers* dan plizyer sou distrik, nou pe met omwen 3 *bus shelters* dan Anse Etoile. Proze re sirfas semen pou kontinyen kot i merite e proze lalimyer pou osi lo nou azanda pou 2024.

La mon le profite pour remersye bann antite tel ki Gouvernman Lokal, SIA, LWMA, SLTA, SFA, PUC, MLH, HFC, PMC e ASP pou zot sipor ek servis ki zot donn nou distrik e dan tou bann proze ki nou pe enplimante.

Mon ti a osi pran sa loportinite pou remersye nou Prezidan, nou Vis-Prezidan ek tou nou bann Minis, pou sa travay dir ki zot pe fer, menm an fas avek bokou defi. Me nou konnen ki zot pe travay pou devlopman Sesel, e pe donn bokou zot zefor e letan pou delivre sa ki meyer pou Sesel.

Mr Speaker, remersiman i osi i al pou nou Minis Finans ek son lekip ki'n travay dir pou donn nou en Bidze, ki vize ver kontinyasyon travay pou anmenn en transformasyon pozitiv dan nou pei. Sa i donn nou lespwar ki avek en Gouvernman LDS, nou lo en bon semen e ki nou lavenir i dan bon lanmen.

Avan mon fini Mr Speaker, mon osi oule remersye mon Clerk, Madanm

Doreen Dugasse e DA Anse Etoile Ms Shirley Mussard ek son tim, pou sipor e sa bon travay ki nou pe fer ansanm pou nou distrik. Mon ti a kontan remersye nou per laparwas, Per Lonnie Adrienne, pou son sipor ki i donn nou kominote.

E la osi, mon pran sa loportinite pou remersye tou bann *sponsors* ki'n ede pou nou kapab organiz bann aktivite pou nou bann zabitan dan Anse Etoile. Nou apresye kontribisyon ek zot sipor.

Mr Speaker, mon priye ki Bondye i a touzour protez nou zabitan ek nou pti pei Sesel e ki 2024 i ava en lannen ki ranpli ek prosperite pou tou Seselwa. Mersi Mr Speaker.

**(APPLAUSE)**

**MR SPEAKER**

Mersi. Laparol i prezan pour Onorab Audrey Vidot.

**HON AUDREY VIDOT**

Mersi Mr Speaker. Bonn apre midi Mr Speaker, tou Manm Onorab, Minis, tou dimoun ki a lekout, e en bonzour spesyal pour zabitan Roche Caiman.

Mr Speaker dimoun ki glorifye e krwar dan *voodoo*, i koz *voodoo*. Dimoun ki konnen lekel ki kas legliz e pronons li lo la, se sanmenm sa bann ki krwar dan *voodoo*.

Dimoun ki ganny anpese ganny met deor dan legliz se sanmenm sa bann ki krwar dan *voodoo*. Nou dan *United Seychelles* nou pa ni enterese avek zot *voodoo* aköz nou, nou krwar dan en Met, en Kreater e sa nou Bondye Papa! Mersi.

**(APPLAUSE)**

**HON AUDREY VIDOT**

Mr Speaker ler Lepep Seselwa i fou *LDS* laba e *US* i rebran pei 2025 dan bwat vote. Se la atraver ou Mr Speaker, ki mon le dir Onorab Georges ki i pour konnen ki mannyer nou pour ganny larzan pou nou kapab redres nou pei.

**(APPLAUSE)**

**HON AUDREY VIDOT**

E si nou, nou le rekonpans travayer Seselwa ki pe travay dir e ki pe kontribye dan Sesel, oli problem si *United Seychelles* i oule donner.

**(APPLAUSE)**

**HON AUDREY VIDOT**

Par kont mon le dir Onorab Georges atraver ou Mr Speaker, ki *LDS* i konn zis pran, pran e pran tou sa ki apel pour zot e zis pour zot.

**(APPLAUSE)**

**HON AUDREY VIDOT**

Mr Speaker dan tou sosyete imen i en mark sivilizasyon ki bezwen annan konfyans ant la gouvernans e sa ki pe ganny gouvern pei. Depi lo konmansman lannen 2020, ladministrasyon LDS in deside vol konfyans sa pep. E zot premye mark stil gouvernans se mansonz.

Mon komans koumsa Mr Speaker, aköz en Bidze i en kontra finansyel dan depans pei lo dibyen nou pep, lo lavenir nou zanfän pour sa 12 mwan ki pe vini, ant Gouvernman e nou Lepep Seselwa ki pe ganny gouvernen.

Sa i parey nenport ki relasyon, ki swa ant en paran e son zanfän, en anplwayer ek son anplwaye, ou menm en koup. Nou get tou relasyon i depan lo konfyans.

Mr Speaker, ladministrasyon LDS ti konmans avek en prononsyasyon Egzekitiv. Sa ki zot ti prononse sete kof vid, ek kales kase. Apre ki nou lo sa kote latäb nou'n lager, nou'n koze, nou'n eksplike. La sa lannen dan *meeting* piblik zot in finalman admet ki pa kof ki ti vid, pa kales ki ti kase, me sa kont 14-01 ki ti sipoze ranpli – ki ti sipoze annan finans Bidze ki ti vid.

Dan Bidze 2020 ti annan en provizyon R500milyon *loan* avek Labank Santral,

zisteman pour ranpli sa kont 14-01. Mr Speaker zot kapab apel li kof, apel li kof, apel li kales kase, apel li kont 14-01, lefe i reste ki i pa ti vid.

E sete sa R500 milyön ki zot in servi ler zot ti antre an 2020 ziska Avril 2021. Lannen ki Bidze ti pas pli tar, aköz ti annan larzan pour depänse e sete Bidze ti pas an Avril.

Mr Speaker, mon'n komans etabli baz ki mannyer ladministrasyon LDS i mansonz, e ki zot in komans par vol konfyans sa pep.

Däbor mon pour senpleman demänn 2 kestyön ki mon anvi poze ozordi. Kwa, ki sipoze donn mwan e zabitan Roche Caiman konfyans ki zot pe koz laverite avek nou ozordi ?

Kwa ki sipoze enspir konfyans dan mwan ki sa Bidze ki Minis in prezante i laverite, tou laverite e ryen ki laverite ?

Mr Speaker premye reaksyön ki mon'n gannyen lo Bidze 2024 se kan ki sa ladministrasyon pour äret pran kredi lo travay ki nou bänn frer ek ser Seselwa in fer. Pour ki ozordi sa menm ladministrasyon kapab annan plis ki en fondasyon pour batir lo la?

E la mon pe fer referans lo fondasyon ki'n depan lo devlopman soutenab, kot nou'n kapab garanti lanplwa, kreasyon larises ki nou pei ti

bezwen, e tou sa avan Oktob 2020.

Alors i kler pour nou, ki se lo sakrifis travay dir ki nou pep ki'n kontribye, ki'n permet Minis ek son bann koleg byen aranz zot avek zot bann gro alawenns.

Andotmo zot in pran tou sa ki ti apel pour zot Oktob 2020 dan moman kot ti annan ekonomik difisil. Alors, pa krwar zot pour sey anbet pep Seselwa!

Mr Speaker Minis ek son ladministrasyon i bezwen vin pli fran e onnet avek Lepep Seselwa. Nou Seselwa i bokou pli entelizan pour konpran e rekonnet ki si ozordi in ganny vwar koman en sikse ekonomik lo nivo mondyal, sa i aköz ladministrasyon *United Seychelles* in toultan montre langazman anver devlopman ki santre lo dimoun. E ki'n pran konsiderasyon bann faktor imen e desizyon Polisi ek son bann mezir.

Sa i fer ki sa bann pti ek mwayen biznes osi kapab annan en rol enportan pour zwe dan lekonomi Sesel. Erezman avek sipor ladministrasyon *United Seychelles* ki ti met an plas bokou sa bann pti ek mwayen biznes in kapab kontinyen fonksyonnen e tenir lanplwa pou Seselwa kapab kontinyen benefisye ek en saler pandan

ki ti pe fer fas avek *COVID* e gard pei stab.

Kontrerman avek ladministrasyon *LDS*. Enkonpetan, ki pa konn priyorite pei, napa en sou konpasyon pour son pep, ki'n konn zis sakouy pye e manz tou fri. An plis olye batir teren pour kre lespas pour ki tou dimoun i benefisye. Non! Zis en pti group.

Sa ladministrasyon iresponsab, i prefere depans larzan lo en bann proze kapital kot apre napa larzan avek resours imen pour zot kapab fer li fonksyon e mentenir son nivo alaoter.

Prezan Mr Speaker, ki mannyer nou pou kapab krwar ki sa ladministrasyon i annan ase konpetans pour delivre avek sa Bidze ki la devan nou?

Mr Speaker, nou dan *United Seychelles* nou ti konnen ki konsekans debalans sa latap, tou dan faver *LDS* e pour donn zot tou pouvwar. Sa ki pa ti konnen ki mannyer sanzman radikal pour ete i tre senp.

Avek Gouvernman *United Seychelles*, devlopman imen ti santre lo dimoun, espesyalman bann ki pli vilnerab e nou bann profesyonnel par rekonnet e apresye zot kontribisyon e travay dir. Me avek en ladministrasyon *LDS*, ozordi



sa ki pli prov, i vin pli prov sa ki ris i vin pli ris.

Apré zot sey anbet Seselwa ki tou sikse Sesel in vin apré Oktob 2020. E ki Bidze 2024 i kontinite sa progre. Be non, pour ki zot pran Kreol la deor?

Mr Speaker, sa ki Minis pa oule rekonnet, se ki Seselwa in touzour en pep determinen, rezilyan, kouraze e debout fyer pe enport ki son kouler lapo, ki son krwayans spirityel e ki son kouler parti politik.

Sa dernyen 30an, ladministrasyon *United Seychelles* in kapab batir en lekonomi pli rezilyan pour satisfè demann plizyer biznes dan pei.

E ankor tou sa ki'n ganny fer pour bann antreprenèr Seselwa ki'n travay dir e ki annan prosperite Sesel aker pe enport nou diferans.

E dan sak Bidze anba manda *United Seychelles*, Seselwa ti kapab vwar kote i sitye ladan. E ler Minis i dir ki travay son ladministrasyon i kontinyen, zot in fer bokou e annan ankor bokou pour fer. Seselwa la deor i fristre, akòz zot konnen ki Bidze 2024 i zis en lot lalis promes, ki pa ni pou kapab fini ganny delivre parey sa bann lannen presedans.

Mon konnen mon bann lezot koleg pour ilistre, zis mon

a donn enn pour komanse, parey legzanp konpansasyon bann dimoun ki pe espere pour *fungus* dan kot Departman Kiltir.

Mr Speaker, sa ladministrasyon pa ni menm kanmi pou vin donn nou leskiz ki zot transformasyon ki zot oule vwar pa pou arive dan 3 an e ki pour enn ki lonterm.

Be Minis, zot lonterm pe aprozè! Sa mazorite Seselwa ki ti donn *LDS* en manda 5 an lonterm, pour li kapab fer pli byen, pe dir, '*Enough is enough* e in ler pour zot ale!'

**(APPLAUSE)**

### **HON AUDREY VIDOT**

Pa pe kapab donn zot plis ki 5 an, akòz sa morso kartron ki zot dirizan ti dir, met dan nou fon kannson e gara nou ler i vin o pouvwar, Seselwa pe dir sa morso kartron in fini desire depi dan lannen 2021.

E partou kot nou pase, mesaz nou bann frer ek ser Seselwa pe dir ladministrasyon *LDS*, in ler pour zot ale. E menm si zot pou vin avek zot poban dimyel pour vin pas o bor zot labous, zot pe dir Seselwa pe dir ek zot pa pe tande!

Mr Speaker, apré 3an konsekitiv ladministrasyon *LDS* pa'n fer lavi nou bann sitwayen eze dan kominote. Menm si in ganny dir ki zot

enportan dan byennet nou pei, me an pratik Minis avek son administrasyon in fel sa pep !

Nou bezwen admet ki zot konpetans i for zis lo fer plan, plan lo plan. Me par kont zot annan en administrasyon telman inefikas e enkonpetan pou delivre lo promes. An plis zot mal onnet kot i koncern rekonpans tou travayer Seselwa.

Erezman Seselwa i annan en *United Seychelles* ki pe kapab annan kouraz e determinasyon pou koz pou zot e konpran zot soufrans.

Mr Speaker, dan en manda 5an, 3an ki administrasyon *LDS* in la. Premye lannen zot in zis pres, Sesel pour tou son zanzan. Me apre olye get dan *welfare* zanzan Sesel zot in get zot lekor an premye avek zot bann gro, gro alawenns.

Lannen answit zot in pres transformasyon. Kot travayer servis piblik ti ganny 10poursan logmantasyon saler ek en group travayer ti ganny kit ater. E la an 2023 nou tann *LDS* pe koz lo administrasyon pozitiv.

Wi Mr Speaker zot pozitiv lo koz mansonz, anbet sa pep e vol konfyans nou bann frer ek ser Seselwa.

E mon pour elabor lo la. Lannen pase zot pozitivite sete pour donn 10poursan logmantasyon saler. E letan

*US* ti analiz sa logmantasyon, nou ti ganny dir ki nou negativ. La prezan zot le donn politisyen bann pli gro logmantasyon an plis zot in pran tou zot bann gro alawenns pour zot.

Ler nou, *United Seychelles* nou'n analize ankor enn fwa nou'n dir. Zot dir nou, nou negativ. Ler nou, nou koz laverite, e realite ozordi.

Zot pe konpran prezan aköz mon'n demann mon de kestyon. Kwa, ki sipoze donn mwan ek zabitan Roche Caiman konfyans pour krwar ki zot pe koz laverite ozordi? Kwa ki sipoze enspir konfyans, ki mwan dan sa Bidze ki Minis in prezante ki zot pe koz laverite ozordi?

Mr Speaker, mon premye konversasyon avek en madanm retrete lo diskour Bidze. Sa madanm i dir avek mwan, 'Onorab Vidot si Prezidan pour ganny son logmantasyon, kan ki nou bann pansyoner nou pou ganny pou nou?

Si bann Minis i ganny pour zot, kan nou pou ganny pour nou? Aköz mon ti tann dir dan *rally* Anse Royale, ki dan Bidze 2024 pou annan keksoz pour nou.

Onorab Georges bomaten in dir li osi, ki tou dimoun pou benefisye, selman sa madanm i annan son parfetman rezon, aköz i parmi

sa bann pansyoner ki ankor pe esper son R10mil menm si *LDS* i lav son lanmen ladan, ler nou koz lo la.

Mr Speaker, en paran tousel in dir mwan partaz son lopinyon e son santiman dan repons Bidze 2024. Sa madanm i fer mwan rapel ki lannen pase, i ti tann en Manm *LDS* dan Lasanble ki mannyer sa Bidze 2023 i sitan bon, ti sitan byen. In byen bennyen, in byen pize, napa en pis lo la.

E anviron 4 mwan apre sa madanm in vwar li ek son lapey koman *carer* pour son zanfan dezabilite ganny koupe. Sa madanm pe fer fas avek difikilte finansyel, e pe mentenir ek difikilte pour li mentenir son fanmir e son lakour. Si mon bann koleg lo lot kote latap pa pe konpran son soufrans, mwan Onorab Vidot mon konpran.

I pa pe ganny dimoun pour kapab - ki i kapab *trust* pou li kapab kit son zanfan avek. Apre sa demi zournen pou okip son zanfan ki ganny li *half day carer* pour li kapab rod en lot louvraz pour li konplemant en larzan adisyonnal, pour li fer 2 bout zwenn kot son lakour.

E i enportan note ki pa zis sa madanm ki pe pas dan difikilte parey, plizyer ankor.

Alors Minis, ou pe konpran laliny mon de

kestyon pli boner kote mon pe antre! Mr Speaker lannen 2025, enn bann premye keksoz ki nou lekip *United Seychelles* pe vin fer, ler nou repran nou pei avek sa bann dirizan *learner*! Se nou pe vin revwar sa bann Lalwa ki vyol *privacy* nou bann frer ek ser Seselwa.

Ozordi sa zanfan Roche Caiman - sa zabitan Roche Caiman, ki pe rod en lasistans, Gouvernman i kapab fouy lo son kont ek pour son manm fanmir pros, san ni menm garanti si i pour ganny sa led.

Selman en bann gro msye ek *belle dame*, nou vwar zot pe ganny proteze par Lalwa. E se lekip *LDS* ki responsab pour lamannman Lalwa, deklarasyon bann byen ki ganny fer zis pour protez politisyen ek zot fanmir.

Oli lazistis? Oli sa tretman - aköz sa tretman preferans? E ki zot lentansyon dan anmas lenformasyon sa group dimoun vilnerab? Oli zot dinyite?

Mr Speaker, devan nou, nou annan en Bidze 2024. En Bidze ki *LDS* i le fer nou krwar ki i en dyanman sikse 3an. Dapre zot sa 3an ki'n swiv 43 an kot napa nanryen ki'n ganny fer. Realite i devan nou, se dan sa 43 an ki Lepep in kapab viv pli byen, bokou pli sen, pli an bonn sante, pli an

sekirite, e bokou pli anpe. Larealite Mr Speaker i la. Zot, zot kapab riye lo lot kote latab, me larealite e laverite i la.

**(APPLAUSE)**

**HON AUDREY VIDOT**

Mr Speaker, laverite se ki sa Bidze 2024 ki devan nou napa nanryen ladan ki adres problem sa 3 an ki nou'n viv; ki nou bann dimoun la deor ki'n tap laport, ki'n sipliye pour rod en sipor. Napa nanryen ki'n amelyor zot sityasyon lavi kot i konsern zabitan mon distrik Roche Caiman.

Minis ou Bidze, Bidze ou ladministrasyon pa donn okenn lespwar pour amelyor e fer lavi Seselwa espesyalman zabitan mon distrik eze.

Mr Speaker, mon pour konklir, mon pour dir par remerci tou zabitan Roche Caiman ki'n partaz zot bann pwennvi e santiman avek mwan kot i konsern sa Bidze.

Bann ki mon pa'n ganny sans pas zot pwen, pa trakase i pou annan loportinite spesifik dan bann departman ki zot in met zot bann konsern devan pour mwan rod klarite.

E la lannen pe al terminen. Mon le sezi sa loportinite pour mwan dir mersi, tou zabitan Roche Caiman ki'n akey mwan ler mon'n pas devan zot lakour, e

pour zot sipor avek zot gidans pour lannen 2023.

Mon osi sezi sa loportinite pour mwan felisit mon manm fanmir, zanmi, mon *clerk* Madanm Linda Moustache, mon lekip *United Seychelles* Roche Caiman, ki ganny gide par mon manm komite santral Miss Vicky e finalman nou lekip *United Seychelles*, ki ganny dirize par Dokter Patrick Herminie.

Mersi pour tou zot sipor. Mersi tou bann travayer Lasanble Nasyonal, lo nivo distrik pour tou zot sipor. Mon swete ki zot fer zot en bon Nwel dan lanmour, dan lape. Mon swet zot tou boner e prosperite e ki Bondye, wi Bondye nou papa a kontinyen beni zot tou. Mersi Mr Speaker.

**(APPLAUSE)**

**MR SPEAKER**

Ok, nou a pran poz dan deba la. Mon le rapel bann Manm *Assembly Business Committee* ki nou pe rankontre avek SS Payet pour desid lo *schedule* Komite. Nou a fer li – nou a zwenn 12.45. Koumsa zot a ganny letan apre pour lezot lokipasyon. Nou a rebran travay 12.45?

Eskiz mwan Madanm Clerk i dir mwan in fini notifie SS Payet pour 1er alor nou a gard sa. 1er. Mersi. Nou a rebran travay 2er.

**(BREAK)**

*(Mr Deputy Speaker in the Chair)*

**MR DEPUTY SPEAKER**

Bonn apre midi tou bann Manm Onorab, tou bann *staff* e tou dimoun ki pe swiv travay Lasanble pou sa Merkrede 8 Novanm. Nou pe kontinyen dan staz deba lo *Appropriation Bill*, 2024. E *Chief Whip* LDS, Onorab Arissol in enform mwan ki i annan en sanzman prosen enterven an lo lalis, baze lo lalis ki ti'n ganny sirkile dan group *ABC*.

Donk, i pa pou Onorab Labonte la, me nou pou envit Onorab Michel Roucou pou pran laparol.

**HON MICHEL ROUCOU**

Mersi Mr Speaker. Mr Speaker, eskiz mwan zis mon pou donn mon leskiz, akòz mon annan en problem ek mon lavwa. Sanmenm ki mon pa'n fer mon diskour en pti pe pli long pou larestan Manm.

*Well*, mon a dir bonn apre midi Minis e tou bann Manm Onorab. Bonn apre midi tou zabitan ki pe ekout nou dan lakour, espesyalman zabitan Mont Fleuri.

Mr Speaker, i en plezir pou mwan koz lo sa Bidze anmennen par Minis Hassan. E pou mwan ler mon get sa

Bidze. I en Bidze vreman pozitiv. En Bidze ki en kontinyasyon pou anmenn sa devlopman e prosperite pou nou pei Sesel.

Mr Speaker, ler mon'n ekout Manm ki'n koz avan mwan mon'n dezapwente. Mon dezapwente akòz sa Manm son distrik i baliz avek dan nou rezyon. E dan sa Bidze li menm li i annan bokou keksoz ki zabitan Roche Caiman, li menm li i kapab vwar li ladan.

E zis parey mon'n gete mon'n vwar lo kote bann fasilite *sport* li menm li. Laplipar i tonm dan son distrik Roche Caiman. Mon'n vwar Stad Linite ki i annan gran renovasyon ki pe ganny fer, *Palais des Sports*. I annan *swimming pool* li menm li. Kot sa i benefisye zabitan li menm li akòz i en distrik ki annan pou fer avek bann lenfrastruktir ki annan pou fer ek *sport*.

E osi Roche Caiman in benefisye avek plizyer keksoz ankor. Lagrandisman semen Bois de Rose ki pou desann anvil. Ozordi ou pa vwar sa kantite trafik. Lakaz ki tou dernyerman nou'n vwar Onorab li menm li pe reprezant son distrik ladan, donn en pti *speech* son bann zabitan.

Bokou keksoz ki zabitan Roche Caiman in vwar li in

benefisye. E osi dan sa Bidze ki la i pou vwar li osi tou pe benefisye ladan Mr Speaker.

E mwan mon krwar parey Onorab in dir se ki okenn dimoun ki tou bann dimoun ki koz lo kote gri, gri li menm li i frekant gri, gri. Be Onorab, li menm li i ti pe koz lo kote pirze. Be savedir Onorab li menm li fodre i ganny pirze.

Mr Speaker, lo kote sa Bidze ki Minis in dir parey lo konmansman. Parey mon'n dir mon *speech* pa pou sitan long. E mon le remersi Minis mwan osi ek son lekip aköz mon konnen poudir avek lensertitid ki annan dan lemonn ozordi. Lager Larisi avek *Ukraine*. Lager ki annan Izrael e tousala i met en presyon lo nou isi Sesel.

Akoz nou en pti pei ki depan lo marse touris. E Izrael li menm li i an en landrwa kot touris ti pe vin bokou Sesel.

E ek bann lezot ankor keksoz ki annan lenpak direk lo nou pei li menm. E ler mon pe get dan sa Bidze ki Minis in anmennen. Lepep Seselwa i annan en ta keksoz ladan ki i kapab dir ki i pou vwar li menm li, espesyalman zabitan Mont Fleuri Mr Speaker.

Ler mon get bann eleman ki annan dan sa Bidze. Zis pran konparezon lo kote Minister Lasante. Malgre ki in annan bokou defi, bokou

keksoz ki devret ganny amelyore, ganny aranze.

Nou'n vwar poudir Gouvernman, nou Gouvernman *LDS* ki'n la pou apepre 3an in fer bokou, bokou e bokou li menm li. E menm nou pe vwar poudir Gouvernman pe tap tou pou nou kapab ganny en nouvo lopital.

E dan sa Bidze Mr Speaker, ki Minister Lasante pou gannien. Mon'n vwar poudir i annan plizyer keksoz bann kontinyasyon, bann keksoz ki nou menm nou konman bann dimoun ki pou al rod sa servis ki nou pou gannien.

Zis en konparezon Mr Speaker, latizann. Latizann nou vwar ki pou ganny bidzete pou 73.6 milyon. Sa pou ede kot i kontinyen annan sa kontinyasyon kot nou annan latizann. Mon pa dir poudir demen i pou napa en letan kot petet pou annan sa pti mankman.

Be selman *at least* nou konnen poudir sa larzan i la. In ganny met dan Bidze la ki pou benefisye Lepep Seselwa.

Tretman dyaliz Mr Speaker. Tretman dyaliz osi tou i annan en Bidze la ki'n ganny mete 76.7 milyon. Kot la i pou ed nou bann frer. Nou bann manm fanmir. Nou bann ser ki zot menm zot, zot bezwen sa tretman sa servis li

menm li kot i ava annan sa kontinyasyon.

E zis mon kapab mazine parey i annan mon gran dalon Mr Neville Sinon ki tanzantan nou dyalog en pti pe lo la. I akont mwan ki mannyer bann servis i ale bann keksoz koumsa. Kot i pou kontinyen ek bann lezot dimoun ankor. Parey mon mazin Mandy dan mon distrik ki bezwen lev granmaten kot pou kontinyen ganny deservi sa fasilite.

Provizyon Mr Speaker pou medikal. I annan 104.5 milyon kot sa osi tou i annan sa kontinyasyon. Provizyon manze pou bann pasyan ki ganny *admit* lopital. 27.4 milyon Mr Speaker.

E tousala i bann keksoz i montre ou pou dir nou Gouvernman i angaze pou kontinyen donn sa servis. Kontinyen donn sa sipor e pou nou kapab ganny keksoz pou nou kapab deservi Mr Speaker.

Mon konnen poudir lasante li menm li i en Minister ki souvandfwa nou annan bokou kritik. Be tou dernyerman avek bann keksoz ki'n ganny vwar nou vwar bokou pozitiv, bokou bann komantr pozitiv lo kote Lasante.

Lo kote sa servis ki zot in gannnen. Lo kote lenfrastriktir li menm. Nou vwar poudir tou

dernyerman i annan nouvo *lift* ki pou ede. Ki pou ed bann ki pou deservi lopital.

E osi Mr Speaker, dan sa Bidze lo kote Lasante li menm li. I pou annan en larzan 10 milyon ki'n ganny mete lo kote renovasyon bann lenfrastriktir dan diferan distrik. Bann lenfrastriktir lasante. Zis parey dan mon distrik nou annan Klinik Corgat *Estate*.

E la mon oule profit sa moman letan pou mwan remersi Ms Morel ek son lekip. Bann dokter ki deservi bann zabitan laba. Ki sa travay ki zot pe fer. Nou konnen poudir pa tou keksoz ki parfe. Be selman nou konnen poudir zot fer zot mye, pou zot ede pou fer sir ki dimoun i ganny sa servis.

E la Mr Speaker, dan sa 10milyon la. Ler mwan mon'n pase sak fwa mon pase bann keksoz ki - bann travay laba i met dan mon latansyon, se ki petet nou devret ganny en pe *fan* pou bann dimoun ki vin servi sa klinik pou zot gannnen e osi petet enn de bann pti renovasyon ki annan pou fer lo kote *cabinet* li menm li.

E anba sa 10milyon nou a kapab benefisye avek sa. An term lo kote renovasyon, lo kote lenfrastriktir. Mr Speaker, lo kote ledikasyon li menm li Mr Speaker, ler mon get mon 2 Lekol Mont Fleuri, 2 lekol Gouvernman ki lekol

segonder i annan li apepre 639 zanfan. E lo kote lekol primer i annan apepre 946 Mr Speaker. Parey nou konnen Lekol Mont Fleuri nou abito bokou zanfan. I annan zanfan ki sorti La Misère. I annan zanfan ki sorti partou. Menm lot fwa mon pe koz ek en garson. I dir mwan li i sorti distrik Takamaka ki vin lekol Mont Fleuri.

E mon konnen poudir anba sa Bidze la e sirtou mon konnen poudir Lekol Mont Fleuri pou benefisye. I pou benefisye en ta Mr Speaker, kot i pou deservi laplipar bann zanfan, bann travayer ki zot menm zot, zot la kot nou 2 lekol.

E mon kontan pou vwar poudir dan sa Bidze i annan 70.9milyon pou servis bis SPTC. Ki anmenn bann zanfan ki sorti dan nenport Sans Soucis.

La Misère li menm li, bor dan Plaisance laba pou zot kapab vini. Zis mon demande ki bann zanfan i deservi sa bann fasilite byen li menm li kot sa i kapab ede.

E Mr Speaker, e mon kontan osi poudir menm ki i pa reflekte la dan sa Bidze ki'n ganny dir la. I annan travay ki pou ganny fer kot nou 2 lekol. An term lo kote kouper bann laklas e osi lo kote *toilet* pou ganny aranje. I annan *TE block* la ki pou bokou letan pe

ganny espere, ki travay pou konmanse.

E menm dan *meeting* piblik Mr Speaker, ti annan en rekomandasyon par nou zenn Onorab Miss Abigail Faure. Ki ti pe demande ki i annan sa miray ki ti'n ganny grennen avek movetan, ki la nou vwar atraver *SIA* semenn prosen sa pou komans, bann formalite pou konmans ganny fer pou lo kote *tender*. Pou ede akòz sa pe anmenn bokou ditor pou lekol.

Akòz zanfan i servi la pou zot sove. E okenn dimoun ki dan okenn aktivite ilegal i kapab ganny akse avek lekol pou zot kapab antre anndan.

Mr Speaker, osi dan Bidze mon vreman apresye ki Gouvernman pou kontinyen avek sa lasistans *Day Care Scheme*. Ki mon vwar poudir i annan 27.6 milyon ladan ki pou ed bann paran ki en pti pe pli ba. Pou kapab ed zot pou zot kapab kontinyen fer zot peyman lo kote *day care*.

E osi i annan sa larzan 1.6 la ki bidzete pou bann *day care*, bann *childminding* lo kote pou asiste zot. Zis parey mon konnen mazine Miss Rehama Corgat *Estate*. E Ms Barra anler Foret-Noire, Madanm Barra ki pe donn sa servis nou bann dimoun dan nenport ki distrik, ki vin kot zanfan anmenn zot zanfan. E



mon swet zot tou le bon pou zot kontinyen sa bon travay.

E lo en baz kontinyen Mr Speaker, e en keksoz ki mon vremen apresye. Nou Gouvernman malgre pou nenport kwa ki zot pou dir, nou Gouvernman pe kontinyen pou get nou bann zanfàn. Malgre ki i annan gro leokri ki pe dir poudir nou bann zanfàn i dormi vant vid.

Ozordi Mr Speaker, dan nou Bidze nou kontinyen avek sa program kot i annan 41.1 milyon pou *breakfast* kot bann lekol primer Leta. Kot bann lekol leta primer, segonder osi tou. Lo kote dezennen osi tou kot zot pou gannye.

E sa mon dir Mr Speaker i en keksoz ki vremen bon akòz i ede pou bann zanfàn ki petet zot paran i lev zot granmaten pou vin lekol. Kot zot kapab ganny sa *breakfast* li menm li pou ed zot dan lazournen. E osi lo kote sa dezennen menm.

E Mr Speaker, lo kote li menm li lo kote lakaz. Minister pou Lakaz mon vremen osi vremen kontan ki pe annan sa kontinyasyon dan mon distrik Mr Speaker, an term redevlopman bann lakaz ki nou ti apel li *low cost* dan Corgat *Estate*. I annan sa 16 *unit* la ki'n preski konplete ki byento 16 fanmir i a kapab bouze. Pou zot kapab ganny asiste.

E osi lannen prosen Mr Speaker, nou vwar poudir i annan R10milyon ki'n ganny mete dan sa Bidze la, ki pou ed ankor 24 fanmir akòz pou annan 24 *unit*. Mr Speaker, sa i vremen ankourazan, i montre ou poudir Gouvernman pe kontinyen dan sa travay pou li envestir sa larzan ki nou gannye pou nou kapab soulaz nou zabitan. Soulaz nou pep li menm li.

Nou konnen poudir bann lakaz Corgat *Estate* i vremen vye. E bann zabitan i kontinyen sey *maintain* li mannyer zot kapab. E nou, nou pe kontinyen ankouraz bann zabitan pou zot kontinyen fer zot peyman.

Ki demen ler *Housing* in pare pou asiste Mr Speaker, zot konnen poudir zot non osi tou i kapab monte. Pa tou dimoun ki pou ganny asiste deswit. I pou bezwen fer li par faz akòz lakantite lakaz ki pe ganny konstrir an menm tan.

E Mr Speaker, mon vwar osi dan sa Bidze la i annan 9.5milyon pou 32 *unit* pou *social housing*. Mon swete ki ler sa i ganny fer, mon distrik osi i a kapab benefisye. An term lo kote bann zabitan osi ki lo lalis.

E osi Mr Speaker, en keksoz vremen enteresan ki dan Bidze mon'n kapab ekout Minis byen, poudir *PMC* osi tou. Dan bann nouvo fason fer

ki *Board* pe diskite pou gete li menm li ki i mannyer i kapab ede pou li konstrir bann nouvo *housing estate*.

Sa i ava ede an term lo kote lakantite larzan ki zot pe anmase. E sa i a ede petet pou fer li en pti pe pli vit li menm li lo kote konstrir lakaz dan pei. En sonm 10 milyon atraver *HFC* dan sa Bidze Mr Speaker, pou ede anba reparasyon bann lakaz pou bann endividi ki pli dan bezwen.

Sa i ava ede aköz mon osi dan mon distrik Mr Speaker, mon annan bann dimoun ki vreman zot bezwen sa led. Parey mon kapab mazin Mr Terrence Laurence. Madanm Quatre anler dan leo Foret Noire. Li osi tou i a kapab ganny ede anba sa sonm 10 milyon.

Be selman mon mazine avèk letan ler tou keksoz i fini finalize, atraver Minister Finans ek Lakaz zot a kapab dir nou atraver distrik, ki mannyer sa pou marse, ki mannyer nou pou bezwen fer bann *assessment*. Pou fer sir poudir bann ki vreman dan bezwen zot kapab benefisye anba sa 10milyon.

E ankor en lot sonm Mr Speaker, nou vwar en sonm 5milyon dan Bidze la pou sa *scheme* renovasyon lakaz pou bann pansyoner. La ankor malgre ki i annan bokou leokri ki napa nanryen pou nou

bann pansyoner. Mr Speaker, nou vwar poudir Gouvernman in angaze kot zot in met en 10milyon la atraver *HFC*, pou bann pansyoner kapab benefisye avèk sa. Pou zot kapab fer bann serten renovasyon avèk zot lakaz.

E Mr Speaker, en keksoz ki mon'n fer vizit ansanm avèk Onorab Labrosse. Ki nou'n vreman nou pe *look forward* pou 2024. Aköz sa i pou ed bokou fanmir. I pou ed bokou fanmir li menm li an term pou ed zot zanfann pou ganny en pti bout. Aköz nou konnen poudir pli ale dan pei later i limite.

E tou bann paran ti a voudre donn zot zanfann en pti bout. Be souvandfwa problem ki zot rankontre se ki ler pou zot donn en pti bout toultan i annan sa bout kot pe ganny demande kote *sewage* pou tonbe. E la nou vwar poudir dan Bidze la i annan 4.1 milyon i pou travay ki pou fer kontinyasyon *sewage* Copolia, ki tonm dan distrik Onorab Labrosse ki lo en misyon aletranze. Ki sa pou benefisye zabitan mon distrik osi.

Aköz nou vwar poudir *by* dan lannen prosen langazman ki nou'n gannye ek Minis Rangasamy, se ki *sewage* pou desann atraver Rochon. Ki la bann paran dan Distrik Mont Fleuri, Rochon ki baliz ant Plaisance ek Mont Fleuri zot

osi zot a kapab benefisye lo sa program ki la.

E Mr Speaker, mon vin en pti pe lo kote *sport* akòz mon konnen poudir mon distrik Mont Fleuri i en distrik kot i annan bokou *sportsmen*. Parey tou dimoun ler pou pase.

Lo kote dan aswar zot pou vwar bokou bann tim. Nou annan tim *Foresters*. Nou annan tim *volleyball* madanm. Nou annan tim foutbol Mont Fleuri. Nou annan tim ki Mr Ah-Kong li menm li i pe antreprann la, tim *basketball*.

Kot zot pou benefisye ladan akòz osi la atraver NSC Mr Speaker, i pou annan en larzan ki pou kapab aranz bann fasilite *sport* dan distrik.

E mwan mon'n fer sir poudir kot mon'n kapab pous en pti pe atraver NSC, pou nou gete ki mannyer nou kapab amelyor nou bann fasilite *sport*. Ki sa i a kapab soulaz Tracy Moustache ek son tim, tim foutbol.

E nou vwar poudir lo laplenn li menm li ler ou pase i annan en *eyesore* sa *changing room* la. Ki bokou bann aktivite ilegal, anti sosyal i pase la. Ki sa i pou ede Mr Speaker anba sa Bidze la ki pou gannyen donnen pou nou kapab amelyor sa fasilite la lo laplenn Mont Fleuri.

E osi Mr Speaker, mon vreman apresye ki i annan

Bidze ki'n ganny mete la pou ed bann tim ki pou al lo bann Zil Pros. Pou zot kapab ale al *compete*. E sa i ava en bon keksoz pou kontinyen ankouraz bann tim. Akòz souvandfwa ou vwar zot, zot pe sey vin atraver bann biznesmenn pou zot kapab ganny en sonm larzan, pou ed zot pou zot kontinyen fonksyonnen.

E osi i annan bann lezot devlopman. Bann lezot sonm ki'n ganny mete dan Bidze Mr Speaker. Parey nou'n vwar 1.5 milyon pou travay kontinyen Mr Speaker lo stad li menm li. E renovasyon *Palais des Sports* i annan 7 milyon. 1.5 renovasyon pou *swimming pool* Mr Speaker, ki tonm dan Distrik Roche Caiman tousala.

E osi 1.5 ankò Mr Speaker, lo kote *gymnasium* kot son *flooring* pou ganny aranze. E sa i ava ede Mr Speaker, pou donn en lankourazman, ed bann tim ankò ki deservi sa bann landrwa.

E Mr Speaker, annefe lo kote bann zenn. I annan keksoz pou zenn tou ladan. Nou vwar en sonm 1.7 milyon ki'n ganny mete devlopman pou bann zenn dan *sport* li menm li.

I annan 1.1milyon pou idantifye bann talan ki annan dan *sport* ki sa i kapab en lankourazman pou nou bann

zenn. Akoz nou vwar poudir konmela bann zenn zot menm zot, zot pe angaz plis dan bann zafer *sport*. Nou vwar bokou zot pe al lo nivo enternasyonal pou kapab *compete* pou fer sir poudir nou paviyon i monte.

E osi Mr Speaker, lo kote transpor. Devlopman dan mon distrik mon vreman apresye. Ozordi dan bomaten ler ou pou pase, lontan ou bezwen esper sitan bokou letan dan laliny trafik li menm li. Pou ou kapab sorti dan laliny trafik Mr Speaker, e nou vwar poudir kontinyasyon pou lagrandisman semen in reste zis sa pti bout la kot *Libyan Embassy*.

E ler mon ti pe koz avek CEO in eksplik mwan poudir se ki bann negosyasyon i ankor pe kontinyen. Zot annan bann keksoz pozitiv ki sa pou ede demen, kot sa i ava kapab pou fer trafik *flow* en pti pe pli byen.

E atraver anba *SLTA* Mr Speaker, mon'n aprann atraver CEO ki *by* lannen prosen bann distrik pou ganny zot apepre 50 lalimyer. Ki mon'n vwar poudir dan Bidze la i annan en sonm ki 7.7 milyon ki bann distrik pou benefisye. Sa i ed nou bann lalimyer dan distrik parey nou'n gannyen dan lepase.

Nou ti ganny zis 20 e la lannen prosen anba sa Bidze pou 2024 sak distrik pou

ganny zot apepre 50 lalimyer. Ki sa pou soulaze. Petet mon ava servi la pou nou dir avek bann zabitan, bann ki konnen bann landrwa kot zot devret ganny met bann lalimyer, fer konnen bann Lotorite Distrik pou nou kapab vini, pou nou kapab fer enstal bann lalimyer.

E osi Mr Speaker, mon oule dir mersi Mr Christopher Esparon, ki en zenn dan mon distrik. Malerezman lot fwa son fanmir in pas dan en maler kot lakaz in brile. Kot la Mr Speaker, pe fer en louvraz formidab dan mon distrik.

Mon mazine bann larestan distrik kot i pe enstal bann lalimyer. Zour i annan en probleman Mr Speaker, kot en lalimyer in brile. Sa garson i toultan la pare pou li donn sa servis, kot i monte i fer sa travay byen normal. Mr Speaker, sa nou bezwen donn li son *congratulate* lo la aköz i vreman, vreman ede dan sa travay ki i pe fer.

Mr Speaker, osi lo kote travay pou semen. I annan sa travay ki pou ganny fer lo kote sa semen ki baliz ant distrik Onorab Loizeau ki pou desann. Mon konnen poudir se ki en travay i bezwen ganny fer ki pou benefisye lafanmir Rosalie, kot Marcel Henrie li menm li, kot Mr Pat Fanchette, kot semen pou

kapab remet li dan en pli bon sa.

CEO in dir ek mwan poudir travay pou konmanse boner lannen prosen. Apre ki tou keksoz in fini finalize Mr Speaker.

E mon vremen osi tou sa lannen ki'n pase, in en lannen vremen formidab kot nou'n vwar bokou bann pti semen segonder. Mr Speaker, zot in kapab ganny en pti sirfas koltar. E mon vwar poudir lannen prosen i annan en Bidze 50.6milyon ki'n ganny mete pou *road resurfacing* pou 2024.

Mon konnen poudir distrik Mont Fleuri li menm li i pou benefisye anba la kot la nou pou kapab amelyor semen ki ariv kot bokou bann lakour.

E osi lo kote *crash barrier* nou vwar poudir lannen prosen i pou annan apepre 2 milyon ki'n ganny mete, in ganny mete dan Bidze. Ki sa osi tou distrik Mont Fleuri pou benefisye anba la aköz nou pou fer tande nou lavwa nou osi. Pou gete ki mannyer nou distrik i kapab benefisye. Mr Speaker, eskiz mwan parey mon'n dir lavwa pa tro, tro bon.

Mr Speaker, e anba sosyal Mr Speaker, nou'n vwar poudir Gouvernman i reste angaze kot in met en Bidze pou nou kapab kontinyen bann benefis, retret, bann

dezabilite li menm li. Envalidite Mr Speaker, e *social safety net* osi tou kot zot pou kontinyelman ganny zot pti larzan.

E Mr Speaker, avan mon fini mon pa pou kapab manke pou mwan koz en pti pe lo mon distrik. Aköz sa lannen ki'n pase la nou'n kapab akonplir bokou an term lo kote bann proze, bann travay dan distrik.

Zis parey mon kapab nonm enn de. I annan semen ki desann kot lafanmir Uzice ki semen ti vremen etrwat. E nou'n kapab agrandi sa semen la ki benefisye kot Tracy Moustache, lafanmir Uzice, anba Christina.

Kot Mr Elizabeth li osi. La en sel keksoz ki mon kapab dir nou pe ganny bokou konsern aköz apre ki semen in agrandi. Nou ganny en lot problem kot bann dimoun aprean ki annan fasilite pou zot park kot zot, zot pe pli vomye park dan semen, ki sa pa pe ede.

E osi lo kote proze nou vremen apresye ki bann zabitan dan Gale pe konmans vwar en laklerte Mr Speaker. E nou proze li menm li pou konmans demare *by* boner lannen prosen. E lo kote *wayleave* nou'n fini *sort out*, tou dimoun in fini dakor. Kot la lot kote faz 1 ki sa i ava benefisye.

Aköz mon mazin mon dalon Mr Nigel Ah-Kong ki pou

li monte desann e pou li ed bann zenn ki anpes zot tonm dan bann move frekantasyon. Avek son tim *basketball*, nou swete ki ler sa semen i demare Mr Speaker i a kapab ed bokou fanmir la anler. Lafanmir Monthly, lafanmir Jean-Charles, Charlette, Denis, Nourrice. Kot sa i a kapab Mr Speaker, sa proze in la pou bokou letan plis ki 20an.

E la finalman avek lagras Bondye Mr Speaker, sa semen i a kapab demare lannen prosen. E osi bann lezot proze ankor. I annan kot Polla Simeon. I annan semen kot defen Madanm Volcere osi ki'n konplete Mr Speaker.

E osi mon oule dir mersi Mr Speaker, dan mon distrik i annan 3an depi ler mon'n vini nou'n kapab akonplir 3 proze, san ki nou'n rod Bidze avek Gouvernman.

Nou annan sa *bus shelter* ki la o bor Klinik Corgat *Estate* ki benefisye. I ganny deservi par tou dimoun dan nenport ki landrwa ki zot sorti. Zot ganny en pti landrwa pou zot kasyet anba la.

E osi Mr Speaker, en pti semen kot Madanm Adam ki nou'n fini met li en kontinyasyon dan nou bann proze distrik, ki pou ede pou kapab ed bann fanmir la anler.

E mon pa manke pou bliye Mr Speaker, ki mon pou remersye sa biznesmenn ki'n

apros Lotorite Distrik la, pou ede pou konstrir en semen ki pou al kot lafanmir Servina ek bann lezot ankor. Lafanmir Meriton anler.

E Mr Speaker, i annan bokou ankor lezot proze ankor si mon ale mon pou al plis ki sa. E mon vreman apresye travay ki mon Gouvernman pe fer dan mon distrik. Akoz i en distrik ki dan lepase in ganny bokou negligize akoz in en distrik ki'n toultan siport *SNP*, *LDS*, *UO*. E ozordi nou vwar sa mouvman dan mon distrik, lagrandisman semen lo kote *sport* li menm li. Bokou lalimyer pe ganny mete e sa travay ki mon Gouvernman pe fer, pe fer sir ki zabitan Mont Fleuri i dan sa konfor.

E Mr Speaker, zis an pasan pou mwan fini. Mon'n ganny en demann atraver enn mon koleg Mr Loncey Micoock pou li remersi Gouvernman. Remersi Gouvernman pou sa travay ki pe fer lo La Digue.

Akoz in vwar apre 43an Mr Speaker, zabitan La Digue in kapab ganny li en lopital modernize.

E dan Bidze la ankor i annan ankor 1milyon ki'n ganny mete pou kontinyen bann travay. E sa travay pe ganny fer Mr Speaker, anba gidans Prezidan Wavel Ramkalawan.

Mr Speaker, e lekol La Digue osi Mr Speaker, nouvo

lekol La Digue i annan en Bidze 83.1 milyon pou benefisye bann zenn, bann zanfann La Digue menm, Mr Speaker. Sa travay ki pe ganny fer par nou Prezidan Wavel Ramkalawan. 8.7 milyon Mr Speaker, pou travay kontinyen lo lopital parey mon'n dir oparavan.

Nouvo sistenm *sewage* akòz pli ale ti napa landrwa pou fouye pou bann zabitan La Digue kapab fer zot desarz Mr Speaker. E la anba nou Gouvènmàn ki annan zis 3 an Mr Speaker, zis 3 an e in kapab fer tousala.

Nouvo Por La Digue Mr Speaker, pou *Cat Cocos* antre. Tousala zabitan La Digue anba travay gide par Prezidan Wavel Ramkalawan, Mr Speaker.

**(APPLAUSE)**

### **HON MICHEL ROUCOU**

E mon konnen poudir son *MNA* pou koz apre mwan. Mr Speaker, mon swete ki mon tann li pe mersi sa Prezidan, dir mersi pou sa travay ki in fer.

Mr Speaker, mon oule dir mersi tou zabitan mon distrik, zabitan Mont Fleuri. Mont Fleuri i en distrik kot tou dimoun i le met zot zanfann lekol. Tou dimoun i le vin reste. Tou dimoun i le vin travay. En zoli distrik Mr

Speaker, mazin nou bann pti zil *St Anne, Ile aux Cerfs* o bor nou. Tousala i tonm pou Mont Fleuri.

En distrik vreman enportan. Si ou pe desann anvil dimoun i bezwen pas Mont Fleuri. Bois de Rose menm ou pou pase i tonm Mont Fleuri. En zoli distrik Mr Speaker. Mon bezwen remerisi son bann zoli dimoun ki *welcome* mwan toulezour.

Mr Speaker, *no matter what* ki zot siporte, ki zot lapartenans politik. Mon ganny *welcome* dan tou lakour mon bezwen dir zot mersi. Mersi pou zot *welcome* mwan. Mersi pou bann travayer distrik, mon *DA*, mon *clerk* Madanm Madeleine Bettina pou sa travay ki nou kontinyen fer.

Mr Speaker, mon oule dir mersi Minis pou sa Bidze. Mersi pou mon Gouvènmàn, bann travayer Finans pou sa travay kontinyen. Mon priye ki Bondye i kontinyen beni zot, donn zot sa lasazes, kontinyen gid zot. Mon oule dir mersi tou bann dimoun ki pe priye pou nou pei Sesel. Mersi Mr Speaker.

**(APPLAUSE)**

### **MR DEPUTY SPEAKER**

Mersi Onorab Roucou. Ou ti dir nou ou pa pou koz bokou lagorz pa tro byen, me ou'n koz

ou *full* 30 minit. Prosen entervenan se Onorab Desheila Bastienne.

**HON DESHEILA BASTIENNE**

Mersi Mr Speaker. Bonn apre midi Mr Speaker. Bonn apre midi tou Onorab e bonn apre midi tou dimoun a ekout.

Mr Speaker, Bidze 2024 ki'n ganny prezante devan nou Lasanble Vandredi le 3 Novanm, par Minis pou Finans, *Minister* Hassan. I en Bidze ki pour tous tou kours nou sosyete an zeneral.

Mr Speaker, pou Lopozisyon sa Bidze in dezapwent zot. Wi, tou fason Mr Speaker, nou konnen ki pou napa okenn Bidze ki nou Gouvernman pou vin avek devan sa Lasanble ki pou bon pou Lopozisyon.

Akoz zot pe senpleman esper en Bidze kot tou proze kapital e tou devlopman i ganny met akote e ki Minis Finans i koz zis lo ki mannyer pou met larzan dan pos Seselwa.

Mr Speaker, sa zafer met larzan dan pos Seselwa. Lopozisyon pe koz pou zot prop lekora sa. Seselwa la deor fodre pa ki zot tonm dan sa pyez. Sa bann dimoun pe mazin zot *welfare*, zot pos. I kler ki sa lipokrizi lo zafer logmantasyon saler pou Prezidan, bann Minis ek *MNA* ti zis en manev politik pou

destabiliz sa gran rali ki ti ganny fer Anse Royale, Dimans le 22 Oktob.

**(APPLAUSE)**

**HON DESHEILA BASTIENNE**

Kan saler la zot ti espere pou vwar si Gouvernman ti pou aksepte menm lo sa bann propozisyon. E ler zafer pa'n bon, Gouvernman pa'n aksepte, maler dan kan. Dezapwentman total, aköz pou napa plis larzan dan zot pos.

Mr Speaker, nou tou nou konnen ki nou nasyon Seselwa lekspektasyon i o, in toultan o. Me i vreman enportan ki nou fer nou Seselwa mazin ki 3 an o pouvwar in pa'n en letan fasil kot larzan in rantre dan kof Leta a la abondans.

I enportan ki nou mazin byen ki dan leta nou Gouvernman ti pran labar pou diriz sa pei, Sesel le 25 Oktob, 2020. Sesel ti lo son zenou. Kof ti preski napa nanryen ladan pou soutenir popilasyon Seselwa pou menm 3 mwan.

Mr Speaker, i enportan note e i tre enportan ki pep Seselwa i osi mazin kantite larzan ki Gouvernman *LDS* ti zwenn dan kof Leta. Ni nou bann zanzan, ni saler travayer Gouvernman e ni nou bann vye paran ki lo Sekirite Sosyal



ek nou bann pansyoner ti pou napa en okenn reveni.

Kot nou'n sorti an Oktob 2020 ziska kot nou'n arive ozordi 3an pli tar. Pep Seselwa annou rekonnet ki sa i gras a travay dir ek bokou desizyon dir ki pa'n fer serten dimoun plezir. Me sa bann desizyon dir in fer ki in anmenn soulazman, e in tir nou pei dan sa presipis kot i ti'n fini komans pran lapant anba Gouvernman US.

Mr Speaker, dan sa Bidze, Gouvernman dizour pe fer sir, e i pe fer li son devwar ki i kontinyen anmenn Sesel lo en bon semen. E fer sir ki pei i kontinyen grandi dan en klima an bonn sante.

Mr Speaker, Gouvernman i vwar li son priorite pou kontinyen fer Sesel avans devan. Me i pa pou kapab arive fer li san ki nou koman bann sitwayen nou pran nou responsabilite a kote li nou osi.

Mon fyer pou dir ki lenspirasyon nou Gouvernman dan transformasyon nou lekonomi i enn pozitiv. E ansanm avek son *Cabinet of Ministers*, nou pou kontinyen travay dir pou ede kre plis larises kot demen, nou a fyer letan nou pe rekolte par nou zefor ek nou determinasyon anver nou pei.

Se pour sela ki lapriyer nou Gouvernman in toultan.

Seselwa annou leve e debourye.

Mr Speaker, nou annan bokou pou fer e bokou ankor pou aranze. Me i osi enportan ki nou pran kont ki pa aköz nou lekonomi pe progrese ki nou bezwen zis large, fer tou dimoun kontan san pran kont bann defi eksteryer ki posibilite kree move lenpak lo nou pei, tel ki lager Larisi ek Ikrenn ki ankor pe kontinyen. Lager Izrael kont *Hamas* ki fer ki ozordi *Air Seychelles* in bezwen aret son bann vol an Izrael kot nou ti ganny bokou touris. E sa li menm i deza en lenpak lo nou marse touristik.

Alor i vremen enportan ki Gouvernman i pran bokou prekasyon lo fason zener finans pei pou nou pa retourn an aryer e ki nou pa retourn dan leta ki nou ti ladan an 2020.

Mr Speaker, i fasil pou dir donn larzan, met larzan dan pos Seselwa. Me en Gouvernman responsab i bezwen get byen bann priorite pei. E firamezir nou lekonomi i progrese sa larises a ganny partaze dan en fason byen responsab.

Mr Speaker, ankor mon pou repete ki Gouvernman ti bezwen pran serten desizyon kot annan dimoun pa ti kontan aköz pa ti dan zot lavantaz. Me en Gouvernman ki brav e ki pare pou pran

desizyon ki pa popiler i en Gouvernman ki met son pei ek son pep an premye. I pa met popilarite an premye.

Mr Speaker, rezilta ozordi i dir tou pou li menm. Sesel pe avans pli devan. E atraver serten desizyon ki pa'n politikman popiler, pou nou Gouvernman in fer ki Sesel ozordi in ganny vwar koman en sikse ekonomik lo nivo mondyal. Eski en tel nouvel pa fer nou Seselwa fyer? Ki dernyen fwa ki nou'n tann entel sikse lo lekonomi nou pei?

Mr Speaker, i enportan ki nou felisit Minister Finans ek son tim vreman dinamik, determinen e tre serye pou sa bon travay profesyonnel pou zot arive anmenn nou pei Sesel lo vre semen sikse.

Mr Speaker, an rezilta bann *meeting* piblik ki ti ganny fer dan diferan distrik lo Mahe e osi lo zil Praslin ek La Digue. Nou Gouvernman in fer li son priorite pou adres bokou konsern ki ti ganny leve dan sa bann *meeting*. E ozordi dan sa Bidze i annan bokou repons ek solisyon.

Mr Speaker, mon dir ki dan sa Bidze i annan bokou repons ek solisyon. Senpleman apre ki Vandredi le 3 Novanm letan mon'n ekout Minis Finans lir sa Bidze, mon'n touse par sa bann diferan benefis ki pou tous lavi

tou sitwayen e diferan laz dan nou sosyete.

Sa Bidze pa pe kit personn deryer. Tou dimoun pe ganny en benefis dan en fason. Mon bann frer ek ser, swiv byen sa Bidze e zot a vwar kote ki sakenn de nou i antre ladan e kote ki nou benefisye. Zis pou nonm enn de; i komans avek sa pti baba ki ankor dan vant son manman. Sa manman li menm ki sirtou sa enn ki reste lo zil si i bezwen desann Mahe.

Me la i bon note Mr Speaker, avek sa zoli lopital modern lo La Digue mon pa pe vwar byen, byen manman pe desann Mahe pou donn nesans son baba. Parske Gouvernman LDS in fer tou byen lo sa nouvo lopital lo La Digue.

**(APPLAUSE)**

#### **HON DESHEILA BASTIENNE**

Tou byen, apre sa petisyon sal ki pa'n kapab arive met okenn bar dan nou plan. Tou byen Gouvernman LDS!

**(APPLAUSE)**

#### **HON DESHEILA BASTIENNE**

Mr Speaker, ankor alawenns pe ganny ogmante pou zanfann lekòl, orfelen, bann zanfann ki'n perdi swa en paran ou tou le de zot paran. Alawenns pou sa fanmir ki pare pou adopte en

zanfan ki napa paran. Alawenns en manman ki donn nesans plis ki en zanafan.

*Laptop Scheme* ki pou komans dan P5. Alawenns pou bann etidyan lokal koman bann ki pe etidye aletranze. Nouvo lekòl ankor lo zil La Digue menm.

Lopital modern e spesyalize, fasilite *sport* pe al ganny eleve. Plis proze lakaz dan diferan distrik pou bann fanmir ki'n pri lo lalis espere plis ki 20 an pase par malis akòz zot lopinyon politik.

Konpansasyon pou bann ka delo polisyon La Misère, kot Arab ti donn larzan pou rekonpans bann viktim. Me ti ganny mal zere anba Gouvènmman *US*, e osi lo Praslin dan ka *PUC*. Rediksyon lo taks pou serten kalite transpor. R500 pou Sekirite Sosyal i reste e osi sibvansyon lo *bill* elektrisite.

Mr Speaker, lalis i long me dan sa Bidze sakenn de nou i benefisye dan en fason. Fodre pa nou ekout zis ranpli larzan dan pos Seselwa parey nou pe tann Lopozisyon, kontinyen servi fer kanpanny sal e dezespere. Annou get kote ki nou osi benefisye dan sa Bidze. Mr Speaker, pli nou pei i a progrese pli nou a tous pli gro kopo dan sa gato.

Mon osi fyer pou dir Mr Speaker, ki dan sa Bidze 3 pli gro sonm in al pou 3 Minister,

ki osi pe tous tou laz, tou dimoun dan nou pei. Limero 1 Minister Ledikasyon, Minister Zafer Sosyal limero 2 e trwazyenm Minister pou Lasante.

Mr Speaker, Gouvènmman i rekonnet ki ledikasyon se labaz nou sosyete. Nou bezwen kontinyelman investir dan pli bon sistenm laprantisaz, transform bann lekòl, fer li vin pli atiran e pli konfortab kot nou bann zanafan i pas laplipar zot letan dan en lannen. E ankouraz zot devlop plis sa lanmour ek lentere pou vin lekòl toulezour.

Mr Speaker, Gouvènmman atraver sa Bidze i pe fer sir ki zanafan i kontinyen ganny zot goute dan bomaten. Zot dezennen apre midi e sa ki enterese i annan fasilite ganny en *laptop* atraver sa *scheme* ki an plas e ki pe komans depi P5 apartir 2024.

Dan sa Bidze, alawenns pou bann etidyan i ogmante. E etidyan ki reste lo zil alawenns i vin R2000 par mwan. E menm zot pou ganny loportinite pou fer zot *O'Level* lo Praslin si zot anvi dan plas desann Mahe. Zot lib pou swazir.

Mr Speaker, Gouvènmman pe osi donn priyorite bann ansenyan pou ankouraz zot devlop sa lanmour ek lentere pou

kontinyen dan sa travay nob, kot dan lazournen se zot ki pran plas paran nou bann paran.

Wi Mr Speaker, Gouvernman pou kontinyen investir dan nou ban ansenyan e an menm tan ankouraz plis nou bann zenn pou pran en karyer dan ledikasyon.

Mr Speaker, Bidze pou Zafer Sosyal i osi en Bidze ki'n ganny konsidere konman tre enportan. Mon pou remersi Gouvernman pou fer ki Bidze pou Zafer Sosyal in osi ganny konsidere koman en Bidze enportan. Akoz i enportan ki nou get tou nou bann sitwayen ki pou en rezon ou en lot parfwa zot vwar zot tonm dan en sityasyon an deor kontrol.

Mr Speaker, la i pou enportan note ki nou *MNA* nou pas atraver bokou difikilte pou asiste serten zabitan dan nou distrik respektif.

Ozordi mon pou osi fer kler ki pa akoz nou annan en gro Bidze dan servis sosyal, ki zis en dimoun i deside kit travay i vin kot biro pou vin *apply* pou en lasistans. Akoz sa kalite zwe lontan i annan e i ankor annan Mr Speaker. Gouvernman in toultan dir ki i enportan ki nou elimin labi. E mon senserman krwar ki wi labi fodre ganny elimin.

Me i annan osi kot nou *MNA* nou temwann serten ka ki vreman serye. E ki sa endividi in vreman bite malgre tou zefor e i bezwen sa sipor pou remet li lo son de lipye.

Mr Speaker, ozordi atraver mon deliberasyon lo sa Bidze mon pou enpire ki fason fer pou asiste en fanmir ki dan detres fodre i sanze.

Mr Speaker, en dimoun ki dan detres ki vreman bezwen en lasistans pa pou kapab kontinyen esper 2 a 3 mwan pou ganny asiste. I annan malis ki ganny fer par ekspres pou kre fristrasyon ek lakoler.

Elektrisite i ganny letan koupe, delo i ganny letan koupe. *Day Care* i refiz zanzan akoz peyman i an retar e *MNA* i bezwen al sipliye pou ed sa manman. E la mon pou profite pou dir en gro mersi kot *PUC* pou donn nou sa sipor letan nou tap lo zot laport, pou zot soulaz enn nou zabitan ki vwar zot tonm dan difikilte par ler.

Mr Speaker, nou pa pou kapab kontinyen koumsa. Mr Speaker, kote sa retar i vini? Mon kontinyen demann kestyon. Lekel ki pe kontinyen trenn lipye? Dan tou ladministrasyon distrik i annan en zofisye *welfare*.

E mon ti a kontan konnen ki kantite letan ki pran pou fer en travay lo bann

ka. Enn fwa ki ou'n fini fer ou vizit kot sa zabitan. Ki kantite letan ki ou pran pou travay lo son dokiman e fer desann kot Biro ASP? Enn fwa ki dokiman in ariv kot Biro ASP ki kantite letan ki pran pou konsidere e donn sa aplikan en repons?

Mr Speaker, Gouvernman in vwar li nesese pou ogmant Bidze ASP akòz i konsènen pou tou son sitwayen, e alòrs servis i merit ganny delivre.

Mr Speaker, trenn lipye, pran tou letan, kit dokiman lo nou latab, kre fristrasyon, tousala i form par dan retar e i anmenn bokou dezapwentman senpleman pou fer dimoun vir kont Gouvernman.

Mr Speaker, mon swe atraver sa Bidze ki ASP pe gannye ki nou servi li byen, e nou sipòrt nou sitwayen ki vwar li tonbe a en moman dan son lavi.

En lasistans pou omwen 3 a 6 mwan i a soulaz sa fanmir antretan ki nou tou ki konsènen lo nivo Lotorite Distrik nou fer nou bout. Nou donn nou sipòrt kot nou kapab e nou ed sa dimoun ganny en travay kot i posib.

Mr Speaker, si en dimoun i malad, doktè i a sètifye pou konbyen letan i devret pe ganny lasistans. Apre byensir i a leve pou li al travay. I pa pou kapab

kontinyen reste lo *welfare* tou son lavi.

Mr Speaker, rikòrd i la pou sètifye si menm dimoun ki kontinyelman tap lapòrt kot ASP. Parey mon'n dir pli boner labi pa pou ganny tolere. Sa ki merite a ganny led. Sa ki pe zwe rol, ki ankòr for e an bonn sante i a leve i ava al debourye, pou li osi kontribye dan lekonomi nou pei e pour son fanmir osi.

Mr Speaker, lo kote Lasante, Gouvernman in vwar li osi nesese pou donn sa Minisèr en gro Bidze, sa i a fer ki nou sistenm lasante i a kontinyelman amelyore, e mont lo en pli o nivo.

Mr Speaker, malgre ki Gouvernman pe kontinyen envestir dan bann nouvo klinik, lopital. Nou sikse se letan nou pa vwar gran laliny dimoun pe vin lopital toulezour. Nou vwar bann lili lopital vid. Savedir Seselwa pe pran bon swen avek zot lasante. Seselwa pe realize ki nepli tan pou gaspiy letan pou al asiz lo ban lopital pou en latet fermal, zis pou li kapab ganny 3 zour konze doktè pou sov travay.

Mr Speaker, Seselwa in vin pli matir. Seselwa i rekonnèt ki zot an bonn sante. E ki nepli fer sans pou al fer ta bel lo ban lopital parske sov travay napa rannman. E deplis ozòrdi tou landrwa

travay pe koz performans pou ou ganny byen rekonpanse, pou ou rekolte ou trezyenm mwan 100poursan.

Mr Speaker, dan son diskour Minis pou Finans, Minis Hassan in tous lo bann depans pertinan ki annan pou fer avek Bidze pou Lasante. Tel ki stok latizann kontinyel. Nouvo lekipman pou dyaliz. En lopital modern avek bann lekipman modern e spesyalize pou Gouvernman kapab arive koup en pe lo depans pou tretman spesyalize aletranze e osi nouvo fasilite pou stor latizann.

Mr Speaker, bokou lezot amelyorasyon osi i bezwen dan nou bann klinik, tel ki plis fasilite asize pou bann pasyan ki vin pou esper dokter. E nou annan konfyans ki sa Bidze pou ede rezourd bokou sa bann sityasyon.

Mr Speaker, sa Bidze i tre prometan pou Lepep Seselwa. I en Bidze ki annan bokou pou dir e bokou pou koz lo la. Me letan pa pou permet.

Mr Speaker, mon pa pou kapab konklir mon deliberasyon san tous lo bann benefis ki mon distrik Ile Perseverance pou fer fas avek atraver sa Bidze. Lekol Primer Ile Perseverance i lo lalis Bidze pou renovasyon.

Aprè bokou konplent lo *fungus* ek problemn vantilasyon e osi en bon kours

lapentir pou gard lekol byen zoli. Primer Perseverance a anfen ganny en bon travay renovasyon.

16 *unit* lakaz ki'n fini konplete e tre byento 16 fanmir ki'n esper lakaz depi 2006. E ki kondisyon i tre kritik pou kapab ganny en lakaz konvenab apre sitan lontan ki zot in pri lo en lalis espere.

An Mars 2024 dan 4 mwan ki pe vini nou pou annan en *batch* 24 lakaz ankor ki pou pare, pou nou asiste ankor fanmir dan Perseverance, enkli plizyer lezot aplikan lo nivo nasyonal.

Pou annan osi proze *self-financing* enkli *mid-range condos*. Pou annan renovasyon lo serten lakaz enkli bann lakaz *prefab* e osi lasistans lo kote *part rental* pou aplikan ki zot saler i ton anba R19 mil.

Proze sant kominoter ek Stasyon Lapolis modern i osi dan Bidze. E sa i a fer ki plis fanmir a ganny sa bann lakaz kot sa bann tel fasilite ti pe okipe.

I osi annan alokasyon pou devlop fasilite sportif dan distrik e Ile Perseverance pa pe ganny kit ater. Zabitan i santi zot en pe soulaze anver sa proze lagrandisman Semen *Ile du Port*, kot zot ti pe fer fas avek gro retar dan bomaten pou zot ariv travay.

Mr Speaker, i bon osi note ki serten pti travay distrik in ganny fer tel ki nouvo *bus shelter* dan Perseverance 2. Nouvo *bin site*, *zebra crossing*, en nouvo fasilite pou *changing room* lo *court basketball* dan Perseverance 2.

E osi en pti *shelter* pou bann zanfan ek zot paran asize ler zot vin lo *playground*, sa dan Perseverance 2.

Mr Speaker, pou sa bann tel pti proze mon pou remersi DA Aaron Bonnelame pou Perseverance 1 e DA Nicole Gabriel pou Perseverance 2, pou travay pou distrik arive ganny sa bann tel fasilite.

Mr Speaker, mon pou osi remersye SFA pou donn nou en bazar tanporer, kot peser i kapab vann zot pwason dan en landrwa pli konvenab dan plas ater lo en palet ki mon ti vin zwenn. Travay lo *streetlight* pe kontinyen. E mon espere ki par 2024 SIA a met plis zefor pou ki problem *streetlight* i ava rezourd konpletman dan Perseverance.

Mon osi swete ki atraver sa Bidze, Departman Lapolis dan Perseverance ki pe osi deservi Distrik Anse Etoile i a kapab ganny ase mende, e plis drayver ek transpor pou ed bann zofisye desarz zot travay pli byen e pli vit e pli efikas. Pou arive kapab anmenn lord ek lape dan Distrik Perseverance.

Mr Speaker, mon pou termin la par dir mersi nou Gouvernman ek tou son bann Minis, pour sa travay nob ki zot pe fer pou anmenn Sesel pli devan. Kontinyen fer nou ganny byen rekonnet lo nivo enternasyonal.

E en gran mersi i al pou Minis Hassan ek son tim ki'n travay lo sa Bidze pou fer ki tou Seselwa san eksepsyon i ganny en par dan sa gato. Mersi.

**(APPLAUSE)**

#### **MR DEPUTY SPEAKER**

Mersi Onorab Bastienne. Prosen enterven an se Manm Elekte pou Zil Pros, Onorab Uranie.

#### **HON ROCKY URANIE**

Mersi Mr Speaker. Bonn apre midi Minis ek tou koleg Onorab. E en bonn apre midi spesyal pou tou zabitan La Digue ki pe ekoute. Tou bann US ki ti zwenn nou dan nou *blitz* Sanmdi. E tou bann US ki ti zwenn nou dan gran *rally* selebrasyon La Digue ki ti vremen en sikse.

**(APPLAUSE)**

#### **HON ROCKY URANIE**

Pour lenformasyon dimoun Mont Fleuri, si Onorab Roucou i krwar dan 43 an ti napa lasose, ti napa por La

Digue, ti napa lopital La Digue, ti napa lekòl La Digue. Onorab Roucou pa konn nanryen akòz *Cat Cocos* ziske la i ankor pe vin kot nou lasose 43 an.

**(APPLAUSE)**

### **HON ROCKY URANIE**

Mr Speaker, i tre enportan pou amelyor lavi nou sitwayen dan la kominote e anmenn en lalit serye kont bann fleo sosyal. Nou Gouvènmman oparavan ti met an plas bann program lo sa 3 zil prensipal pou anmenn led pou nou sitwayen ki annan adiksyon parey drog eroin.

La Digue i en landrwa kot nou tou nou konn preski nou tou nou zabitan. Tou dernyèyman i annan bokou bann lezot endividi ki pe vin lo nou zil. Zot osi ler zot debarke zot annan zot bann adiksyon.

Bokou adikt in realize ki zot bezwen led. Bann kliyan i bezwen vwar dokter, psikolog e osi pran zot latizann dan sanmenm sa landrwa ki'n vremen tro pti pou zot ganny sa servis, tretman e led nesesser ki zot bezwen.

Sirtou espesyalman bann ki pe fer zefor pou zot kapab sorti dan sa adiksyon e epanouir dan zot *full potential*. La Digue i pti, nou konn zot tou e nou rankontre zot tou preski partou lo larout.

Par ler nou ankoler avek zot akòz serten keksoz ki zot fer, me pli souvan nou annan la tolerans e osi serten konpasyon pou zot akòz lafason ki zot in tonm dan sa latrap.

Me ler mon get dan Bidze mon pa vwar nanryen dan sa Bidze ki pou ed sa group adikt ki lo La Digue. E propozisyon ki zot in dir mwan vi ki i annan en batiman lanmenm o bor kot zot ete.

Zot in demann mwan pou enplor Gouvènmman pou fer serten renovasyon lo sa batiman. E bouz zot servis ladan ki sa bann zofisye Lasante ki travay avek zot i ava ganny plis *privacy*, konfor pou donn zot sa servis. E osi bann adikt zot menm resevwar led dan en landrwa pli konfortab.

Sa i a fer ki nou ava ganny plis *success stories* bann dimoun ki sorti dan sa fleo drog. Mon ti ganny en not avek enn bann adikt ki dir mwan ler *LDS* ti pou ganny vot ant 2020, zot ti fer en *meeting* avek zot bann adikt e dir zot vot pou *Father*. Me ler zot ti fer li apre eleksyon zot in ganny four koudpye.

Gouvènmman i bezwen vin ek bann Polisi e reform kler e ferm pou kapab fer ki sa bann ki adiksyon, e pe fer zefor pou zot sorti ladan, kapab ganny aksepte dan en



lanplwa dan plas vwar zot bezwen al dan tou pye koko oubyen pye fri dimoun, pou zot ganny en pti keksoz pou zot al vann lo lans avek touris pou en *survive*.

Alor zot dir mwan Gouvernman, pa devret investir dan lenfrastruktir kot sa servis i konsernen zis lo Mahe e Praslin. Investir osi dan La Digue pou zot benefis. Sa fleo pa swazir.

Ozordi i annan zannan madanm entel ek msye entel, demen i kapab mon zannan apredmen i kapab pou ou. I pa swazir ki fanmir ou sorti ladan, ki *gender* ou ete oubyen ki kantite larzan ou annan. Alors Gouvernman anmenn plis led pou sa group dimoun.

26 *meeting* piblik dan 26 distrik ti en kanpanny pou tat delo lo teren aköz ti annan tro bokou konplent sorti kot bann sitwayen Seselwa. E sirtou bann siporter *LDS* byen mekontan ki mannyer sa nouvo Gouvernman pe *fail* zot lekspektasyon e pa sa sanzman ki zot ti'n ganny promet.

Ler Seselwa i demande oli sanzman, sanzman i sanze in vin transformasyon. Sa i fer Seselwa sirtou bann ki'n vot *LDS* regret zot desizyon e pe donn *United Seychelles* tou latansyon. E zot pe dir ki 2025 *United Seychelles* pou donn *LDS* en lokipasyon.

Dan sa bann *meeting* nou'n antann fristrasyon sorti kot sitwayen, fristrasyon sorti kot Egzekitiv. Me eski zot in rezourd fristrasyon sa bann dimoun ki pe sey debourye pour esey delivre servis dan bann Minister, Departman e Lazans Gouvernman?

Mon pa krwar zot in fer li aköz keksoz i ankor parey. Let, *email* e lapel telefonn ki pa ganny reponn. Bann *file* ki pe ganny dormi lo la, randevou ki pa ganny donner, e leskiz lo leskiz.

E mon dir mersi Onorab Desheila pou fer en lalis sa bann problem ki son Gouvernman enkonpetan pa pe fer zefor pou rezourd.

**(APPLAUSE)**

### **HON ROCKY URANIE**

E i pe rode lekel ki pe trenn lipye. Se ou Prezidan, son *Cabinet* ek ou *Cabinet* ki pe trenn lipye.

Ler keksoz pa pe marse zot met blanm lo travayer an servan afilyasyon politik. Kan zot menm ki anmenn politik dan landrwa travay. Dekrir sa bann travayer konman parese e tou sord lezot lensilt. Me vre kondisyon travay e resours ki travayer sekter piblik i bezwen pa pe ganny rezourd. Apre zot ganny pini zot lo zot trezyenm mwan saler.

Mankman travayer e *recruitment* ki pa ganny fer e larzan i retourn dan kof. Sa i rann bann travayer dan servis piblik fristre zot osi. Akoz zot vwar zot pe fer travay de dimoun. Sa lannen tou *savings* ki Gouvernman enkonpetan ti pe dir in ganny fer en gran parti in sorti dan *delay* pou fer *recruitment*.

Eski lannen prosenn sa sityasyon pou parey menm? Mon swete plis dimoun i ava ganny anploye dan landrwa, non pa zis pa zis ganny pouse oubyen viktimize aköz afilyasyon politik.

Mon Gouvernman ti investir bokou dan *sport*. Bokou dan lenfrastruktir in ganny fer, bokou *training* lo nivo nasyonal e enternasyonal pou atlet konman lantrener. Pou sa 3 an ki zot in la kwa ki zot in vreman investir ladan kot i konsern *sport*, atlet e osi lantrener? Mon pa vwar nanryen mwan.

E se pou sa rezon nou'n ganny zis 11 meday lor, ki dayer mon krwar pa si sa bann atlet in ganny peye. En pli move performans ki Sesel in deza konnen.

Zis pran *sport complex* La Digue mon vwar en alokasyon 1milyon. Kwa ki pou vreman ganny fer ek sa? Laplenn La Digue ti'n fini ganny dir isi menm anndan dan nou Lasanble, konman en lasirans

ki pou pare apartir Septanm sa lannen.

Tou Digwa, zwer foutbol, siporter fidel ti krwar vre ki mannyer sa komitman ti'n ganny donner. *Fixtures* in sorti konmkwa foutbol pou zwe La Digue an Septanm.

Selman laplenn pa ti ankor pare pou akeyir okenn *match*. En konfizyon total lekel ki sipoze antretenir sa proze, napa *monitoring*. Apre sa nou ti vwar en lot *fixtures* sorti ki dir ki *match* prezan pou repran lo laplenn an Zanvye. Menm sa mon pa tro krwar aköz zot koz tro bokou.

Dan *sport* en dezord e konfizyon total. Mon krwar boner Zanvye nou pou vwar ankor en lot *fixtures*. Sa sityasyon i anmenn en mankman aktivite spor lekip lo nou zil.

Zenn i dekouraze, me pa zis *sport* aktivite ekonomik ki bann *match* foutbol i anmenn lo nou zil. Parey lavant *takeaway*, lavant dan bann laboutik e lezot servis tousala i perdi larzan. Sa i en gro dezapwentman dan *sport* lo zil La Digue e dan Sesel an zeneral.

Mazorite Seselwa pou dakor ek mwan ki Minis pou *sport* in *fail* nou pei e sa i en Minister ki devret ganny revwar konpletman. Vreman enkonpetan e devret *resign* !

**(APPLAUSE)**

**HON ROCKY URANIE**

Pa bliy Praslin, Stad *Amitié* menm zafer, konfizyon total. Vizit parti vizit i ganny fer par komite sorti isi menm kot Lasanble e bann rekomandasyon i ganny *forwarded*.

Mon krwar ki zot prop Gouvernman pa ekout zot oubyen pa lir sa bann rekomandasyon. Mankman travayer, konfli lentere kot *sport complex* La Digue e kontra ki pas anba, anba donn aktivis *LDS*.

Ler ou *call* kot *NSC* personn pa konnen si ti annan *tender*, enn i dir mwan i krwar en *one-off*. Me ziska la en keksoz i kler, se ki menm dimoun ki'n fer krwar i ti pe rod zerb bef se li ki ankor la pe netwaye e pe ganny peye.

Zoli parol pa ase pou atlet, nou bezwen fer aksyon. I fer 3an zot ankor pe fer program me program pa vin ditou. Mon dir ek sa bann atlet i reste bann zis 2an, 2025 zot pou *out!* Nou pou ankadre zot e fer sir ki zot anmenn bokou plis ki 11 meday lor e zot pou ganny zot larzan parey nou ti abitye fer li dan lepase.

**(APPLAUSE)**

**HON ROCKY URANIE**

Nou Gouvernman ti fer plizyer *meeting* konsiltativ lo La Digue, pour sa detrwa proze ki nou vwar pe ganny fer ozordi. Ki nou ti vwar sa letan sete menm group dimoun, menm figir bann fanatik lopozisyon sa letan ki ti vin sa bann *meeting* e *boycott* tou devlopman lo La Digue e met nou zil retar.

Se zot ki ti anpes sa bann devlopman ganny fer. Ozordi zot in vin o pouvwar zot in fer lopital ki dan lokasyon ki ankor anmer dan lagorz Digwa.

Apré zot pe lager avek nou petisyon. Petisyon pou Onorab Mondon ziske la pa ankor ariv kot i sipoze anvoye, pa ankor arive vwar. I annan 1 an personn pa ankor vwar kot i ti anvoye. Bannla in zet dan bin.

Ler Dokter Patrick Herminie i dir son larm i koul tousel. Ler i get sa groser lopital 78 milyon ki pa'n ganny *tender*. E ler dokter i dir sa son larm i koule i pa aköz lopital i vid.

Me ler i get li an relasyon avek Lopital La Rivière Anglaise kot bann pasyan i met laliny depi deor. Me li Prezidan in deside pou satisfè son *ego* e fer sa groser lopital lo La Digue. San vreman pran kont bann konsey ki bann *expert* Lasante in donn li, zis

pou li kapab met son non lo plak !

Alors Dokter Herminie i annan rezon dir son larm i koule. Seselwa get zot menm kalite servis zot pe gannye isi lo Mahe. En lopital i bezwen en serten grander an relasyon avek son popilasyon.

Larzan ti kapab servi pou *upgrade* sa bann servis ki nou deza pe ofer, ki pou fer benefis, pou benefis plis dimoun. Me nou napa swa in fini fer nou pou bezwen servi li.

Sa lopital nou'n antann koz bokou lo la. Enn ki *state of the art*, me selman en bekir napa. Kliyan i tonbe, i ganny problem, i bezwen lasistans bekir *state of the art* lopital napa en bekir.

En dimoun ti bezwen al demann prete en bekir en lot dimoun kot en lakour. Sa touris pe vwar sa byen drol e pe poz keston. Sa i en fe.

Mr Speaker, sa kantite problem ki annan kot Lasante i konsernen mon pa vwar ki mannyer sa Bidze pou rezourd sa bann problem. Sa Bidze Lasante i *business as usual*.

Oli larzan pou *training* pou nou ganny plis dokter, spesyalis, dantis, *radiographer* e lezot travayer ki lasante i bezwen. Pa met latansyon lo gro *building* me servis latizann ki dimoun i bezwen pa pe ganny gete.

Mon swete ki zot ava *at least* sa voyaz ekout mwan e met bekir dan Lopital La Digue. I kler ki nou pou kontinyen ganny dantis adilt 1 fwa ou 2 fwa par semenn. Spesyalis pou kontinyen vin 1 fwa par mwan oubyen 3 fwa par mwan dan sa nouvo Lopital La Digue. Nou pou kontinyen napa latizann e nou pou kontinyen konplent si larzan pa ganny met parey i fodre e servi byen parey i fodre dan Lasante.

Pa bliy sa fame 78 milyon larzan *COVID* ki ziska la pa kler ki mannyer sa larzan in ganny depanse. La i annan loder koripsyon e dimoun i ankor pe kestonnen.

En landrwa byen apropiye pou lav bann dra, servyet e lezot ankor i bezwen byen ganny enstale e en sistenn modern pou drese.

Akoz pti karo dan sa letan modern, pa en travay fasil pou sa bann dimoun ki pe servi li.

E zot dir mwan zot bezwen en landrwa pli apropiye pou zot kapab tal ban dra, tapi koumsa zot pa ava ganny problem ler zot tal lo balkon.

Lopital i bezwen anploy plis *cleaners* pou kapab gard lizyenn lo en o standar, e sa i bezwen ganny fer byen boner pou ki larzan pa retourn dan kof aköz *delay in recruitment*.

Mon profit lokazyon pou *congratulate* ankor enn fwa Queency Ah-Kong enn mon ansyen etidyan pou delivre son dezyenm zangan. E safwasi in fer li dan nouvo Lopital La Digue.

**(APPLAUSE)**

**HON ROCKY URANIE**

Mon osi felisit. E byensir in napa swa Lopital *Logan* nepli pe ganny servi. I bezwen fer dan sa enn ki modern.

**(APPLAUSE)**

**HON ROCKY URANIE**

Zis pou lenformasyon piblik, bokou zangan in ne dan Lopital *Logan* La Digue alors sa servis pa nouvo lo La Digue parey serten i le fer nou krwar.

Sa logmantasyon pou pey benefis pou paran ki pe al ganny baba Mahe i enn ki sa paran i bezwen, aköz nou'n lager lo la tanzantan. Sa peyman pou en *one-off* selman.

Sa Gouvernman i konnen ki napa bokou paran ki pou tonm dan sa kategori pandan en lannen. Alors sa benefis i zis pou en pti group dimoun. E sa ler nou pe gete i en pti kanpanny pou eleksyon ki pa lwen.

Sa ki fer lapenn avek sa sistenm se ki sa menm paran ki ler i pou al rod en led pli tar

kot ASP, pou serten difikilte ki i kapab pas ladan pou soutenir son zangan dan sa R1.3 bilyon ki'n ganny mete. I pou vwar li pas atraver en pake difikilte parey plizyer lezot pe pas ladan ozordi.

Bann paran pa ganny lasistans e zot vwar zot dan gro problem en zour a lot. Toudsort lipou i ganny rode ek sa bann paran e lezot dimoun ki vin rod led.

E finalman sa bann dimoun i dekouraze e bezwen abandonn letan ki zot sipoze pas ek zot zangan, parey ed zangan fer *homework*, zwe ansanm.

Aprann fer en pti keksoz ansanm parey lakwizin eksetera. Sa paran i pa kapab fer sa aköz i bezwen al rod en *part time* apre ler pou li kapab fer de bout zwenn pou sonny son zangan.

Sa mank latansyon i fer ki zangan i mank gidans e vin bann delenkan e osi ranpli avek problem disiplin ki al refoul dan lekol. La en lot problem ankor. Ler mon nonm lekol mon vin lo ledikasyon.

Mon vwar larzan in ganny mete pou proze kapital lekol La Digue. I ok pou fer en lekol modern, me fer sir i reponn lapel e bezwen nou bann ansennyan e etidyan.

Mon dir sa aköz ansennyan in fer plizyer

demann pou resours parey liv relevan, masin fotokopi, plis *teachers* pou ede redwir *workload* e plizyer lezot.

Lalis i long. Zot bann demann pa'n ganny reponn. Zot dekouraze e fristre. Menm dan *forum* ki ti ganny fer, parey Praslin sa enn ki ti ganny fer dernyen fwa, bann ansennyan ki ti laba i ankor dezapwente avek reaksyon Minis Ledikasyon lo serten size.

Sa lannen 2023, Minister Ledikasyon i sa landrwa ki'n fer retournen pres R20 milyon dan Bidze aköz *delay in recruitment*. Tou sa kriye ki bann ansennyan, paran e zanfan, etidyan pe dir ki zot bezwen plis etidyan dan serten size. Sa Minister i dormi avek *recruitment*.

La ankor en gro Bidze R1.4 milyon ni en logmantasyon pou bann *teachers* apre ki sa Gouvernman in pran zot *long service*. Ansennyan lapey i fay e zot ti pe espekte en logmantasyon. Me mon pa vwar nanryen pou zot menm parey pou nou bann ners e travayer lasante.

Ansennyan in nepli anvi tann zistwar ek poenm. Zot oule vwar zot demann ganny akonpli pou zot kapab delivre sa nivo ledikasyon ki nou zanfan i bezwen pou zot an retour vin bann bon sitwayen

e swazir en karyer ki zot kontan pou fer.

Problenm disiplin i enn ki reste en gro problem dan lekòl. Mank inovasyon ki ale avek bann zenn etidyan pou kapab ede redwir problemm disiplin napa.

Mon kontan pou vwar ki nou *Laptop Scheme* i ankor la me kwa ki Gouvernman pe fer, pou ki *internet* i vin abordab, zisteman pou sa etidyan ki ler i ariv lakaz kapab servi sa *laptop* pou li fer son resers e lezot travay spesifik?

Mon pa'n vwar ki mannyer sa Bidze i adres sa problemm *internet* pou konplemant sa *Laptop Scheme*.

Mr Speaker, sa R600 dan logmantasyon pou etidyan Zil Pros pa fer gran diferans dan lavi sa bann etidyan. Aköz sa kantite demann ki ganny enpoze lo zot par zot lekòl parey rod materyo e osi kou lavi, sa larzan i fay.

Paran Digwa pou kontinyen vwar zot pe trimouse pou ed zot zanfan ki dan pos segonder. Bann etidyan Zil Pros i tap tou pou zot ganny aksepte dan lekòl pos segonder. Me ki nou vwar, ler zot in lekòl dan serten domenn napa sa travay lo Zil Pros.

Serten i ganny lanplwa Mahe zot bezwen refize aköz saler ki zot gannyan i pou

ganny servi zis pou lwe lakaz oubyen apartman.

Si zot deside reste e pran sa louvraz lo Mahe. Alor la zot paran i bezwen fer de louvraz lo La Digue pou kapab anvoy larzan pou zot, pou ganny manze e pey bann lezot *utilities*.

Bann ki retourn La Digue zot dekouraze e zot tonm dan sibstans akòz zot ankor zenn e zot ti annan rev e zot vwar zot rev i brize.

Alors mon pe demann Gouvernman pou fer konstri bann apartman spesifikman pou nou bann zenn etidyan ki fini zot lekòl pos segonder e ki ganny en lanplwa isi lo Mahe ki zot kapab lwe a en pri pli afordab. Sa i en lenspirasyon nou bann zenn Digwa.

Mr Speaker, *part rental* i reste en difikilte ki plizyer dimoun i fer fas avek. Plizyer dimoun i al rod *part rental*, me sa kantite lipou ki zot pas atraver i zis enkrwayab. Met dan Bidze i enn me met an aplikasyon gro problem pou dimoun ganny akse.

I en kosmar pou plizyer dimoun ki bezwen sa sipor sosyal. *MNA* i bezwen mele, me pa koumsa i sipoze marse. Sa sistenm e son prosedir i devret annan latransparans.

*Loan* kot *HFC* Digwa i vremen ganny difikilte ek sa prosedir. I tarde. Akòz swa zot ganny dir zot kotasyon i tro o

oubyen zot pa kalifye sa kantite. Oubyen zot bezwen *scale down* zot lakaz ki deza pti.

Ki kalite zwe Gouvernman pe zwe? Eski zot pe espekte en lakaz 2 ou 3 lasanm La Digue kout menm pri avek enn lo Mahe? Zot konnen ki kou lavi lo La Digue in vin pli ser ankor depi ki zot in vin o pouvwar.

E Minis li menm in dir ki kou lavi pa desann, sa i en term envant par politisyen. Alors i ti devret pe met en sonm larzan dan Bidze spesifikman pou soulaz pri materyo konstriksyon lo La Digue. Mon pa'n vwar nanryen. Zot pa enterese pou *deal* ek sa kou lavi.

Gouvernman in osi met en sonm R5 milyon dan Bidze pour *scheme* renovasyon lakaz bann pansyoner. Sa i en *loan* avek *HFC* pour bann pansyoner ki anvi fer serten renovasyon lo lakaz. Ankor mon retourn lo spesifisite.

Sa pansyoner Mahe sa renovasyon ki i pou kapab fer avek 100 mil lo son lakaz, en pansyoner La Digue pa pou kapab.

Eski i pou annan konsiderasyon pou donn bann pansyoner Digwa en pe plis an relasyon avek kou konstriksyon oubyen *one size* pou *fits all*?

**(APPLAUSE)**

**HON ROCKY URANIE**

Akoz i annan dimoun in dir *one size pa fit all*, savedir get byen ki zot pe vin avek pou nou.

So, ki proporsyon sa R5milyon ki pou dedye a zabitan Zil Pros? Mon ti ava kontan konnen si nou pou vreman vwar en diferans. Oubyen si zot in zis balans en sonm la, prezan si pansyoner Digwa i pas dan difikilte, i ganny problem sa i zot demerd parey en bann pe pase la.

Nou'n fer plizyer *meeting* konsernan konstriksyon lakaz. E plizyer dimoun dan mon distrik pe demann mwan kan proze lakaz pou fer. E zot ti espekte sa lannen tann en keksoz dan nouvo Bidze, me zot pa vwar nanryen.

Proze Lakaz lo La Digue pe al vin en zouti politik parey plizyer lezot e sa probableman pou ganny fer an 2025. Digwa espere zot ava vwar.

Pri komodite en lot zafer ankor e ler *STC* i dir in fer R66 milyon profi. Mon demann mon lekor, ledou nou bann malere ki mannyer i ete? Lo mon zil pa borde ek pri komodite sa lavi i ser. Mon bann oponan politik olye ede zot ti zis gognarde aköz zot pa viv La Digue.

Sa proze *sewage* i enn proze inisye par nou Gouvernman e \$14 milyon ti deza la pou fer sa travay. Me ler nou get sa sityasyon ki mannyer semen pe ganny fer. Semen pe ganny destabilize e kantmenm pou pyeste pa konvenab.

Yer, en madanm in *call* mwan i pe dispit kondisyon semen, aköz son msye in tonbe in deplis zenou, deplis koud e lanmen aköz sityasyon semen. Zanfani tonbe, touris i tonbe. Mon ti pe espekte vwar en larzan pou refer semen La Digue dan Bidze, mon pa oule vwar larzan pou pyeste semen La Digue.

Fermye i ankor pe ganny difikilte pou ganny *loan* ki zot merite. Prosedir *tender* e kontra netwayaz i bezwen vin pli transparan pou piblik.

Pa met zis lo *Zournal* Nasyon aköz nou pa ganny sa kantite nasyon lo nou zil. Servi medya nasyonal parey *SBC* ki preski tou dimoun i vwar. Kontra pou netwayaz bann drenaz i bezwen ganny met lo *tender* pou kre loportinite lanplwa pou nou zenn. Ki zot pe kasyet ki zot pe fer dalon ganny kontra anba, anba sirtou lo mon zil La Digue?

Bann pye dibwa ki pe menas lakaz e dimoun pa pe vwar nanryen ganny fer kantmenm zot pe met zot konplent devan. Swa i tarde



oubyen pa vin ditou. Koupir elektrisite ki pe ariv pli souvan lo La Digue e bann zabitan pe demande ki solisyon Gouvernman pe anmennen dan Bidze, nanryen.

Mank lalimyer lo semen prime e segonder. Ler nou demann 40 nou ganny zis 4 e sa 4 i pou ranplas 4 ki'n deza ganny afekte. Me non pa pou met dan nouvo landrwa. Bann dimoun aze La Digue i ankor pe demann mwan oli zot R10 mil. Sa ankor ti en fo promes zis pou ganny eleksyon.

*L'Union Estate* in vin pli deteryore pandan sa dernyen 3an. E la Gouvernman in fini napa nide ki pou fer avek sa landrwa. Peser ki servi Lapas Manynan La Digue, ankor pe konplent aköz zot bato i kroze e defonse. E bann latet koray ki dan sa lapas.

E zot ankor pe demande kan ki sa lapas pou ganny grate pou fer en pe pli fon, pou zot kapab al lapas toulezour dan plas bezwen vey mare pou sorti. E parfwa ler mare i bon fernwanr in fini fer. Sa pe rann bann peser ki servi sa lapas fristre e personn pa pe rezourd zot problem.

Bann travayer kiltir pe rode ki pe arive avek zot larzan *fungus* La Bastille. Aköz tou le-z-an zot tann mansonz e la zot pa'n antann naryen lo sa peyman.

Bokou ki pa viv La Digue i kriye bokou transpor lo La Digue. Me nou Digwa nou vwar ki kantite difikilte nou gannnen pou ganny en transpor pou en servis. Bokou i konplent konsesyon trafik sa i aköz sityasyon semen ki bezwen byen ganny aranze.

*Moratorium* lo konstriksyon, ankor lasanm pou touris i ankor la. *Tourism* pe ankouraz *club car* konman en servis pou kliyan, me son menm Gouvernman pe dir retir *club car*.

Ki kalite konfizyon sa? Sa Bidze i zis enn ki *business as usual* e mazorite Seselwa pa pe ganny touse. Sa bon *deal* ki zot ti pou donn Seselwa in vin zis en rev e zot pe donn leskiz parti leskiz.

Atraver ou Mr Speaker, Onorab Georges sak fwa mon nonm €25 milyon i grate. Mon krwar i konnen ki i gannnen ladan. I sitan grate ki ler i pe koze i vin parey kanmaron e mazin an ayer. I dir ki sa Bidze i Bidze 2004.

**(APPLAUSE)**

### **HON ROCKY URANIE**

En *Leader* pa konn son prop Bidze. Onorab Georges tir sa blok dan ou lizye avan ler ou vin rod lapay dan sa ki pou mwan.

**(APPLAUSE)**

**HON ROCKY URANIE**

Seselwa in ganny ase. 2025 zot pou deor! Mersi Mr Speaker.

**(APPLAUSE)**

**MR DEPUTY SPEAKER**

Mersi Onorab Uranie. Ler ki'n arive si nou pou pran en lot entervenman ki pou koz 30 minit i pou anmenn nou ziske pres 4er. So nou ava *break* la e nou ava repran 4er. Donk nou a zwenn 4er.

**(BREAK)**

*(Mr Speaker in the Chair)*

**MR SPEAKER**

Bonn apre midi tou dimoun. Nou a repran deba. Pou gard nou program nou bezwen pran ankor 3 entervenman dan sa peryod. Mon a donn laparol premye, Onorab Kelly Samynadin.

**HON KELLY SAMYNADIN**

Mersi Mr Speaker. Bonn apre midi Mr Speaker, tou mon bann koleg Onorab e tou dimoun a lekout espesyalman zabitan Distrik Au Cap.

Mr Speaker, Bidze pour lannen 2024, prezante par Minis Naadir Hassan, i enn ki pe demontre sa travay kontinyel Gouvènmman LDS ki'n konmanse depi Oktob

2020, dan son demars pour akonplir son misyon ki i ti'n etabli. Ki pour anmenn Sesel dan en nouvo dimansyon konman en pei –

*(Interruptions)*

**HON KELLY SAMYNADIN**

Mon ava repran Mr Speaker? Mr Speaker, Bidze pour lannen 2024, prezante par Minis Naadir Hassan, i enn ki pe demontre sa travay kontinyel Gouvènmman LDS ki'n konmanse depi Oktob 2020, dan son demars pour akonplir son misyon ki i ti'n etabli.

Ki pour anmenn Sesel dan en nouvo dimansyon konman en pei ki pe byen ganny gouvènmman, ki pe sanpyonn drwa son pep, ki pe kre loportinite pour nou lekonomi prospere e ki pe asir sekirite e byen net son pep.

I en Bidze ki pe portre loptimizm, ki pe viz ver lavenir e kot nou bann zenn i kapab dir zot annan lespas pour zot anfen epanouir. Sa Bidze i pour tou Seselwa.

Mr Speaker, nou'n akonplir bokou konman en Gouvènmman. Lalis i long, me nou bezwen admet ki i ankor annan bokou pour fer. Osi an mezir ki nou adres nou bann defi.

Me sa Gouvènmman ki la, in demontre ki malgre ki i

nouvo, nou'n kapab met sa pei re debout lo son de lipye. E Seselwa i kapab dir ki zot osi zot pe gout en morso dan sa gato laviktwar zot osi.

Nou tou nou vwar ki nou bann koleg lo lot kote latab byensir pa pe vwar nanryen ki bon dan sa Bidze. E zot pe sey rod tou mannev pour detourn tou sa ki'n ganny dir lo lanver.

Me mwan konman en Manm ki pe reprezant sa Gouvernman, mon oule fer Seselwa konpran ozordi, ki napa nanryen ki bon pour sa bann dimoun. Zot larealite i plito enn ki imaziner. Sa ki zot dir la anndan i totalman le kontrer ek sa ki pe pase laba deor.

Zot pe toultan dir nou ki nou'n ganny elekte pour fer pli byen. Wi, Mr Speaker, sa i zot levanzil ki zot prese toulezour. E mon pour aksepte Mr Speaker, ki wi, nou pe fer pli byen. Me par kont, letan zot santi loder pli byen, napa nanryen ki bon menm pour zot.

Zot ti *boycott* Lopital La Digue Mr Speaker, e menm fer petisyon pour son konstriksyon pa materyalize.

Selman ki nou'n vwar detrwa zot dan zot triko rouz ti deklar malad dimans pase e al asiz anba sa menm lopital. Pa nou pe fer pli byen Mr Speaker?

**(APPLAUSE)**

**HON KELLY SAMYNADIN**

Ladan menm, dirizan zot parti a dir ki son larm i koule ler i vwar sa lopital i vid. I paret mwan i pann mars ase sa 2 zour ki in fer lo La Digue. Mr Speaker, pou li realize ki depi Oktob 2020, Digwa nepli malad parey avan. Digwa i an bonn sante.

E zis pour met a latansyon Onorab Uranie, atraver ou Mr Speaker. Dir granmersi Gouvernman LDS ki ou'n kapab vwar en alokasyon R1milyon dan Bidze pour *sports complex* La Digue.

Sey dir mwan kan ki ler zot ti o pouvwar ki ti annan en Bidze pour *maintenance* ou renovasyon sa menm *sports complex*?

**(APPLAUSE)**

**HON KELLY SAMYNADIN**

Mon plito krwar ki ou ki'n *fail* e ou ki bezwen *resign*.

**(APPLAUSE)**

**HON KELLY SAMYNADIN**

Akoz si ou ti vremen konsernen pour ou zil ek ou zabitan, ou pa ti pour demande ki pour fer avek R1 milyon kan ou Gouvernman, ni R1 pa ti kapab tire pour fer bouze La Digue.

**(APPLAUSE)**

**HON KELLY SAMYNADIN**

Mr Speaker, dan demars nou Gouvernman pour asire ki nou bann zenn i vin bann partisipan konpetan dan en sistenm ekonomik modern, ensi ki bann sitwayen responsab. Sekter ledikasyon in ankor enn fwa mentenir pli gro alokasyon Bidze akote sekter lasante.

Mon vreman apresye pour antann Minis Hassan dir ki sa sekter i enn parmi sa 6 pilye priyorite, ki nou Gouvernman pe ekspekte met plis lanfaz lo la, apartir nou stratezi devlopman nasyonal e sa se en sistenm ledikasyon pli modern ki anlinyen avek nou bann bezwen dan le fitir.

Mon felisit Gouvernman pour sa travay konpreansiv ki pour ganny fer konzwentman avek bann formater *careers guidance*, ensi ki avek Liniversite Sesel avek bi pour kapab ofer nou bann etidyan bann gidans karyer pli realis e ki reflekte sa ki vreman an demann dan Sesel.

Mon oule osi felisit Gouvernman pour anfen revwar *Laptop Scheme* kot ozordi bann zanfana P5 ek P6 i kapab zot osi zwir benefis sa *scheme*, anvi ki sekter teknolozi i enn ki primordyal. Nou Gouvernman in rekonnet ki an mezir ki lemonn i bouz dan sa laz nimerik, nou osi

nou pa kapab ganny kit deryer. E sa i bezwen konmans primordyalman avek nou bann zanfana en tre zenn az, akot se zot bann fitir gouvrenans nou pei.

Avek bi pour ankouraz nou bann zenn pour investir dan zot prop ledikasyon, mon apresye ki Gouvernman pe kontinyen avek *scheme loan* ledikasyon ki ti konmanse lannen pase.

E sa i pou espesyalman pour bann zenn ki pa'n kalifye pour en labours avek Gouvernman. Loportinite pour nou bann zenn epanouir i la. E mon pe demann zot pour sezi sa loportinite ki a zot laporte akot i enn bann plan kle nou Gouvernman pour investir dan nou lazenes. En pep ki edike i garanti progre e stabilite ekonomik en pei.

Mr Speaker, i enportan ki nou bann ankadrer dan ledikasyon, ki byensir nou bann ansennyan i byen ganny renimere.

Alors mon pour felisit travay ki Minister Ledikasyon pe fer pour anfen revwar zot *scheme of service* ki ti'n plis ki ler pour met en lizye lo la. Nou bann ansennyan i fer bokou sakrifis pour garanti byennet nou bann etidyan.

E menm parfwa tir larzan dan zot pos pour kapab rod materyo letid pour satisfere

bezwen laprantisaz nou bann etidyan.

Avek sa revizyon, sa i ava ede anmenn plis motivasyon, garanti plis sipor e efikasite parmi nou bann ankadrer. Onorab Uranie, ankor enn fwa atraver ou Mr Speaker, ou pe koz lo fristrasyon? Be fristrasyon ansennyan lontan i egziste. Pa fek arive Oktob 2020.

Konman en ansennyan mwan osi mon'n konn fristrasyon. Mon'n konnen ki savedir travay avek zis 30 liv pour en nivo plis ki 100 etidyan.

**(APPLAUSE)**

### **HON KELLY SAMYNADIN**

Tou le-z-an nou ranpli form rekizisyon, me zanmen liv i arive.

Mon konnen ki savedir mandyan paran pour kapab fer fotokopi. Akoz swa ti napa ase liv pour etidyan swiv, swa masin ti'n kase, oubyen ti napa ase papye.

Alors pa vin fer nou krwar ki ansennyan fek konmans fristre depi ler *LDS* in vin o pouvwar.

Mon ti a kontan konman en ansennyan par profesyon, felisit tou bann ansennyan ensi ki bann lezot travayer ledikasyon pour sa travay formidab ki zot pe fer. Ou sa *office manager*, sa *cleaner*, sa

*tuck shop operator*, sa *lab technician*, sa zofisye sekirite.

Zot tou zot zwe en rol entegral pour asire ki nou bann zanfan i antre dan baro lekol dan bomaten, e sorti 2er edmi, avek en santiman ki zot lenstitisyon skoler i en landrwa kot zot kapab al aprann e zwir en moman agreab dan sa parkour zot lavi.

I egalman enportan pou note ki lenstitisyon ki asir formasyon bann edikater pa'n ganny kit deryer. E sa i atraver travay renovasyon mazer ki pou pe ganny antreprann kot sa lenstitisyon.

Sa i ava garanti ki nou bann fitir edikater i ava annan en lespas letid pli konfortab e pli enklisiv pour etidye.

I osi enportan pour note ki plizyer lezot lenstitisyon skoler pe al pas atraver bann faz renovasyon oubyen konstriksyon mazer. Tousala avek bi pour garanti ki lansennyman ek laprantisaz i deroul dan en lanvironnman ki enklisiv e konfortab.

Mr Speaker, i annan bokou defi ki bezwen ganny adrese pour ki nou kapab anfen kre en sistenm ledikasyon ki pli performan. Dan sa laliny mon pour rekomande ki Minister Ledikasyon i revwar *code of conduct* lekol pour asire ki bann regilasyon ki ganny met

an plas i anliny avek nou konteks aktyel.

En legzanp, eski lafason ki sispanasyon pe ganny determinen la aktyelman i ankor relevan?

*Internal suspension* wi, i ase relevan aköz bann etidyan i anba sipervizyon bann *staff* kot lekol. Me fodre ki zot pe ganny donnen bann aktivite pou fer ki pou anmenn zot pou reflesir lo konsekans zot aksyon, ensi ki fason pou amelyor zot konportman.

Me an sa ki konsern, *external suspension*, mon panse ki sa i bezwen ganny revwar konpletman. En zanfani ganny anvoye dan lakour, son paran i bezwen al travay e i *end up* li tousel.

Paran pa neseserman annan gran kontrol lo sa ki zot zanfani fer pandan zot labsans. E lanmenm ler zot *end up* dan bann move lenfliyans.

Nou bezwen admet Mr Speaker, ki nou pa kapab rezourde en mal avek en lot mal. Letan sa zanfani retoun dan lakour lekol e dan en *setting* laklas, souvandfwa i vin pli pir ki ler i ti ale.

Mon santi ki i bezwen annan bann mezir lankadreman siplemanter pou bann zanfani ki pe demontre bann siny en disiplinier. Bann lekol i bezwen travay pli konzwentman avek paran,

Lotorite Distrik pou kapab asire ki nou bann zanfani ganny bann swen neseseur pou ki zot laprantisaz pa ganny enteronpe.

Nou bann ankadrer i bezwen ganny pli byen ekipe pou zot kapab pli byen detekte bann siny ki swa sosyal, fizik, psikolojik ki pe permet bann etidyan pou komet bann aksyon anti sosyal, ki an retour pe afekte zot laprantisaz ensi ki zot lanvironnman imedyat.

Pour nou kapab obtenir en sistenm ledikasyon ki pli performan, disiplin i reste a mon'n avi, defi prensipal ki bezwen ganny adrese. E mon konvenki ki avek sa enn Bidze, i annan travay ki pou ganny fer pou adres sa.

Mr Speaker, mon pou ankor ensiste ki Minister Ledikasyon i revwar plas ki larelizyon i ganny ansennyen dan lekol. Nou bezwen rekonnet ki pa tou etidyan ki annan menm krwayans spirityel e nou pa pou kapab permet ki serten i ganny kit deryer. Ki swa ou katolik, protestan, mizilman, kretyen eksetera. Tou zanfani i bezwen ganny menm nivo lankadreman moral ki iniversel pou zot kapab epanouir dan zot lanvironnman skoler.

Dan sa ka, mon pe rekomande ki *curriculum*

larelizyon i ganny revwar pou ki sa laspe spirityalite e moralite i ganny adrese dan en konteks zeneral pour ki okenn etidyan pa ganny kit deryer. Avan mon terminen lo sa laspe ledikasyon, mon ti a kontan remersye e felisit Lasanble Nasyonal pour sa partenarya ki nou'n antre ladan avek Minister Ledikasyon pou ede ankadre bann ansennyan, an sa ki konsern lansennyman lo parlman ek demokrasi parlamanter.

Sa i pour permet bann ansennyan ganny loportinite pour aprann lo fonksyonman Lasanble Nasyonal, lo la demokrasi, ensi ki annan bann diskisyon lo bann konsern kle ek bann defi dan ledikasyon sitwayennte, atraver bann latelye kot zot pou ganny sans pou devlop bann stratezi kle ek preparasyon leson.

E letan zot in konplet zot formasyon, bann ansennyan pour resevwar bann resours e materyo enportan ensi ki konsey ekspertize avek bann *staff* Parlamanter lo ki mannyer pour anrisi ledikasyon sitwayennte ki pe deza ganny ansennyan dan laklas.

Mr Speaker, malgre ki nou annan en gran kours nou popilasyon ki travayan e ki pe sezi tou bann loportinite biznes pour zot kapab viv. I touzour annan en proporsyon

ki parey Minis Hassan in dir dan son diskour, pe fer fas avek bann fleo sosyal.

E sa i enkli labi sibstans ek lalkol e nou Gouvernman pe pran tou mezir posib pou kapab adres sa bann defi.

Akoz in rekonnet ki sa i rezon prensipal aköz ki serten dimoun i tonm dan lapovrete.

Lalit kont drog i kontinyen avek ranforsisman sekirite kotyer. Me i osi annan sa laspe reabilitasyon ki Gouvernman pe met bokou lanfaz lo la. Bokou adikt i souvan pas atraver sa ki nou apel *relapse* si zot pa ganny byen reabilite. E byensir fodre nou pa bliy bann nouvo adikt ki zot bezwen ganny pran an kont zot osi.

Mon oule felisit nou Gouvernman ki atraver sa Bidze, bann pasyan adiksyon pa pe ganny kit deryer. E byento nou pour vwar konstriksyon de fasilite reabilitasyon lo Mahe ensi ki lo Praslin.

Wi, Mr Speaker, zot osi zot bezwen en dezyenm sans. Fodre pa nou bliye ki se mazoriterman nou bann zenn ki tonm dan sa bann fleo, sirtou kot drog i konsernen.

E en kantite parmi zot pa dan lanplwa formel, ki fer ki nou napa ase Seselwa pou soutenir demann lanplwa dan nou pei. Enn bann rezon

prensipal pour lakoz ki laz pansyon in monte.

An mezir ki plis dimoun i pran zot retret, lakantite zenn ki pe antre dan lanplwa pa ase pour satisfè bann trou vid ki pe ganny kree par bann ki pe retirete.

Mr Speaker, anba Lazans pour Proteksyon Sosyal, i annan plizyer benefis ki pe ganny revize. Sa i enkli benefis maternite ek paternite, benefis semi orfelen, benefis pour bann zanfan abandonnen oubyen orfelen.

Benefis pou bann paran adoptif ek bann zanfan adoptif. Benefis pour bann dimoun ki'n perdi en *partner* e ki ti pe resevwar en benefis avek ASP. Benefis pour bann manman ki pe al donn nesans sorti lo bann Zil Pros ki bezwen desann Mahe.

Me pli enportan ankor, se sa nouvo benefis ki Gouvernman pe entrodwi pour bann madanm ki'n donn nesans a 2 ou plis pti baba.

Mon oule felisit e remersye Gouvernman pour rekonnet sa bann diferan benefis, ki sa bann diferan group dimoun ti pe resevwar ti'n ariv ler pou ganny revwar la ki performans ekonomik pei pe amelyore.

Sepandan Mr Speaker, mon santi ki napa ase vizibilite oubyen ledikasyon lo sa bann diferan servis ki pe ganny ofer.

Akoz plizyer dimoun dan distrik i apros nou e zot pa okouran lo bokou lenformasyon.

Mon ti a demann Lazans pour Proteksyon Sosyal atraver bann travayer sosyal, pour travay pli konzwentman avek Minister pour Gouvernman Lokal, pli spesifikman bann administrater distrik pour fer en pti pe plis promosyon sa bann servis, pour benefis nou bann dimoun dan kominote kot nou bann diferan biro ladministrasyon distrik.

An vi ki se kot sa lenstitisyon ki aplikasyon sa bann diferan benefis i ganny fer a premye lye.

Mr Speaker, nou Gouvernman i enn ki pe travay pour fer sir ki sak travayer i pran plis responsabilite e vin pli prodiktiv dan zot diferan lanplwa respektif.

E sa i atraver lentrodiksyon *results-based management*. Letan ki lopozisyon pe ensiste pour pey tou travayer zot trezyenm mwan saler plen. Nou lo sa kote latab nou pe lager pour ki tou bann ki travay pli dir i ganny peye plis ki sa enn ki'n trenn lipye.

E an menm tan nou pe lager pour ki sa enn ki trenn lipye, i rekonnet son febles e i travay pour amelyor son performans. Se sa ki nou anvi



vwar dan nou pei Mr Speaker, en lafors travayer ki konpetan e kot sak Seselwa i konnen ki i pe ganny rekonnet pour son zefor e devouman.

E la mon oule profite pour felisit e ankouraz tou travayer Seselwa, pe enport ki louvraz i fer. Kontinyen debourye. Kontinyen travay dir pour nou zoli pei. San zot, progre ekonomik pei pour an kestyon.

Mr Speaker, letan nou pe koz lo travayer mon pa pou kapab pa koz lo nou bann zofisye lapolis e tou lezot travayer dan lafors. Mon oule komann sa bon travay ki zot pe fer pour ede garanti sekirite nou bann dimoun dan kominote.

Mon oule rekonnet ki dan distrik Au Cap, nou'n reisi remark en entansifikasyon dan *community policing*. E pour sa mon oule salye zefor bann zofisye kot Stasyon Lapolis Anse Royale e Anse aux Pins pour sa travay ekselan ki zot pe fer.

Me par kont, mon pe lans en lapel a nou bann *Station Commanders*, ensi ki bann *Regional Commanders* atraver pei, pour met en lizye pli pre lo nou bann zofisye.

Sekirite bann zofisye madanm dan bann Stasyon Lapolis i reste en gran konsern, sirtou letan zot pe travay zot tousel. Mon konnen

ki resours imen i reste en konsern ki bezwen adrese, me antretan en lot stratezi i kapab ganny enplimante pour kapab garanti zot sekirite e evite ki bann konfrontasyon ou latak avek sivilyen i arive.

Mr Speaker, an sa ki konsern lasante mon ti a kontan osi remersye e felisit bann travayer servis lasante Anse aux Pins e Anse Royale, sa de klinik ki osi deservi distrik Au Cap, pour travay eksepsyonnel ki zot pe fer pour garanti soulazman dan lasante nou bann zabitan.

Sepandan, mon ti a kontan met lanfaz lo klinik Anse aux Pins parey mon koleg, *MNA Elekte* pour distrik Anse Aux Pins, Onorab Clifford Andre in fer pli boner. E sa i an term leta sa lenfrastriktir ki date pour plizyer lannen. Mon pa ni ti menm ankor ne si mon korek.

Sa klinik in arive tro pti pour kapab satisfere demann servis pour distrik Anse Aux Pins, Au Cap e Pointe Larue ki pe kontinyelman ogmante. Mon'n aprann ki Minis ti resaman vizit sa fasilite e mon swete ki swivan sa vizit, nou ava kapab byento konnen ki plan Gouvernman an term renovasyon ou rekonstriksyon klinik Anse Aux Pins.

Mr Speaker, *service delivery* kot bann lenfrastriktir lasante i reste touzour en

konseren. Pasyan ankor pe esper plizyer erdtan pour vwar dokter oubyen pour ganny apwentman spesyalis.

Erezman ki i dan plan Gouvernman anba sa 6 pilye priyorite pour garanti en pep ki an bonn sante, e mon konvenki ki i annan travay ki pour ganny fer dan sa laliny pour garanti ki sa defi i ganny adrese. Toudmenm, mon swet bon kouraz a tou travayer lasante e mon demann zot pour kontinyen donn zot tou pour anmenn en meyer servis a tou bann pasyan.

Mr Speaker, mon anvi senserman felisit travay ki Konsey Nasyonal pour Resours Leritaz baze dan Distrik Au Cap pe fer pour fer nou pep revalorize nou kiltir, tradisyon e leritaz Kreol. Zis pour note, Domaine Val de Pres anba zesyon Madanm Benjamine Rose ek son lekip in aprezan vin en landrwa ki pli vivan.

I annan plis aktivite ki Seselwa ensi ki bann viziter sorti aletranze i kapab zwir tel ki fame Bazar Domaine ki fer tou le mwan.

Pandan 2023, nou'n osi vwar louvertir Mize Koko ensi ki Lakaz Roza. E mon pe osi lans en lapel avek tou bann lenstitisyon skoler pou ankouraz zot bann etidyan atraver bann *field trips*, pour al dekouver lorizin nou kiltir e

tradisyon pour vizit sa bann sit tre enteresan. E osi bann letablisman touristik pour ankouraz zot bann kliyan pour zot osi vin a la dekouvert sa bann sit.

Mon osi apresye sa partenarya ki i annan ant Leritaz avek Departman Tourizm pou arive anfen reouver laport restoran Vye Marmit anba ziridiksyon Lakademi pour Tourizm, ki pe fer en travay formidab an sa ki konsern promosyon e lavant bann pla tipikman kreol.

Mon konvenki ki avek sa Bidze ki Lenstiti pou Kiltir, Leritaz avek Lar ava ganny resevwar, i a permet zot pour kree e organiz plis divertisman ensi ki dekouvert pou tou bann pasyonnen pour kiltir, lar ek leritaz.

Mon osi swete ki travay renovasyon lo Lenstiti Kreol ki ti'n ganny retarde, i ava anfen konplete lannen prosenn pour ki enn nou bann moniman nasyonal pli prestizye ensi ki leker nou zoli Distrik Au Cap, i ava anfen kapab re ouver son laport a nou bann viziter.

Mr Speaker, pour lannen 2023, mon rekonnet ki Distrik Au Cap in akonplir ase sifizaman an term proze kominoter. Mon note ki proze drenaz Sawa Sawa in kapab anfen konplete. E zabitan ensi ki lezot dimoun ki servi sa morso semen pour al dan Sid

nepli fer fas avek linondasyon dan sa landrwa, e Madanm Nageon in anfen kapab soulaz en pe.

Semen D'Offay *Estate* in kapab anfen ganny elarzi apre plizyer lannen ki sa proze in an diskisyon e nanryen pa ti'n materyalize. Mon oule osi profit lokazyon pour remersye tou zabitan D'Offay *Estate* ki'n korpere avek nou dan demars pour obtenir *wayleave*, ensi ki dan bann lenstans kot semen ti fermen pour travay kapab progrese.

Finalman, proze in mazoriterman konplete e dapre kontrandi ki mon'n gannyen, zabitan i tre satisfè. Annie, Mervin, Christine ensidswit, mon konnen ki zot byen kontan.

Semen St Roch in osi parsyelman ganny elarzi apre plizyer lannen kot zabitan, ki deservi sa morso semen ti pe sibir lenpak sa semen sere dan kontour, sirtou kot Mr Roy Collie. Mon konnen ki i annan ankò travay adisyonnèl pour fer, me mon asire ki sa ki nou'n arive fer i touzour en soulazman pour sa group zabitan.

Nou osi annan lezot proze semen ki pour pran plas an 2024 tel ki *resurfacing* semen *Green Estate*, semen anba Zanmalak, kot *bakery* Pointe au Sel, eemen Lelefan ensidswit.

Mr Speaker, mon oule reasir zabitan Dan Gravye ek Dan Kreson ki nou pe inifye zefor ansanm avek Onorab Andre pou ki sa de proze semen i ava kapab materyalize. E mwan osi mon pe demann lotorite konsènen pou met en lizye pli pre lo sa de proze semen. Akòz i enn ki pou benefisye plizyer fanmir, sirtou dimoun aze ki *bedridden*, an vi ki akse lanbilans i reste touzour en gran konstrent, ki fer mwan mazin Madanm Labrosse anler dan leo Dan Gravye.

Lafanmir Port-Louis anler Mouripas, zabitan *Lower D'Offay* osi, diskisyon i an kour pour ki zot osi zot kapab ganny zot semen. 8 *unit* lakaz dan proze Le Domaine *phase 2* in kapab anfen konplete, pour ki premye group zabitan *ex-teachers*, i kapab anfen bouze anvi ki Gouvernman pe al demolir sa bann blok *flats* tre byento ki ti'n vremen avarye.

Mon oule profite pour reasir bann lezot zabitan *ex-teachers* ki tre byento kontinyasyon proze Le Domaine *phase 2* pou re demare e zot osi zot pou bouz dan zot nouvo lakaz. Nou osi annan proze renovasyon *flats Dolphin Courts* ki tre byento pou konmanse. E bann prosedir konsiltasyon avek zabitan pou konmanse apartir semen prosenn.

Mr Speaker, fasilite asize kot laplenn foutbol Au Cap in finalman terminen apre en pe letan ki sa proze ti dan *pipeline*. E tre byento nou pour fer konstriksyon fasilite twalet pour ki bann *sportsmen* e piblik an zeneral ki deservi sa fasilite i ava kapab ganny akse avek.

Me mon oule profite pour demann avek tou dimoun ki vin la kot sa laplenn foutbol, pour servi byen sa bann fasilite. Akoz se nou menm nou ki pour sibir konsekans letan domaz i arive.

Mr Speaker, mon oule felisit Minister responsab pour Lakaz pour asire ki *scheme vulnerable home repair* in anfen kapab relanse. E mon soulaze ki lafanmir Isaac Pointe au Sel, lafanmir Samson *Green Estate*, lafanmir Marie *Jerusalem* enkli lezot fanmir i a kapab benefisye anba sa *scheme*. La ki proze *wayleave* in fini konplete, mon swete ki tre byento travay i a konmanse pour proze drenaz *Turtle Bay*, e bann zabitan i ava anfen aret sibir konsekans linondasyon sak fwa gro lapli.

Mr Speaker, semen Lakot Les, ki pas zeneralman dan distrik Au Cap, i enn ki pe sibir lenpak grav sanzman klima sirtou kot i konsern sa bann gro vag laroul ki mont lo semen. sirtou lo lakot Pointe

au Sel, kot miray pe konmans grennen.

Mon apresye pour konnen ki i annan en konversasyon konzwent ki'n konmanse ant Departman Lanvironnman avek Lazans pou Transport lo Later pour kapab rektifye sa problem osito ki posib.

Mr Speaker, nou osi annan proze *bus stop Green Estate* ki sipoze al dan faz enplimantasyon. Tou demars plan, *wayleave* eksetera in konplete. E mon swete ki lannen prosenn sa proze i a demare avek sa alokasyon R1milyon 500mil dan Bidze pour finans konstriksyon bann *bus shelters*. Toudmenm, mon oule profite pour remersye Lazans pour Transpor lo Later pou sa bon partenarya ki nou'n etabli ansanm avek Lotorite Distrik Au Cap pour asire ki nou bann lenfrastruktir semen i byen ganny *maintain*.

Mr Speaker, avan mon terminen mon ti a voudre remersi tou bann Minister, Lazans ek Departman ki'n travay konzwentman avek Lotorite Distrik Au Cap pour asire ki nou distrik i reste an sekirite. E ki bann proze ki nou'n anvizaze, i kapab materyalize e pour osi asire ki konsern bann zabitan i ganny adrese.

Mon oule osi profite pou remersye mon *clerk* Darius Petrousse pour son devouman pandan sa lannen. Mon *DA* Ms Sabrina Assary ensi ki lezot *staff* Ladministrasyon Distrik Au Cap pour sa lespri lekip ki nou'n *maintain* pandan sa lannen. E mon swete ki lannen 2024 i enn ki ava ranpli ek plis sikse ek boner pour nou zoli distrik.

Finalman, mon oule remersye tou zabitan Au Cap pour zot sipor ek lankourazman ki zot in donn mwan pandan sa lannen. Mon konnen pa tou keksoz ki'n al dapre zot lekspektasyon. Me mon swete ki lannen prosenn i ava enn ranpli avek plis sikse ek prosperite.

E Mr Speaker, mon zis oule fer *leader* parti minoriter konnen, atraver ou byensir, ki nou lontan nou'n pare pou debout ankor dan eleksyon. Selman, vi ki nou pa pran lord ek li, aköz li prezan ki li in pare pou met son portre lo en *billboard* e lo en *ballot paper*, nou, nou ava esper 2025 aköz nou lo sa kote latäb, nou'n ganny elekte pour 5an.

**(APPLAUSE)**

### **HON KELLY SAMYNADIN**

En lot pti keksoz ankor, Mr Speaker, mon zis anvi dir avek zot letan zot fer zot *rally* pour zot pas zot letan zis akize e

fann fo propagann lo dimoun, silvouple, *get your facts right!* I annan en gran diferans ant Samynadin avek Sabadin! Mersi Mr Speaker.

**(APPLAUSE)**

### **MR SPEAKER**

Mersi Onorab. Laparol pou Onorab Waven William.

### **HON WAVEN WILLIAM**

Mersi Mr Speaker. Detay bidzeter 2024 i devan Lasanble Nasyonälo pou ganny nou sipor. I enportan ki pep Seselwa i konpran ki mannyer Bidze pei i ganny met an plas. Ki mannyer sa larzan pou ganny anmase e servi pour sa sonm R10.9 ekek bilyon estimen. Sa i sa sonm provizwar ki Gouvernman pou bezwen 2024 Zanbye ziska Desann, pou li kontinyen travay ki annan pou fer dan plan devlopman sosyoekonomik pei.

Avan tou, mon pou remersi Bondye pou son faver e lagras lo nou pei. Mon remersi li pour son benediksyon e son proteksyon divin. San li nou en naryen ditou Mr Speaker. Tou louanz e laglwar i pou li tousel.

Mr Speaker, Minis in koz lo Bidze, medya in raporte e mon asire ki dan tou kwen Sesel e aletranze sa ki'n swiv zot konpran konteni Bidze

2024. Direksyon ki pei in pran e leta nou lekonomi.

Mr Speaker, mon rol e mon devwar se pou vot an faver sa Bidze e siport demars e zefor nou Gouvernman, siport bann benefis ki sa pep pou gannnen ki annan en valer moniter. Menm si zot pa pe resevwar tou sa larzan direk dan zot kont ouswa dan lanmen. Mon rekonnet zefor travay dir bokou Seselwa dan sekter piblik e prive ki'n permet pei ogmant larises.

Mr Speaker, pep ki pe swivre demars e zesyon larzan, i pou osi evalye nivo servis e efikasite Gouvernman dan zer sa larzan. Pli gro latas i reste ek sa enn ki pou zer sa larzan e donn servis sa pep.

Mr Speaker, sak Minister in ganny en Bidze e i bezwen prezant en plan. Pep i anvi vwar ki sa bann plan, ki larzan pe ganny vote, ki sa bann target mete i ganny zwenn. Si non pep i anvi konnen aköz atraver bann rezon valab me pa leskiz. Travayer servis piblik dan tou *post* i ganny peye en saler pou fourni en servis e delivre.

Mr Speaker, kwa ki fer mwan koz koumsa, aköz i annan travayer ki leve, desann ek en motivasyon, lanmour e en lanvi pou servi sa pep e pei. Tandis ki serten in kiltiv en lespri ranpli ek leskiz, gaspiyaz letan, annan en

lespri malisye e odasye pou fer lavi serten nou frer e ser malere.

Kestyon enportan ki Prezidan ti demande atraver enn son leksperyans, se si li Prezidan Larepiblik pe ganny sa kalite tretman ki sa senp Seselwa pe fer fas avek la an deor Mr Speaker?

Serten kliyan zot reazir, i annan ki servi mo ki pa devre ganny dir dan zot lakoler. Zot ganny dir ki zot ensolan. Mr Speaker, e prezan ki zot fer li pas plis matir pou en solisyon, pou en larepons dan 2 semen ki pran Mr Speaker ziska 4 mwan.

En legzanp, ou donn en Seselwa en kare later pou fer biznes. I komanse e prezant son plan kot *planning*. Prezan ki departman konsernen i vwar ki sa kare later, limero later in sanz 3 fwa. E ki limero ki zot in donn li i pa sa limero ditou.

Prezan son plan kot *Planning* i *on hold* e i pa konnen kan zot pou rezourd sa konfizyon pou li bouze devan. Ouswa ekrir en let kot lenformasyon presi pa ganny mete pou vremen pou fasilite lavi sa endividi pou bouze. I pa akseptab Mr Speaker e pa kapab kontinyen Mr Speaker, nou realize konbyen mwan i annan dan 1an. Si serten zofisye pe pran 5 mwan pou ekrir en let.

En let ki pa donn lenformasyon presi, ki kalite *training* fodre donnen pou amenn efikasite dan neglizans. Ouswa ek en latitid si ou pa kontan gete ou menm.

Mr Speaker, konbyen letan sa pep pou sibir sa bann kalite fason fer. Mr Speaker, pa fini atraver sa servis sak zofisye sa menm departman i donn ou diferan larepons, be pa pou fer ou fou avek zot Mr Speaker.

Serten menm dan biro, ki pe enplimant zot azanda partizan, zot odasye pou dir ek kliyan, ki sistenm oparavan ti pli fasil e pli vit tou. Dan sa sirkonstans frer e ser Seselwa eski ou blanm Gouvernman? Eski ou blanm Prezidan? Ouswa ou blanm sa zofisye ki pe mal fer son travay.

Atraver ou Mr Speaker, Onorab Vidot, ou trouve e konpran ki se pa Gouvernman ki enkonpetan. Me travayer ki'n ganny pozisyon malapropo ouswa ki annan en move latitid.

**(APPLAUSE)**

### **HON WAVEN WILLIAM**

Par fer matir kliyan, menm dir li, pa ou'n tik anler prezan ou a sibir.

Mr Speaker, sa kalite fason fer, pou fer Seselwa group ansanm pou menm rezon. Zot pou pil lo la, ziska

zot a forse tande. Akoz i pa anvi ni son ser e son frer kaye e viv lo petet.

Mon apresye ki Prezidan in komans koz lo amelyor efikasite dan servis piblik. Mon'n swivre rankont bann zofisye sinyor Departman Gouvernman pou diskite e vwar kote problem i ete.

Mr Speaker, mon kapab koz ziska demen bomaten lo pozitivite sa propozisyon Bidze 2024. Akoz dan sa Bidze Mr Speaker mon vwar tou Seselwa.

Wi, Mr Speaker, mon vwar en keksoz pou tou Seselwa. Mr Speaker, sa ki mon kontan se ki sa Gouvernman pandan sa 3an in donn benefis sa pep anmezir ki lekonomi i agrandi. Anmezir ki lekonomi i amelyore, benefis adisyonnell in ganny pase ek sa pep. Sa Gouvernman ki pep Seselwa in mete Oktob 2020 Seselwa in fer li en bon swa, Mr Speaker.

Mr Speaker, sa ki mon kontan ek *LDS*, zot kontan lafransiz me pa *sugar coat* problem, me dir li parey i ete. Vwala diferans ant *LDS* e *US*. Sa Gouvernman pe azir ek lasazes ek pridans dan zer larzan sa pei. Pa bliye Mr Speaker, frer e ser Seselwa sa demars asarnen ki *United Seychelles* ti'n anbark lo la pou anpes sa Gouvernman

travay depi ki zot in trouv zot lekòr dan lopozisyon.

Zot in konsistan dan anbet sa pep ek fo propagann, retir realite dan konteks e anvi depriv sa pep pou servi byen son lentelizans. Bril tou sa lapay ki zot anvi, senm tou sa ki zot anvi e evoke san ses, sa pep zot pa pou zanmen les zot andoy zot ankòr.

**(APPLAUSE)**

**HON WAVEN WILLIAM**

Mr Speaker, sa ladministrasyon pa'n vin donn bal dan larzan Leta. Me en Gouvènmàn ki'n vin met lord atraver pratik latrans e rankont. Ki fer bokou ankòler ozordi partou, partou, akòz nepli kapab anvoy lanmen pou pran, Mr Speaker. Lopozisyon pa pou kapab atas sa problem lo ledò Prezidan pou zot mal zesyon sèkter piblik dan zot letan.

Ki sa Gouvènmàn depi eleksyon 2020 in vwar li pe bezwen met bokou latansyon e zefòr lo aktivite *maintenance* bann move pratik, bann lesefer e degradasyon lo lenfrastriktir Leta e piblik. E parmi fason fer dan servis piblik Mr Speaker. Transformasyon dan servis piblik pa pou fasil osi lontan ki lopozisyon pe ankouraz son bann aktivis dan servis piblik

pou met retar par servi tou sort manev.

Anba parasol Sesel pour tou son zanfan, zot pe kanmoufle e zwe bann diferan rol, ki si ou pa ti parmi zot oparavan, pou konpran sa bann zwe. Nou vwar zot Mr Speaker, nou konn zot e pe komans vin annwiyan e entolerab. Ek sa zot riy ek ou tou Mr Speaker, kan saler zot pe riy ek ou konmsi zot in akonpli zot target bat ou latet.

I pa akseptab pou serten zofisye Gouvènmàn pa donn tou detay. Kwa ki kliyan bezwen fer ouswa dokiman ki i bezwen fourni. Menm blanm li akòz i pa'n anmennen e i pa'n anmennen akòz i pa ti ganny dir anmennen. Me fer li ale vini, gaspiy letan, gaspiy resours, ogmant kout lavi sa kliyan dan en fason ki i pa'n planifye.

Parey mon ti dir dan en Mosyon, *time is money*. Be si ou pe anploye ek sa monte desann pa ou pou ganny pouse, ouswa ganny blanmen zis akòz en servis piblik ki inefikas. Pep pe demande ki sa bann ki koupab i ganny *deal* avek. Si zot pa anvi travay al kot zot e pran zot letan pou trenn lipye, me sed plas ek sa ki anvi travay Mr Speaker.

Mr Speaker, si sa legzersis rezilta baze lo performans i ganny byen aplike dan bann Minister i pou



ede dekouver bann defayans. Akoz defayans i annan *across the board* dan plizyer Minister, ki fer ou ankoler letan ou vwar serten zofisye ki pe mal fer pe santi li konfortab Mr Speaker. Ozordi zot santi zot konfortab Mr Speaker. Rotasyon pa pou rezourd problemn efikasite, *retraining* petet Mr Speaker, be sa pa pou sanz latitud si dan sours ki'n pouri, Mr Speaker. Mr Speaker, sa letid a ede pou vwar lekel ki son letan in fini zis dan *meeting*, a montre nou lekel ki pe *delegate* travay olye kontinyen travay dan *silos*. I a ede dekouver lekel ki pe vreman merit *upgrade, training*, promosyon ouswa ki merit en *warning* final.

Kestyon pou reflesir lo la se ki, si diferan departman pe donn bann *rating* 75, 80, 90 e 100poursan lo performans pou trezyenm mwan saler. Nivo lefikasite ti merit satisfezan e pep pa ti pou konplent Mr Speaker.

Mr Speaker, sa bann analiz ki mon pe fer, mon pa pe kategorikman dir ki tou travayer dan servis piblik pe trenn lipye. Repons i non, e non. Koman en Manm Lasanble ki pe ekout sa pep koze, mon anvi vwar progre e sanzman dan latitud travay pou plis efikasite. Mr Speaker, i anmenn mwan lo lot size ki relye ek servis piblik, sa se sa size *the ease of doing business*.

Mr Speaker, nou seve pou blan, nou pou vin rouz e ble dan figir ler ou an fas ek en servis piblik ki pa efikas aköz serten travayer ki pe mal fer zot travay e aköz pa kontan ki Gouvernman in sanze.

I pou ralanti progre ekonomik pei, perdi sans ganny plis loportinite biznes. Ler zimaz Sesel son servis pa efikas konpare avek dan larezyon. I anpes investiser Seselwa bouz vit pou sezi loportinite. I koz depans adisyonnèl ki pa'n ganny prevwar. I osi kontribye pou lev kout lavi osi Mr Speaker.

I pa ed lekonomi grandi. Gouvernman anmas plis taks, kreasyon loportinite lanplwa.

Mr Speaker, i anpes pei e son pep pou rezouir en pli meyer lavi dan son devlopman sosyoekonomik. Mon sipliy ek Gouvernman pou *deal* ek sa defi parey in antreprann e aplik bann mezir ekonomik depi 2020. Nou kapab fer pli byen dan kad sa legzersis *RBM* si vreman bann ki ansarz bann diferan departman zot fer bann evalyasyon onnet, fran, pa soutir lapares e medyokrite e dalon pou transform sa servis piblik.

La mon rekomande ki bann Minis zot vin a la baz dan distrik. Pou zwenn ek Lotorite Distrik pou konpran pli byen swe, konsern e problemn distrik. 2 fwa par an sak Minis

devre kapab fer sa zefor pou permet swivi e presizyon dan demars amenn solisyon.

Mon osi demande ki dan sa konteks dinamizm devlopman, ki bann Departman Gouvernman zot zwenn souvan, pou pran bann desizyon baze lo lozik e realite dan sa dinamiz devlopman ki nou ladan.

Mr Speaker, mon dernyen size ki mon anvi aborde se diversifikasyon dan aktivite ekonomik. Mr Speaker, mon felisit Minister Lapes e Departman Lekonomi Ble pou zot zefor. Nou kapab fer ankor pli byen dan sa sekter. Mon demande ki zefor i ganny double pou ankouraz plis investiser e diversifikasyon.

Met a dispozisyon Seselwa ki anvi investir otan lenformasyon posib, atrap zot lanmen, gid zot ziska ler zot *take off*. Sekter agrikol bezwen pli proaktiv ver ankouraz donn valer nou prodwir lokal. I annan profesyonnel deor la, ki bezwen sa pti *push* pou li lev son standard pou vin pli konpetitiv dan prezantasyon e *packaging* son prodwi.

Ozordi ek modernite dan teknolozi zenn pe reve, zenn i anvi, zenn pe fer bokou resers *online*, zenn pe anvi kit sa bwat. Me serten zofisye dan servis piblik pe anpes li kit sa bwat pou li donn Sesel bann

nouvote ki teknolozi pe ofer. Departman ouswa bann ki ansarz lasyans, resers e teknolozi bezwen pli proaktiv e *at par* ek realite fer aktivite komers dan modernite.

Mr Speaker, mon remerisi Gouvernman ki'n gard son parol pou met dan Bidze sonm R88.1 milyon pou peyman final konpansasyon polisyon larivyer La Misère, Barbarons e Pti Barbarons. Mon osi apresye sa vot R1 milyon pou bann pti proze distrik tel parey akse semen, drenaz parmi lezot pou soulaz lavi rezidan. Mon osi tenir kont ki proze lakaz pou kontinyen lannen prosen dan distrik, pou annan 2 faz. 40 *unit* ki pou komanse ver Fevriye 2024 e lot faz 40 *unit* an Septanm a Oktob 2024.

Mon lapel ek zabitan ek fanmir ki pe esper en lakaz ouswa en kare later pou kontinyen fer zot kontribisyon le mwan, loportinite pe al prezante pa rat sa sans. Avan mon konklir, mon pou adres pep Seselwa la deor spesyalman zabitan distrik Grand Anse Mahe. Mon oule remerisi tou bann ki pe pran zot lavi e zot responsabilite serye. Plizyer endividi e groupman ki anvi diriz pei pe vizit zot. Pe dir zot nenport kwa.

Ekout zot si ou annan letan, analiz sa ki zot dir, fer

resers e al rod lenformasyon dan sours pou konn realite. Koz ek sa ki annan konesans pou ed ou tir ou prop konklizyon.

Serten pou esey tou pou kontrol ou liberte panse e fason vwar. Zot pou sey tou pou fer ou vwar tou keksoz negativ ek zot azanda anvi pouvwar. Pou sey fer ou krwar ki prezan ki zot pran kont ou egziste, ki tou keksoz i mal dan Sesel. Ki sa Gouvernman in bite aköz i pa donn ou tou keksoz ozordi menm.

Dan 3an ou ki konsyan depi sanzman kwa transformasyon ki'n arive dan pei, e lekel ki'n travay. Ki sakrifis nou'n bezwen fer pou ki ozordi pei in retourn ek en reveni parey an 2019 avan COVID.

Mersi pou zot grander lespri pou analize. Mersi pou zot solidarite e sans patriyotik pou batir sa pei ansanm. Ek Bondye dan nou kote, person pa pou bar nou. Mon remerisi mon *constituency clerk*, lekip dinamik LDS Grand Anse Mahe, DA, staff Ladministrasyon Distrik Grand Anse Mahe, pou zot zefor e sipor pou asir devlopman distrik.

Mon remerisi Ladministrasyon Lekol La Misère ek Grand Anse pou travay ek Lotorite Distrik pou byennet nou zanfàn. Mon

remersi tou zabitan Grand Anse Mahe ki ankor krwar dan mon abilite pou reprezant zot isi, e pou zot bann kontribisyon valab pou ed pei e distrik fer progre.

Mon oule sezi lokazyon pou felisit Mr Roland Madeleine pou son akonplisman raport konkour.

(Repeat) Mon remerisi tou zabitan Grand Anse Mahe ki ankor krwar dan mon abilite pou reprezant zot isi, e pou zot bann kontribisyon valab pou ed pei e distrik fer progre.

Mon oule sezi lokazyon pou felisit Mr Roland Madeleine pou son akonplisman raport konkour san son Festival Kreol, i ti orizinal e sorti dan rasin. Mon oule osi senpatiz ek lafanmir Morel La Misère ki'n perdi en zot pti zanfàn, pti garson ki lanterman ti fer yer. I pa'n posib pou prezan pou rezon lasante, mon senser kondoleans i al pou zot.

Travay i kontinyen, mon rekonnet ki pandan sa 3an distrik in benefisye proze drenaz dan diferan sou rezyon distrik. Amelyorasyon semen, semen ganny met koltar, nouvo lalimyer ganny mete, *guard rail* ganny mete, pye dibwa ganny koupe. Trotwar ganny aranze, ekstansyon koneksyon tretman desarz.

Idantifye nouvo sit pou en sistenm tretman desarz ki pou deservi flat STC, Savy

*Estate, Rivière Sèche Estate*, krwaze Grand Anse, flat *BBC* e Dauban *Estate*. Travay pou kontinyen aköz demann pou lenfrastruktir ek devlopman i pou la touzour. Mon demann zabitan pou kontinyen anmenn sizesyon e kritike kot foudre, se sa ki pou ed nou fer pli byen.

Frer e ser Seselwa, i annan en keksoz pou tou Seselwa dan sa Bidze, menm si i pa en sonm larzan ki pe met lo ou kont labank, ouswa dan ou lanmen. Endirektèman ou fanmir, zanfan ziska adilt pe ganny detrwa benefis ki pou redwir ou depans.

Pwen ki mon anvi zot reflesir lo la se ki pou veye lekel ki pou siport Bidze par vote. Sirtou vey byen sa bann swadizan defander ou lentere, ki'n dir zot pou fer li byen pozisyon ki zot pran ler in ariv ler pou vote. Ti'n ganny predir ki zanmen *United Seychelles* ti pou perdi eleksyon. La dan lopozisyon zot pe dir ek ou laba deor ki pe swivre ki zot sel opsyon pou Sesel.

Nou tou nou rekonnet ki sa parti in perdi rezon e nepli relevan. Aköz se ozordi letan zot dan lopozisyon ki zot pe sey rod relevans par *boycott* tou keksoz, zot fermal vre Mr Speaker.

Ki Bondye i kontinyen beni nou pei e dan tou sa ki nou pe mazin envestir, nou

lenerzi e letan ladan. Realize ki dan lavi tou i permetab, me pa tou ki benefisyab. Sirtou pa avek *United Seychelles*. Mersi Mr Speaker.

**(APPLAUSE)**

**MR SPEAKER**

Laparol prezan pou Onorab Churchill Gill.

**HON CHURCHILL GILL**

*(Part missing)*...Espesyalman zabitan Baie Ste Anne. Mr Speaker, atraver ou, sa dimoun ki'n koz avan nou i dir *United Seychelles* in fatigue. Be mon pa krwar i devret fatig li ek *United Seychelles* si i fatigue. Mon krwar esper 2025, tou rezilta pou la ater. La pa vo lapenn nou lager lo la.

**(APPLAUSE)**

**HON CHURCHILL GILL**

Onorab ler in koze, in konfirman ki i annan en enkonpetans serye dan sa Gouvernman *LDS*. Mr Speaker, sa menm sityasyon i dekoult dan lezot landrwa dan egzekitiv. Enkonpetans serye dan *leadership*.

Prezidan Larepublik dan son *SONA*, i ti vin la dan Lasanble i dir nou i fristre ek travay ki mannyer pe ganny fer dan sekter piblik. E an swivan sa nou ti vwar lentrodiksyon *performance*

*base*. E la ozordi Onorab i dir nou ki nou, nou pa kapab vin blanm bann dimoun ki pa pe travay.

Be Mr Speaker, fristrasyon *performance base, leadership*. Sa bann dimoun ki pa pe *perform*, zot annan en siperyer zot. Be si ziske la konmela nou pa ankor kapab adres sa, i montre en lenkonpetans serye dan *leadership*.

**(APPLAUSE)**

### **HON CHURCHILL GILL**

Mr Speaker, konman Manm Elekte pour distrik Baie Ste Anne Praslin, i mon devwar pou donn mon reaksyon lo Bidze Sesel pour lannen 2024.

I ekstrememan enportan ki tou dimoun dan distrik Baie Ste Anne i ganny byen eksplike ki vreman i annan dan sa Bidze 2024. Ki fason i pou tous zot? Ki benefis i annan? Ki defi ki sa Bidze i anmennen pour zot?

Mr Speaker, nou'n vwar ki menm si in annan en ogmantasyon saler 10poursan, e en ogmantasyon R403milyon 498mil 519 par lao larzan ki'n ganny bidzete pour 2022, kekyon primordyal se eski pep Seselwa in benefisye dan en fason konsiderab pandan lannen 2023, ki byento pe al terminen?

Repons, i pa vreman sa realite lavi ki lepep in eksperyanse. Realite se en lavi byen tris la deor. Sa 10poursan pa'n abouti dan naryen ditou, spesyalman pou zabitan lo Praslin ek La Digue. Fardo pri lavi i tre for pour zabitan sa 2 zil.

Pandan sa dernyen 3an, pep Seselwa in ganny prezante avek Bidze ki son bann prozeksyon pa ti realis. Mr Speaker, nou'n vwar bokou promes me mazorite pa'n ganny delivre. Akoz tou prozeksyon pa'n kapab ganny kolekte.

Nou'n vwar SIA in donn nou en lalis proze ki *pending* e pour bann sonm tre sibstansyel. Ler nou ti pe diskite Bidze 2023, nou ti demande kote lopozisyon, ki ler Bidze 2024 i ganny prezante nou ganny en *addendum* kot i montre nou lekel bann proze ki pe ganny *carried forward*, e konbyen i koute e pou ki distrik.

Me nou pa'n vwar sa vini aköz sa ti pou donn nou en lendikasyon ant sa prozeksyon R10bilyon e sa ki SIA li i *pending*, pou montre nou poudir be premyerman nou pa pou anmas tou sa larzan. E dezyenm, i zis ki en bann keksoz ki nou met la, nou lev lekspektasyon dimoun. Me apre i fini lanmenm.

Ler ti fer revy milye lannen, nou'n tann gro leloz felisitasyon an relasyon avek lakantite *savings* ki swadizan Gouvernman in fer. En lapros vre fatal pour nou pti pe Sesel. Ler en kantite fanmir pe plenmyen pou fer 2 bout zwenn, Gouvernman i deklare *savings* dan lasistans sosyal. Sa i vremen ridikil.

Mr Speaker, Bidze propoze pour 2024 i reprezant en sonm R10bilyon 640milyon 628mil 966. En logmantasyon R145milyon 479mil 301. An plis ki sa ki ti ganny bidzete pour lannen 2023. Donner bann defi pou kolekte lakantite larzan ki ti'n ganny prozekte sa 2 dernyen lannen, eski sa ki pe ganny prozekte pou kolekte an 2024 i en sif ki realis? I posib vin en realite.

Mr Speaker, i enportan met lo rikord ki en Gouvernman o pouvwar i devret konsyan ki parmi son manda se pou osi fer sir ki lavi sa pep i toultan pe amelyore pour le meyer lannen apre lannen. Me pa deteryore.

En pep i vot pour en Gouvernman dan lofis pour zot byennet. Lekspektasyon en pep se pou vwar amelyorasyon remarkab dan zot lavi dan en fason progresiv. Pandan sa dernyen 3an, pep Seselwa pa'n vwar okenn amelyorasyon tanzib dan zot lavi tou le zour.

Mr Speaker, mon pa pe koz lo kosmetik. Mon pa pe koz met pli zoli lenz. Plis pake deliks dan lakaz. Mon pe koz plito lo akse avek bann keksoz de baz ki tre enportan dan lavi sak fanmir ordiner, ki pa bann nouvo risk. Ni menm bann kategori nou bann nouvo milyonner.

Mr Speaker, pour Bidze 2024 nou'n vwar ki sekter lasante in annan en prozeksyon R1.41 bilyon. Malgre tou sa provizyon bidzeter, Lopital Baie Ste Anne in kontinyen deteryore. Pandan sa dernyen 3an, in reste dan en kondisyon ki i pa akseptab. Malgre apre tou sa bann kestyon ki mon'n anmennen devan sa Lasanble Nasyonal pour *Praslinois*, avek bi egzize ki nou ganny en lopital byen ekipe.

Ozordi nou vwar R4.5milyon alokasyon ki'n ganny mete pour renovasyon Lopital Baie Ste Anne. Mr Speaker, menm alokasyon ki ti la dan Bidze 2023. E bann larepons mon bann kestyon ki mon'n fer pandan lannen, Minis toultan in dir mwan i pe al fer aköz i annan sa 4 milyon dan Bidze 2023.

E la ozordi nou pe diskite Bidze 2024. Nou vwar menm 4.5 milyon, me napa naryen ki'n ganny fer.

**(APPLAUSE)**

**HON CHURCHILL GILL**

Mon note ki napa okenn larzan pour lekipman e lezot keksoz enportan pour Lopital Baie Ste Anne. Sa i vadir pasyan lo Praslin pou bezwen kontinyen fer fas avek menm sityasyon pour lannen 2024.

Mr Speaker, pandan lannen Prezidan Larepublik avek en delegasyon, avek bi pou amelyor sityasyon dan distrik Baie Ste Anne, zot ti rann en vizit. Me ki nou'n vwar apre, sa vizit pa'n abouti dan naryen. Eski sanmenm sa ki Gouvernman i dir i pe travay? Zabitan Praslin pe note.

Mr Speaker, en sonm 100.43 bilyon pe ganny propoze dan program lenvestisman kapital. Sa sonm pe ganny finanse dan en fason swivan. Finansman domestik 876.6 milyon. Ki garanti apre sa leksperyans pa kapab konekte tou sa ki'n ganny Bidze, ki sa bann larzan pou ganny anmase?

Dezyenm fason finansman se par bann *loan* pour en sonm 277 milyon. Pei pe konmans ganny trangle avek *loan*. Kestyon, ki kantite *loan* ki pei pou kapab abzorbe?

Trwazyenm fason finansman se par bann don ki pour en sonm R304.4 milyon. Konbyen pei ki pou donn sa groser don? Eski i annan

okenn lezot kondisyon ki atase avek sa groser don ki tre sibstansyel? Eski tou sa bann don pou ganny realize an 2024?

Mr Speaker, resaman mon ti demann kestyon dan sa Lasanble lo bann don ki pei ti pe gannyan pou fer lakaz. E mon ti ganny dir par VP ki vi ki i pran letan pou finaliz bann don avek pei donater, serten don pa pou realize an 2023. Si sa i leka, ki garanti en sonm R304 milyon pou realize, ki dan Bidze 2024?

Mr Speaker, pep Seselwa i bezwen konnen ki tou sa bann proze ki'n ganny met dan Bidze, zot la avek en lentansyon zis pou donn en *feel good factor*. Me zot realizasyon pa garanti.

Mon ekspekte ki zabitan ki reste kot Stasyon PUC a kapab ganny zot peyman tre byento, vi ki sa provizyon i deza dan Bidze 2023. E ozordi ek demen zot pe pas lo zot bann lagreman.

Mr Speaker, *Day Care Scheme* en sonm R27.6 milyon pour sa *scheme*. E dan *ECCE Trust Fund* i annan en sonm 1.6 milyon ki'n ganny bidzete pour bann *day care* e *childminders*. Pou zot ganny asiste anba sa fon kot zot kapab fer laplikasyon pour lekipman ki a met a zot dispozisyon pou fer zot ariv lo standar ki *IECD* in etabli.

Kestyon ki mon poze, eski prosedir e kriter pou akse sa bann fon in ganny byen defini? Eski i pou fasil pou bann dimoun ki devret benefisye, ganny akse dan en fason kourt dele? Mon note ki akse atraver bann fon i kree bokou difikilte pour plizyer *day care* e *childminders* ki dan bann gran bezwen.

Mon pe sipliy avek sa ki responsab lo lapar tou bann *childminders* e *day care*, pour ki Gouvernman i revwar bann prosedir ki kapab vreman ede pour sa ki dan vre bezwen i ganny sa lasistans dan pli kourt dele letan posib.

Mr Speaker, fon letid en sonm R198milyon pe ganny bidzete. Sa i kouven tou bann dimoun ki deza dan en travay. E osi bann etidyan ki fek sorti dan sant profesyonnel.

Kestyon ki tre enportan pou demande, se ki sekter ki pou benefisye? Ki *quota* pour sa bann diferan sekter? Eski tou etidyan ki sorti dan nenport sant profesyonnel pou kapab ganny sa sipor? Oubyen zis en serten kantite etidyan ki pou kalifye pour sa *quota*, donner prosedir ki an plas.

Mr Speaker, etidyan Praslin, La Digue pou finalman ganny sa ogmantasyon dan zot alawenns, apre ki sa Gouvernman LDS in kit zot

ater dan Bidze 2023. E mon ti vwar mon bezwen demann Minis aköz ki logmantasyon in ganny mete dan Bidze 2023 pour bann etidyan ki pe etidye aletranze? Me pour bann etidyan lo Praslin ek La Digue, zot pa'n ganny mete.

Me la nou'n vwar ki sa in ganny mete dan 2024. Me selman pour sa bann pov etidyan, zot in bezwen *cope* avek sa lannen san ki zot pe ganny okenn sipor. Mr Speaker, bann paran ek etidyan ki mon'n koz avek, zot enterese pou vwar sa lankadrem an e program pour etidyan swiv letid *A Level* ki Minister Ledikasyon pe travay lo la.

Mr Speaker, nou konnen ki sekter prive i moter nou lekonomi. Me i annan zis serten kalite biznes dan sekter prive ki benefisye avek serten rediksyon dan taks. Sa ki tris se ki serten kalite biznes pa pe byen ganny gete an relasyon avek kontribisyon ki zot pe fer dan lekonomi Sesel.

Par egzanp bann biznes ki fer ekskirsyon, zot pa'n ganny okenn soulazman. Ni menm en rediksyon lo zot bann lekipman ki zot bezwen enporte, tel ki pyes masin e nouvo masin.

Mr Speaker, konstrikasyon lakaz an Septanm 2023, nou'n ganny dir par Minis Finans ki en



lagreman pour en lot *loan* lavalier \$15 milyon avek fon Saoudyen pour devlopman in ganny sinyen. Nou konpran ti ganny finalize pou konstri 172 *unit* dan 7 distrik pandan 2024 a 2026. En provizyon 84.5 milyon pe ganny prozekte pour lannen 2024 pour sa bann proze ki enkli *Marie Jeanne Estate* dan distrik Baie Ste Anne.

Me keksoz ki pa kler, eski sa *loan* pou ganny donnen par porsyon, aköz ki sa proze i etale 2024 a 2026? Eski i en size konpetan kapasite pou egzekite oubyen plis lenformasyon i devret ganny donnen e eksplike pour dimoun kapab konpran si realizasyon sa bann lakaz pou vreman arive.

Mr Speaker, en sonm 10milyon in ganny bidzete pou repar bann lakaz pour bann endividi ki pli dan bezwen e pa kapab ganny akse avek finansman nesaser pou fer sa bann renovasyon. La ankor mon swete ki distrik Praslin, Baie Ste Anne an partikilye pa ganny kit deryer. Sa kalite lasistans i tre enportan, aköz pri lavi lo nou zil i vreman en *challenge*.

E si Gouvernman pa antre pou soulaz lapovrete, en gran poursantaz fanmir dan nou zil pou vwar zot dan sityasyon ekonomik ki tre difisil. Mon swete ki sa

deklarasyon atraver Bidze 2024 pa reste zis en senp deklarasyon. Me ki pran en legzistans reel dan tou kominote kot nou annan sa bann kategori fanmir mwen kapab finansyerman.

Mon swete ki sa provizyon pa reste zis en zoli deklarasyon politik byen dekore, ki adousi bann leker imen e adousi bann leker dezapwentman.

Mr Speaker, *Scheme* Lakaz Spesyal, en lot sonm 10 milyon pour bann proze Lakaz *Scheme* Spesyal. Sa nou'n ganny dir i pou bann endividi ki pa kalifye sonm total pri konstriksyon pou konplet zot lakaz.

Sa *scheme* an partenarya avek Minis responsab pour Lakaz e *HFC*, kestryon ki bezwen ganny reponn se ki kalite kategori lakaz nou pe koz lo la pour sa bann kategori dimoun? Eski Minis pou kapab donn plis detay lo la?

Mr Speaker, Gouvernman in osi fer en provizyon pour en sonm 18milyon anba *scheme* finansman lakaz avek bann labank. Sa *scheme* i sipoze pou ed bann endividi ki pe ganny en saler pli ba ki R30 mil. E ki pran *loan* avek bann labank pou siport zot finansman, pou zot kapab konplet konstriksyon zot

lozman. E fer zot repeyman vin abordab.

Lo sa kategori, plis detay i nesaser. Par egzanp ki son *minimum* ler nou dir mwens ki R30 mil? Eski i annan serten kantite aplikan ki labank i kapab abzorbe dan okenn moman? Oubyen zot pare pou konsider tou sa ki vin devan san leksepsyon?

Oubyen zot pou al fer zot prop triyaz demann garanti, sekirite adisyonnal, lasirans lavi pou kree plis kosmar pour sa bann fanmir ki vreman oule fini zot lakaz.

Mr Speaker, sa Bidze pou selman kapab fer en lenpak si kou lavi i vin pli afordab. Si non, sa bann dimoun pa pou zanmen kapab antre anba *scheme* mwens ki saler R30 mil.

Mr Speaker, renovasyon lakaz pansyoner, en sonm 5milyon dan Bidze pour *scheme* renovasyon in ganny mete. Eski i annan en lodit ki'n ganny fer lo lakantite pansyoner ki dan vre bezwen ozordi dan Sesel? Ki mannyer Gouvernman in ariv lo sa provizyon zis 5 milyon. Pa mwens. Pa plis. Kestyon tre enportan pou adrese se konbyen sak pansyoner pou gannnen? Oubyen nou konmans fer, kot larzan i fini, nou arete? Eski i pou annan okenn repeyman?

Mr Speaker, dan Bidze Minis i dir bokou endividi ki pe esper lozman avek Gouvernman pe lwe lakaz avek sekter prive. En bann sonm tre eleve ki zot sityasyon i tre difisil. Zot pli kwense pou fer 2 bout zwenn. Eski pa sa ki nou dan lopozisyon nou'n toultan fer sorti dan sa Lasanble, ki nou annan en group dimoun ki dan vre difikilte isi dan Sesel?

Ozordi, mon santi mwan soulaze ki sa Gouvernman atraver Minis Finans, in finalman rekonnet sa realite lavi dan Sesel anba son *watch*. Mersi Minis Finans. Sa se realite. Sa se realite dan Sesel ozordi.

Mr Speaker, *Scheme Part Rental* pou ed bann endividi avek peyman zot *rent*. Sa se pour bann endividi ki zot saler i anba R19 mil. Sa bann ki kalifye anba sa *scheme* ava kapab ganny lasistans ziska 55poursan zot *rental* ki zot pe peye.

Sa i pa nouvo. Parey bokou nou i konnen, Gouvernman *United Seychelles* ti'n konmans enplimantasyon plizyer sa bann program. Ankore en fwa mon santi mwan soulaze ler Gouvernman *LDS* i rekonnet plizyer merit sa bann diferan program ki ti an plas dan lepase.

Mr Speaker, renovasyon sant Anse Boudin Praslin pour bann pasyan avek adiksyon, i annan en sonm 3milyon. Ler mon'n koz avek sa bann dimoun, zot anvi konnen kwa egzakteman pou ganny fer lo sa sant? Ki pou ganny mete a zot dispozisyon?

Mr Speaker, Minis i dir resers in montre ki labi drog ek lalkol i rezon prensipal akòz bokou dimoun i tonm dan lapovrete. E ki Gouvènmman avek sipor Labank Mondyal pe fer en letid. Tou sa bann deba dan 6enm Lasanble lo lapovrete ti zis en mannev politik, si ozordi Gouvènmman o pouvwar i annan en tel krwayans ki sa lakoz lapovrete.

**(APPLAUSE)**

### **HON CHURCHILL GILL**

Oubyen, sa i en mannev politik pou detourn latansyon lo vre lakoz povrete ozordi dan Sesel. Mr Speaker, mon poz sa la. Donn letan son letan. Les letan koz pour li menm.

Mr Speaker, i pa *breaking news* ki alokasyon Semen Pasker, Stasyon Teste Transpor lo Praslin ek travay lo Zil Eve i dan Bidze 2024. Annou donn kredi sa ki merite. Pa tay avek kredi ki pa pour ou. Zabitan Praslin i swiv byen Lasanble. Sa ki pase e sa ki ganny diskite.

An sa ki konsèrn Stasyon Teste Transpor, tou zabitan onnet sènsè lo Praslin, i konnen lekel sanpyonn zot dezir ek laspirasyon. Zil Eve Mr Speaker pa ti egziste o bor Praslin.

**(APPLAUSE)**

### **HON CHURCHILL GILL**

Lekel administrasyon ki'n kre Zil Eve? Pour ki rezon ki Zil Eve ti ganny kree? Ki bi prensipal ki Zil Eve ti ganny kree? Sete zisteman agrandi baz lekonomi lo Praslin. Mon apresye ki bokou dimoun in ganny zot bout later pou devlope. Sa pou kree plis larises ek lanplwa pour *Praslinois*.

I byen zot laba lo Zil Eve akòz ti ganny kree pour zot sa, par ladministrasyon Prezidan France Albert Rene.

**(APPLAUSE)**

### **HON CHURCHILL GILL**

Pa ni ti ganny kree an 2020. Ni an 2021. Ni an 2022. Ni an 2023. Si i ankò annan travay pou fer lo Zil Eve ozordi, sa i responsabiltè Gouvènmman dizour pou fer sa travay.

Mr Speaker, mon note alokasyon pour distrik Baie Ste Anne ki'n vin an rezilta travay ki mon'n fer pour tou zabitan konman zot Manm Elekte atraver bann diferan

Mosyon e kestyon ki mon'n anmennen dan sa Lasanble.

Malgre parfwa mon'n bezwen eksprim dezapwentman tel ki alokasyon pou konstrir nou kordgard modern pour distrik Baie Ste Anne. Ki plan in ganny sanze parey lenfrastriktir nouvo lasose ki'n fer louvertir tre resaman.

Me la ozordi in fini satire an rezilta sanzman dan sa bann plan orizinal. Ankor Mr Speaker, se travay kosmetik. Baie Ste Anne nou pa le sa bann kalite proze. Sa proze ler i ti ganny konsevwar, sete en proze pour *long term*.

**(APPLAUSE)**

### **HON CHURCHILL GILL**

Bomaten atraver ou Mr Speaker, Onorab Georges in dir nou ki i ti *Marie-Jeanne*. In vwar en zoli *guest house*. Me ki mannyer kliyan pou al dan sa zoli *guest house* si ou donn li en lenfrastriktir ki'n fini satire, delo pe koule partou. *Taxi* drayver ler pe anmenn zot dan zot bis, zot bezwen pas dan labou?

Sa i montre ki i annan en dekoneksyon la. Ou bezwen fer en keksoz pour lonterm en mannyer avan sa kliyan i ariv kot sa *guest house*, i ganny son servis ki i bezwen. E sa i amelyor repitasyon nou pti pei Sesel.

**(APPLAUSE)**

### **HON CHURCHILL GILL**

Mr Speaker apre tou sa travay, ki nou vwar? Poto gol i ganny sanz pozisyon. La nouvo deklarasyon i dir ki Baie Ste Anne pou ganny zis renovasyon. Be, ankor sanz plan. Sa plan kordgard ti byen. E la mon le fer dimoun Baie Ste Anne rapel. Ler nou ti pe diskrit sa dan 6enm Lasanble. Ler mon ti dir poudir sa lenfrastriktir lasose i bezwen annan tou son servis avek li. *Leader* Lopozisyon sa letan ki ozordi Prezidan Larepublik, i ti demande, akfer ki Baie Ste Anne i bezwen sa groser lenfrastriktir? Be ou bezwen fer travay lonterm. Ou pa kapab get la, apre nou vwar nou pe retourn lo la ankor.

Mr Speaker, dan Bidze tou Minis i annan alokasyon pour transportasyon. Me mon osi note ki bann Minis i servi en pe sa larzan pou fer zot bann vizit lo Praslin ek La Digue an koneksyon avek zot travay.

Sa ki tris se ki tou zabitan Praslin ek La Digue zot bezwen tir larzan dan zot pos pou pey zot depasman pou al kot nenport lofis Gouvernman lo Mahe. Sa sityasyon i bezwen ganny ranverse. Mon'n deza demande. Mon sezi sa loportinite pou fer ankor sa

demann. Silvouple, pa kit zabitan Praslin ek La Digue ater, apre dan *weekend* pou nou al kot zot demann zot, zot *vote*.

Nou bezwen donn zot latansyon. Minis i deza annan sa dan Bidze. Fer *schedule* kot i ava annan zou zot a kapab vwar sa bann dimoun. E zot sa bann dimoun i a kapab met zot bann problem devan. Ek sa lavi difisil zot pa kapab kontinyen bour lanmen dan zot pos pou zot kapab pey transportasyon.

#### **MR SPEAKER**

30 minit Onorab.

#### **HON CHURCHILL GILL**

Mr Speaker, lo bann travay lentegrasyon lo lakot ki Minis in anonse, i regretab ki sou distrik Anse La Blague e Côte d'Or sa problem pa'n ganny adrese dan lannen 2023, malgre ti annan provizyon dan Bidze. Ki problem, ki bann defi? I enportan ki Lotorite Distrik i ganny met okouran.

Mr Speaker, dan sou distrik Anse La Blague kot gran lans ek pti lans, lakot in ganny severman andomaze. Nou pa kapab anvoy sa travay pour pli tar. I riske tro tar e finalman kout en fortin.

Vizit dan sa landrwa ti'n fini fer depi an 2022. Eski sa ki nou apel pe delivre? La nou Novanm 2023, napa naryen

ki'n ganny fer lo sa 2 landrwa. Mon ekspekte ki SIA i pa a kontinyen inyor sa 2 proze. E dan lannen 2024 i a kapab bouze pou ki sa bann later i ava aret degrade. E nou a kapab vwar en solisyon pour sa landrwa.

Mr Speaker, mon le remersi zabitan Baie Ste Anne pour tou zot sipor ki zot in donn mwan pandan tou sa letan. E zot, zot ziz pour zot menm travay ki ganny fer. Menm si parfwa dan Lasanble, ler i annan en keksoz ki ou bezwen *challenge* Gouvernman. Mon vwar mwan zis mon tousel pe *challenge* Gouvernman. Mon bann lezot koleg i les mwan ater.

**(APPLAUSE)**

#### **HON CHURCHILL GILL**

Mon pou kontinyen travay pou anmenn bann benefis enportan pour zot. E mersi pour tou zot sipor ki zot in donn mwan pandan tou sa letan. Mersi Mr Speaker.

**(APPLAUSE)**

#### **MR SPEAKER**

Nou'n ariv a lafen deba pour ozordi. Mon remersye bann Manm pour zot. Mon remersye bann Manm pour zot kontribisyon. Sirtou bann kontribisyon ki'n lo sibstans Bidze. Mon remersye Minis osi

pour son partisipasyon dan sa  
lazournen. Lasanble a *adjourn*  
e nou a repran travay demen  
*matin 9er. Adjourn.*

**(ADJOURNMENT)**